

МАНСУРХҮЖА ХҮЖАЕВ

**АЙТМАЙ ДЕЙМАН-У...
БҮЛГАН ВОҚЕАЛАР-ДА**

(Ҳаётий ҳангомалар)

**«SHARQ» НАШРИЁТ-МАТБАА
АКЦИЯДОРЛИК КОМПАНИЯСИ
БОШ ТАҲРИРИЯТИ
ТОШКЕНТ — 2013**

УЎК: 821.512.133-7

КБК 84(5Ү)7
X - 98

X – 98 **Хўжаев, Мансурхўжа**

Айтмай дейман-у... Бўлган воеалар-да.
Ҳаётий ҳантомалар. – Т.: «Sharq», 2013. – 144 б.

ISBN 978-9943-00-999-8

УЎК: 821.512.133-7

КБК 84(5Ү)7

ISBN 978-9943-00-999-8

© "Sharq" нашриёт-матбаа акциядорлик компанияси
Бош таҳририяти, 2013.

Кулги согинчи

Оламда китоб кўп, барини ўқишта умр етмайди. Баъзан орзикиб бокиб, буни ўқимасам бўлмайди-да, дея кўз остига олган китобни вараклашга ҳам вакт тополмай юрасан. Аммо бирон-бир кадрдонинг, танишинг ёки ёш адиб келиб, бир тўплам тайёрлагандим, кўриб фикр айтсангиз, деб қолса, бундан бўйин товлаш қийин. Мансурхўжа aka агар малол келмаса, тўпламчамни кўриб, мулоҳазаларингизни айтсангиз, деганида, кўнглимдан бир андиша кечди – гоҳ мўъжизакор табиат, гоҳ тарихий мавзуларда асар ёзиб юрган, шахси ва ижоди хақида Озод Шарафиддинов, Ўткир Ҳошимовлардек зотлар мақолалар битиб, илиқ сўзлар айтган бу қаламкаш энди нега айнан менга мурожаат қиляпти? Бу саволга тўпламни вараклай бошлаганимдан сўнг жавоб топдим, унга ҳангомалар жамланган экан. Мен учун сира кутилмаган ҳол бўлди, чунки бу кишининг ушбу мавзуда калам тебратганига илгари сира дуч келмаган эдим.

Одам боласи асосан турмуш ташвишлари билан банд бўлгани учун доим кўнгилочар давраларни кўмсаб, кулгини согиниб яшайди. Кулгини согиниб турган кунларим эди, бу тўпламга кандай шўнғиб кетганимни сезмай қолдим, ўқиганим сайин, чарчокларим ёзилаверди. Мансурхўжа aka кўп амалларни, нуфузли-нуфузли давраларни кўрган, элнинг ичидаган не-не воқеаларнинг шоҳиди бўлган, бевосита иштирок этган. Шу боис ҳангомаларида хаётнинг иси гупуриб турди. Уларнинг аксарияти эски замон билан боғлиқлиги туфайли ҳозирги авлодга нотаниш бўлган атамалар сероб. Кулгилар

ичида ўша даврнинг иллатлари ҳам ўз-ўзидан намоён бўлиб бораверади.

Тўплам билан танишиб бўлгач, муаллифга айрим истакларимни ҳам айтдим. У ёки бу ҳангомада дўстларнинг ҳурмати учун қатор-қатор исмларни санаб ўтиш гуноҳ эмас, лекин воқеаларда уларга бирон-бир вазифача юклашга уринилса, айни муддао бўларди. Баъзи таъби нозикрок кимсаларнинг исмини аниқ кўрсатишда эҳтиёт шартдан бир олдидан ўтиб қўйган маъқул, баъзиларининг исмини хозирча ўзгартириб туришга ҳам тўғри келар. Латифаларнинг энг чойхонабопини устомонлик билан “пардалаш” лозим бўлади, айрим ҳангомаларни эса, турли андишаларга кўра, балки тўпламга киритмай турган яхшидир. Биздан шунчаки маслаҳат, қолгани муаллиф билан мухаррирнинг ихтиёрига боғлиқ. Нимани ихтиёр килишганини китоб чикканда била-миз.

Қайғули гапни айтишдан кўра ёзиш осонроқ, кулгили гапни айтиш осон-у ёзиш кийин. Мансурхўжа Хўжаев ёзишга жазм этган экан, бундай дангалчикка тан берамиз холос.

Илойим, юртимизда буғдой ва кулги кўпаяверсин!

Анвар ОБИДЖОН,
Ўзбекистон ҳалқ шоири.

КҮНГЛИМДАГИНИ БИР ТҮҚДИМ-ДА

*Мундоқ ортга қарасам, анча яшаб қўйибман,
ҳар хил амалларни, турфа давраларни кўрибман.
Ҳаётда эса қизиқ-қизиқ ишлар кўп бўлади, вақт
ўтиши билан уларни турли гурунгларда эслаб,
кулганимиз-кулган.*

*Кулгига бой ўтиришларда қадрдонларим баъзан
ёқамдан олгудек бўлиб, ҳой, сенинг қаламинг бор,
шуларни ёзсанг-чи, деб қисташади. Бир айтиши-
ди, икки айтишиди, охири таваккал қилиб, ёзишга
тушдим. Ёзганларим китобхонларга сал бўлса-да
маъқул келса, нур устига аъло нур, кўнгиларига
унча ўтирмаса, ичимдагиларни бир тўкиб олдим-ку,
деб ўзимни юпантирагман.*

*Афанди айтмоқчи, уста бўлиши орзусида бир
таёқча йўниб қўйдим, агар шу ҳам ҳассами десан-
гиз, лоақал нахта савашга яраб қолар.*

Мансурхўжа Хўжаев

Учокка айланган велосипед

Рўзибой буғолтири янги велосипед олиб уйга қайтаётса, йўлда ўртоқлари учраб, ювадиган бўлишишибди. Рўзибой велосипедни толга суюб кўйиб, уларни ошхонага бошлабди. Улфатчилик авжга чи-киб, бир-биридан зўр тилаклар айтила бошлабди:

— Илойим, шу велосипед хадемай мотоциклга айлансин, — дебли Шерали.

– Уйингга енгил машина кирганиниям кўрайлик, ошна, – дебди Турдибой.

— Э, машина нима бўпти, — дея гапни улабди Жўрахўжа, — бу азамат самолёт ҳам олади ҳали.

— Худо хоҳласа, “ТУ – 134”дан, – деб аниқлик киритибди Солижон.

Қанча-қанча шишаларни йиқитишиб, армон-лар ушалиб, бир-бирлариға сұянганича ташкарига чиқишиңа, велосипедни аллақаңын ўғри уриб кетганиш. Шунда Рұзібай шерікларига хұмрайиб дебди:

— Майшатга берилиб ўтираверибмиз, “ТУ-134” менсиз учеб кетибди-ку!

Энгүзүүл “O”

Анваржон Дадабоев институтда ишлаб юрган пайтида талабалардан “о” харфи кўп бўлган сўзлардан мисол келтиришни сўрабди.

— Носковок, — дебди бири.

— Ломоносов, — дебди иккинчиси.

Шунда Шохрух деган футболга ишқибоз талаба хонани бошига күтариб бақирибди:

— Гooooooool!!!

Бу топкирликдан завқланган Анваржон “яхши” сўзининг русчасини ишлатиб, ўз навбатида кичкирибди:

– Хорошоопоооооо!!!

Гафлатда қолдим

Республикада танилган кулги устаси, Учкўпrikда яшовчи Баҳодир кизик хотини Салимахон билан чой ичиб ўтириб:

– Онаси, пиёламда шама тик турибди, меҳмон келади шекилли – деса,

Хотини:

– Э, чўктириб юборинг, бугун ишларим кўп, компот беркитишим керак, – дебди.

Баҳодир шамани чўктиришга уринибди-ю чой қайноклиги учун қўлини шошиб пиёладан тортиб олибди. Кўп ўтмай, қайнонаси шалаббо кийимда уйга кириб келибди.

– Вой ўлмасам, сизга нима бўлди, ая? – деб сўрабди Салимахон.

– Буям бир палакат-да, – дебди онаси. – Уйларингга бурилаётсиб, кўчадаги арикка йиқилиб тушсам бўладими!

Буни эшитган Баҳодир ўзича:

– Шама қайнонам эканини билганимда, қўлим куйсаям чўктирворардим-а! – дермиш.

Семиришининг сири

Баҳодир кизик хотинига дашном беряпти:

– Бунча килтириксан? Уйда ҳамма нарса етарли бўлса, нега семирмайсан? Кимга тортгансан ўзи, онанг бўлиқкина, гавдали...

Салимахон кизиқчининг хотини эмасми, ўхшатиб жавоб килибди:

– Онам ҳам бир вактлар менга ўхшаган нозиккина эдилар. Эрлари ўлгандан кейин эт қўйиб, семириб кетганлар...

От тортолмайдиган қўшиқ

Иши пишик муҳандислардан бўлган Кузма қўқонликлар билан гурунгдошлиқ килавериб, жуда ўзбеклашиб кетган. Бир куни у қасбдоши Жўракўзи билан от миниб кетаётиб, бирорта ўзбекча ашула ўргатишни илтимос қилибди. Жўрақўзи “Мен факат катта ашулаларни биламан, катта ашула жуда оғир, айтотмайсан”, деса ҳам, сира кўнмабди. Шунда Жўрақўзи “Нима десам шуни қайтариб тур”, деб ашулани бошлабди:

– Богаро қўйсам қада-а-м...

Кузма такрорлабди:

– Багара қўйсам қада-а-м...

Жўрақўзи давом этибди:

– Гул-ғунча колмай хандаду-у-р...

Кузма яна такрорлабди:

– Гулунча калмай хандадр-р-р...

Хиргойининг охиридаги “др-р-р”ини эшишиб, оти тўхтаб колган экан, Кузма Жўрақўзига ҳайрат билан бокиб дебди:

– Вот смотри, а! Рост айтибсан, Журакузи, узбекча ашула жуда ағир, даже от торталмай колди.

Шеърхонлик

Шоир Турсун Қамбар хонадонига азиз меҳмонлар келади. Турсунбой меҳмонларни Сирдарё кирғоғига, қадимий Оқжар кема солига зиёратга олиб боради. Баҳор ойлари эмасми, дарё тошган, дарё ўртасидаги оролча турли-туман кушлар бозорига айланган.

Турсунбойнинг божалари Абдумалик домла ва Баҳромали бир-бирлари билан ака-уқадек иноқ, моҳир овчилар. Улар қайиққа ўтиришиб, оролчага йўл олишади, паналаб бориб, қушларга қаратса бирин-кетин ўқ узишади. Карангки, қадамлари ёкканми, ҳар калай бу ўклардан олтита чуррак сув бетида қалқиб қолибди.

Зиёфатга текин гўшт топилганидан беҳад кувонган Турсун Қамбар божаларининг овчилик маҳоратини улуғлаб, улар кирғокка қўниб-қўнмасиданоқ, 30–40 каторли шеърни тайёрлаб кўйибди. Шеърнинг сўнги кисмидан парча келтирамиз:

*Қуёшдай юзи иссиқ,
Оҳ, менинг божаларим!
Энди чироили бўлар.
Дилдаги режаларим.*

*Ярим кило гўшт - фойдага.
Севинчдан дарё дилим.
Гар чурраклар отилмаса.
Бир сатр ҳам ёзмасдим.*

Турсунбой менга қараб, газетада муҳаррир бўлсангиз, бу шеърни босармидингиз, деб сўраган эди, кўплашиб, топиб-тутиб, юкоридаги шеърни “муҳаррир” тилидан шундай давом эттиридик:

*Учта чуррак беригмаса,
Бундай шеърни босмасдим.*

Пойга

Қўқонда машҳур Ҳошимжон ошпазнинг меҳмони бўлмаган шоҳу гадо қолмаган десам, асло муболага эмас.

Ҳошимжон амаки бир куни менга телефон килиб, “Жинниларни тузатадиган дўхтири то-пиб келмасангиз бўлмайди, ўғлим”, деб қолдилар. “Тинчликми, амаки, нима бўлди?”, деб сўрасам, “Келсангиз биласиз”, дедилар.

Енгилқўл дўхтири Исмоилжонни олиб, Чорсудаги дўконларига етиб бордим. Ўғиллари Козим ака билан ўтирган эканлар. Салом-аликдан сўнг нима гаплигини сўрадим.

– Э, нимасини айтасиз, – ўғли Козим акани кошида кўрсатиб гап бошладилар. – Мана буни соғ деб юрардим, ғирт жинни бўлиб қолибди. Фарғонага бориб, ишни битириб, Кўконга қайтиб келаётсак, Олтиариқда бизни бир “Жигули” кувиб ўтди. Козим орқасидан кувди. Йўлда мелисага ҳам, бошқасига ҳам қарамайди. Кувиб бориб, Кўкондан ҳам, Яйпандан ҳам, Пунгондан ҳам ўтиб, охири Қамчик довонига якин жойда етвoldи. Козим уни кувиб ўтаётиб, машинасининг ойнасидан: “Ҳа, қалайсан энди, акаси?” деб қийқирди. Кейин машинани орқага буриб, таққа тўхтаб қолди.

“Ҳа энди бир шўхлик қилибди-да, дарров жиннига чиқарманг”, десам, “Уни дарров оқламасдан, гапнинг давомини эшитинг”, дедилар:

– Нимага тўхтаб қолдинг, кетдик Кўконга, десам, у пинак бузмасдан туриб, “Яна бирорта “пойгачи” ўтиб колар, у билан бир кувалашиб, балки Наманғон тарафларният кўриб келармиз”, – дейди. Ана энди айтинг, бу жиннилик бўлмай нима?

Лақабли дўстлар

Водилда дам олаётган эдим, Махмуд Ҳошимов бошлиқ дўстларим кўргани боришиди. Шу ҳикоя баҳона, уларнинг лақабларини ҳам бир эълон қилиб қўйяй: Носиржон – Акула, Хабибжонники Осмон, Сойиб Али – Қовун, иккинчи лақаби Пакана, Мухтор – Вагранка, Рашидхон – Родриго, Мансур Абдулла – Шалок, Махмуд Умар – Яго, Қаюм Ёркин – Чалпак, иккинчи лақаби Туя, Шухрат Қодир – Ялангтўш, Марат Азим – Қўчқор, Баҳодир Отажон – Сурнай, Маъмур Абдулло – Мишел, Эркин – Сапог. Ҳа, дарвоке, бу лақабларнинг кўпини Махмуджон қўйган. Баъзилар уни “Кларнет” дерди, Махмуджон ҳақиқий лақабни Водилда ортириди.

Алкисса, юқоридаги дўстларим келаётиб, у-бу нарса харид килишмоқчи бўлса, Махмуд уларни Кўкон, Фарғонада ҳам тўхтатмай олиб келибди, охири Водил бозоридан харажат қилишибди. Сизга ёлғон, Худога чин: олган шафтолилари қантак ўрикдан кичик, олмалари гилосдек, бошқа нарсалар ҳам бундан тузук эмас. Бу ҳам етмагандек хонамга қўйилган совутгичдаги нарсаларни еб-ичиб битиришди.

Хайрлашаётиб олиб келган мева-чеваларини қайтариб бердим. “Биз буларни сенга олганмиз”, дейишган эди, “Менга олсанг, мундай, караб олмайсанларми?”, деб тумтайдим.

– Ҳа, энди олиб колавер, ҳамшираларга берарсан, – деб чимирилди Махмуд.

– Бу ердаги ҳамшираларнинг ҳам кўзи тўқ, бунақа нарсаларни назарга илишмайди, сенга ўхшаган паст эмас, – дейишимни биламан, бошқалар: “Ана, зўр лақаб энди топилди”, – деб қувонишиди. Мухтор Махмудга “Айтмовдимми бир кори-хол бўлади”, деса, Махмуд ҳам бўш келмай “Эртадан кейин

баманирок ўртоклар билан келаман, Шохимардонга олиб бориб, ҳаммангга ош қилиб бераман, мендан “паст” деган бу лакабни олиб ташлайсизлар”, деди. Табиатан сахий, мард Маҳмудга бу лакаб албатта номаъқул-да.

Ўшандан кейин Маҳмуднинг бир неча марта ошини едик, ҳар сафар: “Яхшиrok лакаб ахтаряпмиз, ҳозирча тополганимиз йўқ”, деб навбатдаги ошнинг илинжида тамшаниб тураверамиз.

Гугурт ўчоқнинг бошида

Шоир Анвар Юнус Раънохонга янги уйланган пайтда Кўкон мебель фабрикасида муҳандис эди. Аста-секин, иш баҳона, уйга кеч келадиган одат чиқарибди (ҳозир ҳам бу феъли кетганича йўқ).

Бир куни Раънохон эрини пойлашга қарор килиб, унинг пиджаги ва телпагини кийиб, Фуркат боғидаги скамейкада кунишиб ўтираверибди, зоро, Анваржон ҳар куни шу ердан ўтади, уйи ҳам ўша ерга яқин.

Алкисса, Анваржон кўринибди. Буфетга кириб, папкани ёнига қўйиб, икки кружка пивони майдабди. Ташкарига чиққач, чеккиси келиб, “Казбек” папиросини лабига кистирибди-да, йўл-йўлакай ўткинчилардан гугурт сўрай бошлабди. Ҳеч кимда йўқ. Яна йўлида давом этиб, скамейкада ўтирган “йигит”га якинлашиб: “Гугурт йўқми, оғайни?”, деб сўраса, хотини нима максадда ўтиргани эсидан чиқиб, дебди:

– Менда гугурт нима килади, гугурт ўчоқнинг бошида туришини биласиз-ку, дадаси!

Мени есин, ўша Есин

Турғунлик йилларида 1-синф ўқувчилари-ю боғча болаларигача пахта теримига мажбурий сафарбар этиларди. Сафарбарликни текширишга вилоят партия қўмитасининг иккинчи котиби Есин келишини эшигтан 10-мактаб директори, маҳаллий шоир Турсун Қамбар бошланғич синф ўқитувчиси Ўринбой домлага буюрибди:

– Пахта теримига тезлик билан биринчи синфни ҳам олиб чиқинг, обкомнинг иккинчи котиби Есин келяпти.

– Нима бўлса ҳам гўдакларни пахтага олиб чиқмайман, – дебди асабийлашиб Ўринбой домла. – Майли, мени партиядан ўчирсан! Майли, мени есин ўша Есин!

Турсун Қамбар ўқитувчининг яп-янги “кофияси”га ҳasad аралаш тасаннолар айтиб, жимгина колаверибди...

Хижолатга ўрин иўқ

Жазирама саратон. Катта Фарғона канали бошлиғи Эшон ака, унинг бош муҳандиси Кузма ва Наймансој бошлиғи Холбўри бува сойда мирикиб чўмилишибди. Ёш муҳандис Жўракўзи уларга хизматда.

Эшон акада тарвакайлаган гавда, вазнлари 150 килодан тепада, сўлкиллаган катта кориндан пастини кўриш хукукидан аллақачон маҳрум бўлганлар. Сув ниҳоятда тез экан, бир вакт Эшон аканинг лозимини эгнидан ечиб, оқизиб кетибди. У кишининг сувда музтарланиб турганини кўрган ҳазилкаш Холбўри бува “тасалли” берибди:

– Хижолат бўлмай чиқаверинг, Эшон, корнингиз тиззангизгача тўсиб турибди. Ҳеч нарса

кўринмаяпти-ку деса: – Ие, кара тузукрок, кўриб қолсанг, мендан салом айт, дермишлар.

Синглиси ўйқми?

Муртазо ва Мўминмирзо ўтиришларимизнинг файзи. Иккаласи жуда қалин, бири йўқ бўлса, иккинчисидан, “Ўртоғингиз қани?”, деб албатта сўраймиз.

Муртазо бир куни улфатларга мактаниб қолди:

– Мен бир таннозга илакишиб қолдим. Уни ишхонада хотинимга ҳам танишириб: “Бир ишлатиб кўрингчи, иш юритувчиликка ярармикан?”, – дедим. Хотиним доимо айтганимнинг тескарисини қилишини билганим учун гоҳо ходимани ёмонлаб, “Ановининг диди пастга ўхшайди, банк ҳужжатларини чалкаштириб юборяпти, цехда тартиб қолмаяпти”, деб қўяман.

– Бекорчи гапни айтибсиз, – деб унинг тарафи ни ола бошлайди хотиним. – Бинойидек ишляяпти, диди ҳам баланд, ишга ҳам жуда астойдил.

Муртазо бу гапини эшлитиб, “Хотинингиз ниҳоятда содда, жуда жаннати экан, бизбоп синглиси ўйқми”, деб ҳазиллашди. Бунга жавобан икки хотинли Мўминмирзо бирдан хушёр тортибди:

– Бўлганда ўзимдан ортмасди!

Toҳирнинг мижоз оши

Багдод туманида Тоҳир деган ажойиб дўстимиз бор, моҳир фото-журналист. Кунлардан бирида унинг олдига Қаҳрамон деган дўсти келиб, ҳасрат қилибди:

– Сен билан ёшлиқдан тепишиб ўстанмиз, дўстим. Сенга эркалашга ҳаддим сиғади. Мазам кочиб, дўхтир менга бир дори ёзиб берган эди, то-

пилмас матоҳ экан. Обрўли одамсан, бир оғиз айтсанг, сенга дархол топиб беришади...

Тоҳир дорихона мудири бўлган дўстига қўнғирок килиб, шу дорини топиб беришини сўрабди. Дўсти эртасига топиб беришни ваъда қилибди. Дорихоначи Тоҳирга ваъдани берибди-ю танишлар орасида гапни кўпайтирибди:

– Тоҳир мендан бир дори сўради. Агар бу дорини ичмаса, хотини кетиб колиши ҳеч гап эмасмиш.

Тоҳирнинг якин ўртоқлари унга телефон қилиб, бир-бир қўнгил сўрашибди: “Сен жуда зўр дори топибсан деб эшитдик, бизга хам топиб бер”. Охири Тоҳирнинг токати ток бўлиб, ўша дори ҳакида суриштиришга тушибди. Мижози сустларга берила-диган дори эканлигини билгач, Сариккўрғонда катта ош қилиб, ҳамма дўстларини чакирибди. Бўлган воеани айтиб, бу гапларга чек кўйишларини сўрабди. Бироқ оғизга элак тутиб бўлмас деганларидек:

– Кеча нега ошга бормадинг? – деб сўрабди бир дўсти бошқасидан

– Қанака ош?

– Тоҳирнинг мижоз ошигада.

Шиша ичидаги қудрат

Учарик туманининг ижроқўм раиси Ж.Тўракуловга райком биринчи котиби Вали Ҳамроев ҳасрат қилиб колди:

– Мана дўстим, узок йиллар бирга ишладик, қадрдон бўлиб колдик, аммо энди айриладиганга ўхшаймиз, эртага обком бюросида Ашур Ҳайдаров мени ишдан олмоқчи экан, хов ҳалиги иш бўйича...

– Э, кўйинг-э, туппа-тузук ишлаб турибсиз-ку ахир.

– Ҳа, нимасини айтасиз. Республика раҳбари бир

келганларида, “иккаланг бир извошнинг икки оти”, деган эдилар. Бу гапни Ашур Ҳайдаров билмайдида. Энди нима килсам экан? Ўзингиз каттага бир қўнгирок киласизми? Менинг қўнгирок килишим нокулай.

– Ҳозир ярим кеча бўлса, қандай бўлар экан?

Иккаласи бу борада бир оз ғижиллашиб ҳам олишибди. Кейин улар райкомнинг пастки хонасига кириб, икки юз граммдан тортиб ҳам олишибди. Нихоят, ҳалигининг кучи билан Жуман ака Вали Ҳамроевни бир амаллаб республика раҳбарига телефон килдирибди. Бир соат ўтар-ўтмас вилоятдан бюро бўлмаслиги маълум қилинибди.

– Ана кўрдингизми, ўртоқ Валижонбой, – дебди Жуман ака, – икки юз граммнинг қудрати билан яна тўрт йил райкомлик киладиган бўлдингиз, – дермиш.

Fурур

Кунлардан бирида ишга бориш учун машина кутиб турган эдим, Калинин совхози директори Машетяннинг машинаси келиб тўхтади.

– Папирос борми? – деб сўради – Машетян.

Мен чекмаслигимни айтдим.

– Чиқ машинага.

Йўлда давом этдик. 400–500 метр нарида Урайим акалар турган жойга бориб, яна папирос сўради. Улар ҳам чекмасликларини билдиришди. Машина яна катта тезлик билан юриб кетди. Санам деган кишлоқда Маҳмуд акага рўбарў келдик.

– Чекиши борми?

– Чекмайман.

– Жупурук экансан-у! – деганича совхоз марказигача бир сўз айтмай бориб, хонасига кириб кетди.

Шу-шу Маҳмуд ака “Беломор-канал”ни гугур-

ти билан олиб юрадиган бўлди. Бу папирос курғур вакт ўтиши билан сарғайиб кетса, алмаштириб олади, гоҳида, “директор зора сўраб колса”, деб на мойишкорона лабига қистириб ҳам олар эди. Бирок, кани энди Машетян папирос сўраса...

Баъзан каминадан:

- Нима қилай, папирос сўрамаябди-ку, – деб қўяди.
- Олиб юраверинг, бир кун сўрамаса, бириси кун сўраб колар, – деб қўяман мийиғимдаги кулгини ундан яшириб.

Котиба

Вобкент райкоми биринчи котиби Фозилжон содалиги билан ажралиб туар эди. Кунлардан бирида қўшни районнинг биринчи котиби Курбонжонга туш пайтида телефон килиб нима қилиб ўтирганини сўрабди.

– Нима қилардим – дея бир ҳазиллашгиси келди Курбонжон ака, – ҳамма райком нима қилса, шуни киламиш-да.

– Тушунмадим – ҳайрон бўлибди Фозил.

– Учинчи секретарни партия нимага берган? Майшат қилсин, бошқаларга кўз олайтирмасин деб партия шу карорга келган, – деб турубкани қўйиди.

Кейин яна бир ўртоғи Баҳодирга телефон қилдирибди. Баҳодир ҳам, худди келишиб олишгандек, Фозилга Қурбонали айтган гапни такрорлабди.

– Ие, бу канакаси? – дебди Фозил. Партия рапари ҳар бир ишда, айникса, ахлоқда бошқаларга намуна бўлиши керак-ку, сизларнинг килиб ўтирган ишингизни каранг-а!

Фозил ҳамкасларини терғашга терғабди-ю не гадир уларга хаваси келибди. ~~“Роҳдоми ҳам бу пар~~

тиянинг қароримикан, мен бехабар эканман-да деб, котибани хонасига чакиртирибди. Котиба кириши билан ўпмокчи бўлган экан, қулоғининг тагига бир шапати ебди.

Маслаҳат берган ўртоқларига телефон килиб:

Шапати ҳам еб турасизларми? – деб сўрармиш.

Гоғиллик

Дўстим Анваржон Дадабоев бир ўтиришда асли исми Аҳмаджон бўлган қадрдонимиз Опоч ҳакида сўраб колди:

- Опоч қалай юрибди? Ҳеч кўрмайман.
- Ие, хабаринг йўкми? Якин икки ой бўлди, оламдан ўтди.
- Одам-подам эмас экансан, – деди Анваржон хафа бўлиб, – хабар бериб кўйишга ярамадингми?

Эртаси куни у хотини Ўлмасхонни етаклаб, фотихага борибди. Эшикни тақиллатган экан, Опочнинг ўғли Ойбек чиқибди. Анваржон уни қучоклаб: “Faflat курсин, ўғлим, бехабар қолибман”, деб йиғлашни бошлаган экан, ичкаридан Опоч чиқиб келиб:

– Ҳов, нимадан бехабар қолибсан? – деб сўрабди. Анваржон бир зум карахт бўлиб турибди-ю ўзини йўкотмай, жавоб килибди:

- Тириклигингдан бехабар қолибман, тириклигингдан!

Қилич зиёрати

Менинг қилич ва пичоққа муккамдан кетганлигимни яхши билган Опоч бир куни уйига тақлиф этиб, янги қиличини кўз-кўз қилди. Гап йўқ, яхши қилич экан, дедим. Ҳавасим ҳам келди.

Опочнинг бирдан жаги очилиб, бу қилични унга дўсти Баҳодир совға қилганини, отаси жуда обрўли, бадавлат одам эканлигини, фермасидаги сон-саноқсиз товукларнинг зоти ўта тозалигини, чорва хайвонлари сонини ўзи ҳам билмаслигини, бу қилич аслида катта бир раҳбардан мерос колганини айтишга тушди. Агар зарур ишим борлигини айтмасам, яна 3–4 соат мақтаниши турган гап эди.

Орадан бир қанча вакт ўтгач, Опоч мендан маслаҳат ва ёрдам сўраб келиб колди. Мъалум бўлдики, Баҳодир унинг ақлини ўғирлаб, устакорлик қилиб, ўн минг кўқидан олган экан.

Хозир пичоқ ва қиличга ишқибозларни Опочнинг уйига, ўта ноёб қилични зиёрат қилишга юбориб турибман.

Ўғрилик бўлмайди

Қўқон нон комбинати директори Олимкул Мавлонкулов одатда ҳар бир мажлисни насиҳат билан бошлар эди:

– Ўғрилик қилиб, ўзингизга гуноҳ ортируманглар, ҳалол ишласангиз, тирикчилик хурсандчиликда ўтаверади.

Бир сафар у, одатга хилоф равишда, мажлисни бошка мавзуга буриб, май байрамини муносиб тарзда, яхши кайфият билан ўтказиш ҳакида сўзлади. Одамлардан бу борада фикр сўрамокчи бўлиб: – “Хўш, бу гапга нима дейсиз Тиллабой ака?” – деди. Урганжибоғли. Тиллабой ака пинакка кетган экан, исми тилга олинганда чўчиб уйғониб:

– Энди ўғрилик бўлмайди, хўжайин, ҳалол ишлаймиз! – дебди.

Ана кулги-ю мана кулги!

Тутхўрлик

Машхур кизикчи Муҳиддин Дарвешнигига кўконлик улфатлари Неъматжон, Жўрахон, Акрамжон, Муҳиддин хофизлар ташриф буюришиди. Бир пиёла чойдан сўнг максадга кўчишиди:

– Биз сизни кўриш баҳонасида бир тутхўрлик қилиб кетмокчи эдик. Ҳовлингизнинг оркасидаги марвартак жуда зўр-да.

Шунда Муҳиддин кизик бош қашиб:

– Бемалол эди-ю пиллачилар ҳамманинг тути қаторида меникини ҳам кесиб кетишиди. Факат ўзларингиз танийдиган анови зоотехник Алексейникига тегишмади холос. Ўшаники кесилмаган, ўшаникидан енглар, дермиш...

Баҳодирнинг оши

Чархин кўпприклик Баҳодир гузар чойхонасида ош дамлаб турган эди, артист ошнаси Азимjon келиб колди.

– Ҳа, Баҳодир, хорма. Ой каёқдан чиқди, ош дамлаб қолибсан?

– Ҳа, шу, бирин-кетин иккита набира кўрдим.

Азимjon Баҳодирнинг лақаби ит эканига лисандада килиб, гап учирди:

– Жуда соз бўпти-да. Эркагидан бўлса, менга ҳам биттасини бергин.

Суннат тўйи

Абдумалик Фиёсов деган дўстимиз хонадонида суннат тўйи базми авжида. Даврани камина бошкармоқда. Шу аснода Фарғонадан Раҳмонжон Сафаров икки нафар ўртоғи билан келиб колишиди. Бир оз тамадди килиб олишгач, сўзни унга бердим. Раҳмонжон микрофонни кўлга олиб, дил сўзларини баён этди ва охирида деди:

– Бу икки ёш кўша каришсин, бахтли-саодатли бўлишсин. Сиз, дўстим Абдумалик, янаги йилга на-бира кўриб, яна тўйлар қилинг. Куда томонни ҳам биламиз, у киши ҳам ажойиб инсон...

Шунда унга якин келиб, қулоғига секин шивирладим:

– Бу – суннат тўйи.

Раҳмонжон менга караб, кўлидаги микрофон эсида йўқ,

– Нега манга айтмадинг, – деди.

– Таклифномада, Мансурдан сўрагин, деган жоий борми, – десам.

– Энди нима қилай? – деди.

– Энди жойингга бориб, бир стаканда тўлатиб, заҳарингга ичиб, қизилча бўлиб ўтиравер. – деб ўртани давом эттиравердим.

Энг яқин дўст

Яқинда Раҳмонжон Сафаров билан тўйдан чикиб келаётib бир йигитни учратиб колдик. Раҳмонжон у билан қуюқ сўрашиб, менга: “Бу йигитни танийсизми? Бу Абдурасулнинг ўғли. Дадаси билан бир кўрпада тепишиб катта бўлганмиз. Ҳа, шунака ажойиб дўстим бор-да”, деб мактаб, сўнг йигитга юзланиб: “Даданга салом айт, онанг билан бизникига бир келишсин”, дея тайинлади.

Шунда йигит ерга караб, бир оз сукут қилди-да, гамгин охангда деди:

– Амаки, дадамнинг ўтганларига икки йилдан ошди...

Йўллар

Рахмонжон Сафаров Ёзёвон чорраҳасида турган эди, бир йўловчи машинасини тўхтатиб, “Коммунизм” колхозини суриштириди:

– Коммунизмга кандай борса бўлади?

– Ҳозир тўғрига юриб, Ленин йўлидан Социализмга ўтасиз, кейин чапга бурилиб, Жанжал билан борсангиз, Коммунизмга чиқасиз-қўясиз.

Тухмат

Фарғона обкомида катта йиғилиш. Мажлис охирлаганда Фахриддин ака Шамсиддиновнинг олдига Фарғона шаҳар партия қўмитаси котиби Мирзакарим Умаров келиб, бир нарсалар деб шивирлади. Шамсиддинов дарҳол эълон қилди:

– Мажлис тамом. Туман раҳбарлари ва бюро аъзолари колсин, бошқаларга жавоб.

Сўнг бир имо қилган эди, ёрдамчиси Фарғона марказий бозори бозоркуми Маҳсим акани бошлаб кирди. Фахриддин ака у кишига енгилгина танбех берди:

– Фарғона катта даргоҳ, бу ерга ҳатто чет эллардан туристлар келади, бозорга киради. Сиз, Маҳсим ака, ҳурматли одамсиз. Эшитишимга қараганда, бозорда шалок сўзлар билан сўкинар эмишсиз, бу эскичасига ҳам, янгичасига ҳам тўғри келмайди.

Маҳсим ака буни эшитиб, миш-мишни рад килишга уринди:

– Бу тухмат! Сизга қандайдир хотинчалиш

аблаҳлар нотўғри ахборот беришибди. Бунақа фалонфурушларнинг гапига ишонманг... Хе, онасини ўшаларнинг... тухматчиларни, – деганда ўтирганлар ханг-манг бўлиб колаверибди.

Қамоқнинг ишиқбози

Олдинги даврлар. Ташкилотларга масъул вакиллар тайинлаш авжига чиккан пайт. Халқ назорати кўмитаси раиси Фарид Мамин Урганжибоғ чорвасига вакил этиб тайинланибди. Чорвачилик фермасига Сатторали Қаюмов мудир эди. Вакилнинг масъулияти оғир бўлиб, сут топшириш даражаси пасайиб кетса, у жавоб берар эди. Хуллас, янги йил арафасида кўрсаткич 27 литрга пасайиб кетибди. Мамин ферма мудирининг ёқасидан олиб, сени қаматаман, деб дағдаға килибди. Сатторали aka ҳам тўлиб турган экан, Фарид акага ёпишиб олибди:

– Э, бормисиз, aka, айни муддао гапни айтдингиз, бир ойдан бери уйга боролмасам, бола-чакамни кўролмасам, умрим молхонада, гўнг ичида ўтса, газет ўкиёлмасам, кино-театр, телевизор деган нарсалар эсимдан чикиб кетган бўлса... Жон aka, ўша айтган жойингизга тезрок юборинг, эшлишишмча, у ерда вактида овкат берилармиш, вактида ухлармиш. Ўша ёкка хозирок жўнатинг, бир акалик қилинг.

Мамин кетмокчи бўлса, машинасига чикиб ўтириб олибди, уни ҳеч пастга тушириб бўлмасмиш. Фарид aka охири мени ёрдамга чакиртирди. Бориб, мудирни алдаб-сулдаб уйига жўнатиб юбордим.

Фарид aka ўзига келгач, менга қизариб-бўзарип:

– Мени қайтиб шу фермага юборадиган бўлсангизлар, аризамни ёзиб, ишдан бўшаганим бўлсин-е! – деб юборса бўладими? Уни бошқа фермага юбордик.

Эски таниш

Комсомол билетларини алмаштириш хакида қарор чиқди. Мен ўша пайтда район партия қўмитасининг ташкилий бўлими мудириман. Ўз КП МК масъул ходими Бойко келиб, туманимизда бу ишнинг боришини текшира бошлади. У килдан кийик қидириб, қандайдир камчилик топган бўлди, бу хакда тушунтирув хати ёзиб, имзо қўйиб бе-расизлар, деб оёқ тираб туриб олди. Камчиликни тўғрилаймиз десак, на районом котиби Ниёзовнинг, на менинг гапимизга кўнади.

Мен охири унга обкомда бирга ишлаган давримизни эслатиб, “Сен хато қилмаганмисан? Масалан, бир кун хизмат сафарида бўлиб, уни уч кунлик килиб расмийлаштиришни илтимос килиб ялинган сен эмасмидинг?” – дедим. Бойко бир гезарди-ю, “тфу” деганича бадар кетди. Окибати нима бўларкин десак, эртаси вилоят бюросида “Бу иш Фрунзе районида яхши йўлга кўйилган”, деб хисобот берди.

Қаранг-а, бир-бирингнинг эски сирларингни билганинг ҳам гоҳо фойда бериб коларкан.

Ўсишининг меъёри

Собик Иттифоки раҳбари Л.Брежнев Тошкентга келганида, кутиб олувчилар каторида бўйи икки метрдан баланд, басавлат Акрам Рустамович Хўжаевга кўзи тушиб. Шароф Рашидовдан унинг кимлигини сўраб қолибди.

– Ҳукумат раисининг ўринбосари, – деб жавоб берибди Рашидов. Брежнев Акрам Рустамовичнинг олдига келиб, кўлини чўзиб, бир амаллаб унинг елкасига коқиб.

“ – Расти, дарагой, расти. Но учти, выше партии

не расти!” – дебди. Шунда ҳозиржавоб Акрам ака, – “Ладно, Леонид Ильич, ваше просьба постараюс исполнять, – деганда, Брежнев, Шароф Рашидов хохолаб кулиб юборишиди.

Мени тинч қўйинглар

Ўзбекистон халқ шоири Охунжон Ҳаким бир маҳаллар “Кизил Ўзбекистон” (ҳозирги “Ўзбекистон овози”) газетасининг мухбири эди. Ҳозирги Данғара туманига болалар боғчалари фаолияти ҳакида мақола ёзиш учун келиб қолди. Биз у кишига райком котибаси Фозилова ҳамда ижроия қўмитаси раиси муовини Назаровни ҳамроҳ килдик. Улардан сўраб билсак, мухбир “бу стаканнинг лаби учган, меню унака, болаларнинг кийиниши мунака, ўйинчоклар кам” каби айблар қўйиб, райондаги ўнтадан ортиқ боғчанинг барини ёмонга чикарибди. Вакиллар уни бир пиёла чойга таклиф килишса, рад этармиш. Бу ҳақда менга хабар беришди.

Карасам, бўлмайдиган, Телминдаги боғчага етиб бориб, мухбир билан учрашдим. Сездимки, максади фельетон килиш. Унга ётиғи билан гапириб, булар бир-икки кунда ўнгласа бўладиган, арзимас камчиликлар, сал мухлат беринг, тузатамиз, десам, кўнмай, икки оёғини бир этикка тикиб туриб олди. Шунда ўзбекона такаллуфларни қўллаб, уни бир пиёла чойга таклиф килдим. У: “Чойни ўзларинг ичаверинглар, бунака ўтиришларга вактим йўқ”, деб ўдагайлади. Коним қайнаб кетди. Бир таваккал килайчи деб: – Дастурхондан юз бурадиган меҳмон ҳам одам бўптими, сенлар мени билмабсанлар, сендақангни нон емаслардан қанчасини Сирдарёга ташлаб юборганман, кутулиб, колганлариям қайтиб шу йўлдан Тошкентга ўтолмайдиган бўпқолган, – деганга ўхшаш пўписаларни қўллашга тушдим.

Охунжон бирдан довдираб колди, “мени тинч қўйинглар, ёзганларим сизга, мана”, деди-ю, кўлидаги дафтарни ташлаб, ғойиб бўлди. Кейин билсан, Фарғонадаги Йўлдош Сулаймон, Дониёр Эргашев, Алишер Ибодинов сингари касбдошларига мен ҳакимда гапириб: “Қаранглар-а, ўзирай ижроқўм раиси бўптуриб, ғирт бандит экан”, дермиш.

Ҳа, улуғ инсонлар, ана шунаقا содда, оқ кўнгил бўлишади.

Ўта ҳавфли таклиф

Камина Попда комсомол қўмитасининг котиби бўлиб ишлаган давримда, Фарғона вилояти (у даврда Поп Фарғона вилояти таркибида эди) комсомол қўмитаси биринчи котиби Рустам Алимов бошлиқ йигирма кишилик ҳайъат таълим-тарбия ишларининг ҳолатини текшириш учун туманимизга келди. Туман маориф бўлими раҳбарияти шаънига кўп дашномлар айтилди. Айникса, Чоркесардаги 35-мактаб фаолияти, у ердаги таълим-тарбия, комсомол ишлари ночор аҳволда эканлиги, тинимсиз ёзишмалар (бир-бирининг устидан ёзишлар) қаттиқ танқид остига олинди. Охирида Рустам Алимов: “Ишлар шунчалик ёмон экан, мактаб директорини алмаштирангиз бўлмайдими?” – деганда, маориф бўлими мудири Каримов: “Бу мактабда директор бўлиб кўрмаган одамнинг ўзи колгани йўқ-да, ўқитувчиларнинг баъзилари уч мартадан, колганлари икки мартадан директор бўлишган”, дей маълум килди. Алимов: “Ундей бўлса, бошка кишлодан директор топиб жўнатинг”, дейишини билади, Каримовнинг ранги ўчиб, деди:

– Бу жуда ҳавфли таклиф, ўртоқ Алимов. Бошка жойлик биттасини мажбур қилиб юборган эдик, уч кундан кейин ўзини осиб кўйса бўладими!

Алимов бир сапчиб тушди...
Хозир у мактабда директор борми-йўқми, аник
 билмайман...

Қамалиб ҳам қолайми?

Олтиарикнинг ўрами кўшни республиканинг ерлари билан чалама-чакки чатишиб кетган. Эски давр экан, кунларнинг бирида пахтачилик бўйича юқоридан комиссия келибди, кўшниларга қарашли пахта пайкалида сув кўллаб ётганини кўришгач, суриштириб ўтирумай, бригадирни машинага ўтқазиб, катта мажлисга олиб боришибди. Ўша пайтдаги райком котиби Маниёз Султонов кўпчилик айборлар қатори бегона бригадирни ҳам партиядан ўчириб юбориш таклифини киритибди.

Бечора бригадир қўл кўтариб, ўзини таништирмокчи бўлган экан, Маниёз Султонов:

– “Ўтир! Қилар ишни қилиб кўйиб, яна қўл ҳам кўтаради-я. Пахтани қўллатганинг учун хозир каматиб кўяйми?” – деб пўписа қилибди.

Бегона бригадир ўз районига бориб, бўлиб ўтган воқеани райкомига айтиб берибди. Райком: “Бошка жойданман, демадингми?” – деса, содда бригадир: – “Партиядан ўчириш-ди, энди қамалиб ҳам колайми”, – дер эмиш.

Неча фоиз?

Фарғона вилоят ҳокими ўринбосари Шухратжон паррандачилик ва баликчиликни ривожлантириш масаласида йиғилиш ўтказди. Орага кредит масаласи ҳам сукилди. Муҳаммадали сўз олиб:

“Мен “Матиз” билан “Дамас”имни гаровга қўйдим, аммо кредитни ҳали олганим йўқ”, – дейиши биланок Шухратжон тутакиб кетди:

– Ҳеч бўлмаса ўн фоиз “усти”ни берармикин деб умид килаётгандир-да?

Сўнг банк бошкарувчиси ўтирган томонга караб, дўқ урди:

– Ҳов, банкир, қани айт-чи, неча фоиз бериш керак?

Бошкарувчи каттик пинакка кетган экан, сеска-ниб ўрнидан турди-да, “Ўттиз фоиз”, – деб юборди. Залда кулги кўтарилди.

Энг таниқли зот

Бир замонлар Данғара туманига маориф вазирлигидан Винтовкин деган ходим келиб, коллегияда кўриладиган масала юзасидан текширув ўтказди. Маориф бўлими мудири Сатторали Ҳалилов, муовинлари Ғуломжон, Жўрабойлар куну тун бирга бўлишиб, меҳмоннинг оёғи остига кўйлар сўйилди, катта зиёфатлар уюштирилди.

Гал етиб, текширувчи Сирдарё сохилидаги Турсун Қамбар директорлик қиласидаги мактабда ҳам бўлди. Яна кўй сўйилиб, тўн кийгизилди. Мактаб коровулининг Шарик лақабли ити бор эди. У машҳур кинокомедиядаги итга ўхшаб, иргитилган нарсани югуриб бориб олиб келар эди. Ҳатто дарёга бехос юмалаб кетган арокли шишани ҳам олиб чиккан Шарик меҳмонни жуда қойил колдириди.

Кўп ўтмай маориф вазирлигига коллегия йиғилиши бўлиб, унга Саттор Ҳалилов таклиф килинди. У кайтиб келгач, мактаб директорларига таассуротларини сўзлаб берди. Шунда Турсун Қамбар:

– Винтовкинни роса хурсанд қилиб жўнатувдик, бизларни эслагандир-а? – деб сўраган эди, мудир шундай жавоб килди:

– Орамиздаги ҳеч бир зотнинг отини айтиб суриштирмади. Факат, кайтаётганимда: “Ну, как там Шарик?” – деб сўради, холос.

“Атказ” сўзи

Тошкентдаги катта театрда “Навоий” спектакли ўйналмоқда. Балҳда Дарвешали исён кўтаргач, вазир Мажиддин Ҳусайн Бойқарога маслаҳат бера бошлади:

– Исённи бостиришга Алишерни юборинг, илло Дарвешали унинг укаси. Шу йўл билангина бу ғавғодан кутуласиз. Агар “атказ” килса, бунда Алишернинг ҳам қўли борлиги аник бўлади.

Ўшанда анча ёш, ғўр эканман, агар бундан беш юз йил олдин ҳам “атказ” (отказ) сўзи ишлатилган бўлса, демак, Туркистонни босиб олгандан кейин руслар бу сўзимизни ўзлаштириб олган экан-да, деган ўйга бордим. Ё нотўғрими?

“Пожалиста”

Кадрдонимиз Собир аканинг дадаси Содиржон Очилдиев бир спектаклда темирчи ролини ўйналмоқда. Эпизодлардан бирида подшоҳ навкарлари унинг дўкони олдига келиб:

– Бу ердан Ниёз Ботир ўтдими? – деб сўрашади. Содиржон ака:

– Йўқ, ўтгани йўқ, – деб жавоб берганида, навкарлар:

– У факат шу йўлдан ўтиши мумкин. Балки уни дўконингга яшириб кўйгандирсан? Ҳозироқ тинтиб кўрамиз, – деб дағдага килишади.

Шунда кутилмаган воеа юз берди. Содиржон ака бу пўписага жавобан:

– “Тинтиб кўраверинглар, пажалиста”, – деганида, залдагилар у ёқда колиб, подшоҳнинг навкарлари ҳам котиб-котиб қула бошлашди.

Тўн синиб қолармиди

Кўп йиллар олдин Ёзёвонда райком саркотибининг эллик ёшлик юбилейи бўлиб, кўконлик машҳур ҳофизлар – Шерқўзиевларни олиб келишни мендан илтимос қилишди. Олиб бордим.

Давра гавжум, базми жамшид авжид. Хотамжон, Баҳромжон, Олимжонлар қўшиқ бошлаганига анча бўлди, бирок, кистир-кистирдан дарак йўқ. Бу ёғи музлаб кетди-ку, дегандек ҳофизлар менга мъюс боқиб, имо килишади. Мен уларнинг олдига бориб:

– “Фарғона тонг отгунча”ни бошланглар. Мен сал-пал жўр бўламан, тушган “якан” ўртада”, – дедим. Қўшиқни авж пардага кўтариб, қайси томонга карасам, ўша томондагилар гувиллаб келиб, кистиришаверди. Аёллар елкамга тўн-чорси ташлаб, бошимга дўппи кўндириб туришибди. Ҳофизларнинг оғзи кулоғида.

Тўй якунлангач, ярим тунда Кўконга қайтиб келдик. Ҳовлимиз олдида машинадан тушаётганимда ҳофизлар манзират қилиб, кийикка тугилган тўнни менга узатган бўлишди-ю кўнгил учун, “шу шартмикин”, дейишими биламан, тугунни қайта жойига кўйишиб, гойиб бўла қолишиди.

Икки кундан сўнг Рашидхон дўстимни кидаги тўйда ҳофизлар билан учрашиб колиб, совук кўришдим. Улар тунд муомаламдан хайрон бўлиб:

– “Ака, мабодо, биздан бирор гуноҳ ўтмадими?” – деб сўрашган эди, зарда билан жавоб килдим:

– Катта гуноҳ қилдиларинг. Ўтган куни тил учидা “шу шартмикин” десам, тугунни олиб кетавердиларинг.

– Ҳаммалари бирданига: – Ўзингиз олмадингиз-ку – дейишган эди:

– Олмасам, ҳовлимнинг деворидан ошириб ир-

ғитворсаларинг, нима, тўн синиб қолармиди?.. – деганим эсимда.

Уч ташхис

Кўқонлик уч машҳур шифокор Азизхон Алиев, Сайдуллохон, Шавкат Сотовлдиевлар гаплашиб туришган экан, бир одам ўрдак юриш килиб, оёқларини кериб, охиста келаётганига кўзлари тушди. Замонамиз лукмонлари ўша одамга ўзларича ташхис кўйишга тушишди. Бирининг фикрича, у радикулит, иккинчисининг айтишича, грижа, учинчи-си эса буйрак касали зўрикиши дея каромат килди. Бахс куруқ бўлмаслиги учун эллик минг сўмдан гаров ўйнашди. Ҳалиги одам якинлаптагач, унга куюқ салом бериб, хол сўрадилар ва гап асноси максадга кўчдилар:

- Ака, ўзи кандай дард билан оғригансиз?
- Э, сиз сўраманг, мен айтмай, дарди бедаво.
- Ҳар ҳолда, бедаво бўлса ҳам номи бордир?
- Нимага эди?

Замонамиз лукмонлари максадга ўтишди:

- Сизнинг дардингизга ўзимизча ташхис қўйиб, эллик мингдан гаров ўйнаган эдик...
- Ундай бўлса, учовингиз ҳам атаб қўйган эллик мингингизни менга бераверинглар, – деди “бемор”, – йўлда йўталим кистаб, иштонни жиндай ... қўйдим. Шунинг учун, ҳамма ёғимга ёйилиб кетмасин деб шу тарзда юриб келаётган эдим, укалар.

Замонамиз лукмонлари буриналарини жийириб, ёнларини тита бошладилар. “Бемор” эса, – бўла-колинглар, зўрға турибман, – дермиш...

Ким кўмилган?

Олтиариклик Набижоннинг Холмат деган оқсок бир амакиси бор. Кунлардан бирида у жияни билан қабристонни зиёрат килиб, якинда дафн этилган отасининг қабри устида тиловат килиб, роса йиғлабди. Сўнгра яна бир кичик қабр устига бориб, янада қаттикрок йиғлабди. Жияни ҳайрон бўлиб:

– Холмат ака, олдинги қабр-ку отамизники эди, кейингисини эслай олмадим, кимники эди? – деб сўраса, Холмат йиғи аралаш:

– Бунисига менинг чап оёғим кўмилган жиян, – дермиш.

Оқибатни синаш

Дўстим Шермухаммад Юсупов билан Бухорога борганимизда Ҳамро Маҳмудов деган одам билан таништириди. Танишиб, ўзаро ҳол-аҳвол сўрашганимиздан сўнг, Шермухаммад ўзича бир кулиб қўйди-да, Ҳамро Маҳмудовнинг Москвага, съездга делегат бўлиб борганидаги саргузаштини сўзлаб берди.

Делегатлар Москва меҳмонхонасида истиқомат қилишар экан. Кунлардан бирида Ҳамро Маҳмудов бир юмуш билан пастга тушиб, тўрт соат дараксиз кетибди. Шериклари хавотир олиб, қаватмакават қидира бошлишибди. Қаватлардан бирига чикиб боришса, Ҳамро ака эшиклардан бирини тақиллатаётган эмиш. Эшикни очган бир ўрисдан:

– Ҳамро Маҳмудов здес живёт, да? (Ҳамро Маҳмудов шу ерда яшайдими) – деб ўзини ўзи суриштиришни бошлаган экан, у кимса: “Ты уже третий раз спрашиваешь, ...твою мать! (Бу учинчи марта келиб сўрашинг, хе ўша сендақанги...)”, – деб ўшкириб берибди.

Шериклари хеч нарсанни кўрмагандек бориб:

– Бунча йўқ бўлиб кетдингиз, адашиб колдингизми, – деб сўрашса, Ҳамро ака сир бой бермай, гердайиб жавоб қилибди:

– Мендек одам адашиб қоларми? Қани, ахтаришармикин деб, сенларнинг оқибатингни бир синадим-да.

Кексаликнинг таърифи

Эркин Воҳидов таваллудининг етмиш йиллигида табриклар кўп бўлди. Ҳар хил гаплар айтилди. Нихоят юбияр ўзлари сўз олиб, шундай дедилар:

– Юбилей баҳонасида бизни ёшлар сафидан чикариб, кексалар сафига қўшмоқчи бўлишяпти. Йўқ, биродарлар, биз кексайганимиз йўқ. Фақат жисми ёшлар сафидан чикиб, кўнгли ёшлар сафига қўшилдик!

Бунака зўр гапни топиб айтиш, шеър ёзишдан ҳам кийинрок бўлса, ажабмас.

Фалокат оёқ остида

Эркин Воҳидов Данғарадаги I-мактабга учрашувга келди. Атрофдаги мактаблардан ҳам муҳлислар йиғилган. Савол-жавоб қизигандан қизиб кетди: “Қачондан бери ижод қиласиз?” “Нима учун ёшликда Тошкентта кетиб қолгансиз?” “Неча нафар фарзандингиз бор? Нечта китоб чоп қилдиргансиз?..”

Охиристонда юқори синф ўкувчиларидан бири:

– Турмуш ўртогингиз каерлик? – деб сўраган эди, шоир жилмайиб туриб, шундай жавоб қилди:

– Қаранг, фалокат оёқ остида деганлари тўғри экан, шундоқкина ўзимизнинг қўшни қизга уйланганман.

Кейингисида мен бораман

Уч-тўрт марта турмуш куриб ҳам тинчимаган ёзувчи дўстим Бокижон таникли шоир Анвар Обиджоннинг уйига келиб, “бир қизга уйланмоқчиман, унинг отаси фалончи тоға сизни жуда хурмат килади, ўзингиз совчи бўлинг”, деб қаттиқ илтимос килибди. Анваржон аввалига тўғрисини айтиб, “мен бунака ишнинг ўртасига тушолмайман”, демокчи бўлибди-ю йигитнинг кўнглини оғритгиси келмай, мулойимлик билан сўз котибди:

– Ҳозир ишларим жуда тифиз эди-я. Ҳа, бу неchanчи уйланишинг ўзи.

– Тўртинчиси, Анвар ака.

Ундай бўлса, бу сафарча Ахмаджон Мелибоев совчи бўлиб борақолсин. Майли, кейинги уйланишингизда мен бораман – дебди Анвар Обиджон.

Устоз – шогирд

Фарғонада Анвар Обиджон таваллудининг 60 йиллиги нишонланди. Эркин Воҳидов ҳам самимий дил сўзларини изҳор этиб, гапини: “Мухтарам устоз, яна бир бор табрикларимизни қабул қилгайсиз”, деб тутатди. Кўпчилик ҳайрон бўлиб қолган эди, Эркин аканинг ўзлари бунга изоҳ берган бўлдилар:

– Ҳа, Анваржон менга устоз қатори. Яқинда 5–6 янги шеъримни юрагим тошикиб, телефонда Анваржонга ўкиб бердим. У киши нима дедилар денг:

– Яхши, Эркин ака, шунака ёзаверсангиз, шоир бўлиб кетасиз...

Залда кулги кўтарилди.

У подшо бўлса

Олтиарикда Аҳмадхон Маматхонов деган раҳбар бўлар эди. Бир куни нима иш биландир у киши ҳамроҳлигига Повулғон томонга бордик. Бир жойга етганимизда, йўл четидаги пахта пайкалида азим бир чинор ағанаб ётганини кўрдик. Қанчадан-канча пахта кўчатлари пайхон бўлган. Маматхоновнинг жон-пони чикиб, машинадан тушди-да, ўша ерда ғимирлаб юрган беш-үн чоғли кишига ўшкира кетди:

– Бу нима қилганларинг? Катта йўл туриб, дарахтни пахтазор томонга ағдарасанларми?

Шунда одамлар орасидан бир киши олдинрокка чикиб, кошини керганича деди:

– Бакирганингиз билан фойдаси йўқ, хўжайн. Чинорни дараҳтларнинг подшоси дейишади. Подшо бўлгандан кейин, биздан сўраб ўтиармиди, хоҳлаган томонига ёнбошлайверади-да!

Ўн бешинчиси

Маҳалладошимиз Кўконбой ака оз эмас, кўп эмас, ўн тўрт марта уйланган. Бир куни эшитсак, ўн бешинчисини ҳам олибди. Унинг тез-тез уйланиб туриши бу депарадагиларга яхши маълум бўлгани учун, ҳеч бир аёл унга тегишга рози бўлмай, узокроқдан уйланибди. Кўконбой аканинг бу қилиғидан номус килган маҳалладошлар мени кисти-бастига олишибди:

– Бу жой ҳазилакам жой эмас, Кўконнинг Тўлабойи. Бу ерда не-не улуғ зотлар ўтмаган, не-не раҳбарлар чикмаган. Кўконбой аканинг хотинбозлиги маҳаллага иснод. Сизнинг гапингизни олади, кириб, насиҳат қилиб кўйсангиз, хотинбозликни тўхтатиб, шуниси билан тинчисин энди.

Эртаси куни маҳалла пешволаридан Норкӯзи ака, Раҳмонжон, Одилжон, Абдулатиф, Абдусамад ва Жўрахўжа акалар билан ҳовлисига кирсак, Қўконбой ака ашулани ванг қўйиб, ивирсираб юрган экан. Биз билан кўришиб, кулиб юборди. Биз:

- Жуда хурсандсиз, янгиси маъқул келиб колганга ўхшайди-а? – десак, хиринглаганича:
- Бугун жавобини бериб юборсамми деб турибман. Нега десангиз, бундан йигирма тўрт йил олдин ҳам шу хотинга уйланган эканман.

У ҳам билмайди

Тўлабойнинг Кўксой масканидаги чойхонада Икром деган чойхоначи бор. Бир куни Ғиёс сомсапаз унга гап котди:

- Анави Анвар отбокар чой ичиб, кўпинча пулни бермай чиқиб кетади. Сен буни билмайсан.
- Мен ҳам анойи эмасман, – дея жавоб қайтарди Икром. – Унга доим кайнамаган сувни эски шама устига қуйиб бераман. У ҳам билмайди, хумпар.

Эсон сўкогич

Учкўприк туманида Социализм деган колхоз бўларди, унинг раиси Эсон Мадраҳимовни Охунбобоев колхозига ўтказишиди. Олдинги ишлаган жойида кишлок хўжалиги ишлари қизиган паллаларда у деярли ҳар куни колхоз радиоузелидан гапиради. Йўл-йўлакай ўша колхоз оркали юриб қолганимизда, унинг гапи қулоғимизга чалиниб турарди. У гапирганда, қаерда эканлигини унутгандай, жуда эркин сўзлар, деярли ҳар бир жумладан сўнг “синглийни...” деб сўкиш қўшиб кетар, кулоги ўрганиб қолган колхоз ахли бунга парво килмасди.

Охунбобоев колхозига ўтгандан сўнг, тарки одат

амри маҳол дегандай, колхоз радиоузели оркали сўзга чикишда давом этибди:

– Ассалому алайкум, социализмликлар...

Радиоузелчи йигит унга секингина шиншибди:

– Раис бува, бу Охунбобоев колхози-ку.

Шунда раис бирдан хушёр тортиб, микрофон ёниклигини унутганича дебди:

– Вой, синглийни... Охунбобоев дейман деб, социализм деворибман. Ҳа, синглийни-я...

Томоқ оғригининг давоси

Томоғим оғриб юрган кунлар эди. Ўзимча доридармон килдим, тузук бўлавермади. Бир маросимда шахар касалхонаси бош врачи ўринбосари Баходиржон, машхур шифокорлардан бўлмиш Шавкат Солиев, Азизхон, Убайдуллохон, Тўлкинжон деган дўхтирик укахонлар билан бирга ўтириб колдик. Суҳбат асноси ўз дардимни айтдим. Улар: “Бўлди ака, дориси бор” дейишди ва чўнтакларидан муҳр урилган қоғозни олиб, ўзаро маслаҳатлашган холда бир нарса ёзиб беришди.

Ишхонага келгач, ҳайдовчимнинг қўлига ҳалиги қоғозни тутказиб, дорихонага жўнатдим. Кўп ўтмай ҳайдовчи ғалати кулимсираб кириб келди-да, буни бир ўкиб кўрмабсиз-ку, хўжайин, деб қоғозни қайтиб берди. Ўкиб кўрсам, қоғозга “Бу касалликнинг давоси, уч-тўрт кун жағни тийиб, гапирмаслик” деб ёзиб қўйилган экан.

Ленинга арз

Бухорога Шермуҳаммад Юсупов билан яна бир гал борганимизда, менга малла Саид деган кишини таништириди. Мълум бўлишича, илгари у катта “ёзувчи” ўтган экан. Унинг фаолияти билан кизикиб қолдим ва сұхбат асноси ҳаётидаги энг зўр “асар”и ҳакида сўзлаб беришини сўрадим.

– Бир анонимка ёзиб, барча идораларга ташладим, ҳеч натижа бўлмади, – дея салмоқланиб гап бошлади у. – Москвадаги катта идораларга ҳам юбордим, барибир натижа йўқ. Нихоят, яна бир нусха ёзиб, Лениннинг мавзолейига кирдим. Зиёратчилар қаторида ўтиб бораётиб, коғозни Лениннинг тобути устига ташладим. Сокчилар дарҳол мени кўлга олди, роса сўрок қилишди.

– Охири нима бўлди?

– Тирик арбоблар арзимга қулок солишмагач, ўлик бўлса ҳам, Ленинга арз қилишга мажбур бўлдим, – деган эдим, доҳийнинг ҳурмати баланд экан, мени, бор-йўғи, бир йилга қамашди холос.

Ҳозир келадилар

Термизга хизмат сафари билан борган эдим, Кўкондаги корхонамнинг коровули Ином шошилинч телефон қилиб қолди:

– Хўжайин, Тошкентдан комиссия келиб, электримизни узиб кўймокчи бўляпти, тез етиб келинг.

Унинг кўнглини тинчитмокчи бўлиб:

– Вахима килмай тур. Бораман, кейин улар билан ўзим гаплашаман, – десам, Термизнинг каердалигини ҳам билмайдиган содда коровул телефонни ўчирмасдан, текширувчиларга гапира бошлади:

– Бирпас ўтириб туринглар, хўжайин Термиздан келиб, масалани ҳозирок ҳал киладиган бўлдилар, – деса бўладими?

Шамолни тўхтатиши

Шу Иномнинг дастидан бир жойда хотиржам ўтириб бўлмайди. Тошкентдаги оромгоҳда дам олиб ётган пайтимда у яна телефон қилиб колди:

– Хўжайнин, Кўқонда каттиқ шамол бўляпти. Ишчилар “бундай шамолда ташқарида ишлаб бўлмайди”, – деб ишни тўхтатишмоқчи. Нима килай? Телефон шириллаб, овоз ёмон эшитилаётгани учун, гапни қиска килдим:

– Айт, тўхтатишсин!

Ином одати бўйича, телефонни ўчирмай, ишчи-ларга гапираётгани эшитилди:

– Хўжайниндан топшириқ келди. Шамолни тўхтатишсин, – дедилар...

Шунга-шунчами

Фарғонада иподром курилиши бўйича вилоят партия кўмитасининг иккинчи котиби Есин иштирокида мухокама бўлди. Барча катта-кичик раҳбарлар катнашдилар. Мухокама асносида Фарғона ирригация курилиш бошлиғи Носов:

– Ўрток Василий Павлович, бизда кадрлар етишмаяпди. Махсус таълим бошқармаси бошлиғи Бурхоновга бу хақда айтганман.

– Бурхонов ишдан бўшаб кетганига ўн йил бўлди-ку. – дея зарда аралаш сўкиб ташлади Есин ва қўшимча қилиб Бурхоновдан кейин Мухторов, ундан кейин Иброҳим Фозилов, хозир кейингиси ишляйбди-ку. Ҳе сени, деса.

– Кечирасиз, – деди Носов парвоси палак, – шунга шунчами? Ўша Бурхоновга айтган эканман-да, – деди.

– Вот мы с кем работаем, т-фу, дедида Есин иғилишини тамомлади.

Карим ГАИ

Ишга кетаётсам, Карим деган ГАИ ходими постда турган экан. Бир кулишиб олиш учун тўхтаб, “қани, пулдан чўз энди” дегандай ишора килсан, “Ака, постга эндигина келдим...” дейди.

Халфана палов

Аъзам Тўрахонов дала ҳовлисида меҳмондорчилик уюштириб, камина ва Раҳмон Сафаровни меҳмоннинг айтди. Бозор-ўчарни бирга қилди. Харражат учун пул чикарсан, пинагини бузмади. Дала ҳовлига яна бошка меҳмонлар ҳам чакирилган экан. Меҳмонлар мезбоннинг қўли очиқлигини мактадилар. Баъзилари: “Бугунги зиёфатнинг сабабини билолмай хижолатдамиз, агар туғилган кунлари бўлса, совға-повға олиб келган бўлармидик” деб хижолат тортаётган эдилар, мен уларга далда бердим:

– Беҳижолат олаверинглар, бу – халфана палов!

Қаламкашлиқ қувончи

Катта бир идоранинг бошлиғи Сайдулла Умаркулович каминани эрта билан соат 9:00 га чакирганлигини коллегия йиғилишидан кейин бошлигимиз Собир Эргашев айтиб колди. Айтилганидай, эрталабки тўққизда бориб, келганимни девонхонага маълум қилдим. Раҳбарнинг ёрдамчиси: “Хозир хўжайнинг феъллари айниб турибди, ҳатто чойнак отиш даражасига етиб бордилар”, деди. Мен: “Феъли билан нима ишим бор? Ўзи чакирирган, кириб маълум килинг”, дедим. У кириб чиқиб: “Кечкурун соат тўққизда келар экансиз”, деди. Кечки соат тўққизгача нима ҳам килардим. Тошкентда бошка зарур юмушим йўқ эди. Шу ту-

файли ёрдамчига яна бир кириб чиқишни илтимос килдим. У оғринибгина кирди-ю қайтиб чиқиб “Энди, кечаси соат ўн бирда кабул килар эканлар”, деди.

Мен янги нашрдан чиккан “Яшил олам тилсимлари” китобимни Сайдулла Умаркуловичга бериш учун олволган эдим, дастхат ёза бошладим:

“Мартаба берганда, феъл ҳам берса кенг.
Ақл-муруватдан жудо этмасин.
Багрикенг раҳбарлар кўп бўлсин, аммо,
Кичик каттапардан Ўзи асрасин”.

Дастхатни ёзив, ёрдамчига бердим ва топшириб қўйишни илтимос килиб, Қўконга қайтиб кетавердим.

Уч ой ўтгач, ўша раҳбар Фарғонага ташриф буюрди. У Фарғона ўрмон хўжалиги бошлиғи Рассоқовдан мени суриштирибди:

– Ҳалиги, бор-ку, Қўкон лесхози директори...

– Мансур Хўжаевми?

– Ҳа, ўша. Айтиб қўй, бугундан бошлаб уни Данғара туманига вакил килиб тайинлайман. Агар Данғаранинг пилла, дон, пахта бўйича режалари бажариласа, шеърларини ёзив юраверсин.

Бу гапни эшишиб, дағдаға ҳакида ўйламай, қаранг-а, шундай катта одам китобимни ўкибди-я, деб кувониб кетдим. Қаламкашликнинг ҳам зўр гашти бор-да!

Гўшт

Неъматжон Мадиёров Қўқон ИИБ бошлиғи эканлигига менга телефон қилиб колди:

- Ака, хабарингиз борми-йўқми, Акбаржон Азизовнинг мазаси кочиб колибди.
- Хабарим йўқ экан, яхши айтдингиз. Бугун кўриб қўяйлик, – дедим.

Ҳали тушлик килганимиз йўқ эди, беморнинг кўнглини хушлаб, бирга тамадди килармиз деб, бозордан кичик бир ўтиришга яраша у-бу масалликлар олдик. Уйига борсак, Акбаржон поликлиникага чикиб кетган экан. Мадиёровга: “Гўштни бермай қўявер, ўзимиз кабоб қилиб сўмиз”, деб имо қилиб, қўзимни қисдим. У алоҳида халтадаги гўштни оркасига яшириб, колган харажатни уй бекасига берди.

Эртаси куни Акбаржон менга телефон қиляпти:

- Ака, раҳмат, йўқлигимда кўргани келибсизлар. Дўхтир кўриб, дори-дармонлар ёзиб берди, лекин, минг шукурки, гўштга парҳез буюрмади.

Қаранг-а, гўштни уриб колаётганимизни хотини пайқаб турган экан.

Фотиҳачилар

Маиший хизмат комбинати бошлиғи Эътиборхоннинг онаси вафот этганини эшишиб, туманнинг мастьул раҳбарларидан бўлмиш Ниёзова, Фозилова, Ваҳобова, Дадажонова ва бир канча эркаклар фотиҳага бордик. Хотинлар одат бўйича уввос солиб йиғладилар. Эркаклар фотихани ўқиб, ташқарига чиқдик.

Машиналарга ўтираётиб, хотинлардан бири “Эътиборхоннинг ўzlари кўринмадилар-а?” – деб эслаб колди. Адашиб, бошка жойга кириб колга-

нимизни биз эркаклар аллақачон сезган бўлсак-да, хотинларнинг нотаниш мархумга айтиб-айтиб йиғ-лаганларини юзларига солмадик.

Палов умидида

Тошкентдан таникли олим, “Семашко” сиҳатго-хининг бошлиғи Анис Лутфуллаевич Алавия оила аъзолари билан келиши шарафига Поп туманига карашли Чодакда зиёфат уюштирдик. Мехмоннинг истагига биноан бостирма овқат тайёрланди.

Тошкентдан келган бошқа бир гурӯҳ меҳмонлар хам бор эди, улар палов қилишга урина бошлашди. Бизнинг бостирма олдинрок тайёр бўлгани учун Анис ака: “Анави меҳмонларга битта товокни тўлдириб солиб берайлик”, деди. “Унда, овқат ўзимизга камлик қилиб қолади-да”, десам, “ош қилиш япти-ку, улар хам бир товок беради-да” деди.

Бир товок бостирмани бериб юбориб, унинг паловга айланиб қайтишини анча кутдик, аммо дарак бўлавермади. Кейин суринтириб кўрсак, меҳмонлар биз берган бостирмани еб, жуда тўйиб кетдик, энди палов сиғмайди, деб харажатларини машинага босганича жўнаб кетишган экан.

Ҳамма жойда мезбонмиз

Водийлик ўрмончилар – камина, Фарғона ўрмон хўжалиги раҳбари Муҳаммадали, Сирдарё ўрмончилигининг сардори Эшонкул, Жиззахдан Санокул, Самарқанддан Ҳусанбой, водий бўйича нозир Валижонлар хизмат юзасидан Тошкентга бордик. Тадбир тугагач, ўрмончиллик кўмитасида ишлайдиган бир-иккита муовин, баъзи бўлим бошликлари “сизларга кўп меҳмон бўлганмиз, вақтларинг бўлса, бизнинг чойимиздан хам ичинглар”, деб колишли.

“Ўзбекистон” ресторанида куюқ овқатландик. Ҳисоб-китобга навбат етиб, официант йириккина суммани айтди. Мезбонлар бирин-кетин чўнтақ кавлагандек бўлишди-ю бири рўмолча чиқариб, юзини артди, бири сигарет тутатди. Биз ўзаро кўз кисишиб, жим ўтиравердик. Официантнинг токати ток бўлиб, бир томок кирди, ҳеч гап йўқ. Назаримда бутун ресторан бизга қараб тургандай. Шунда шерикларимга айтдим;

– Узокдан келган бўлсак ҳам, бу ерда ҳам барibir, биз мезбонмиз...

Узокдан келган “мезбонлар”га қўшилиб шу ерда яшовчи “мехмонлар” ҳам кулиб юборишиди.

Бизгачи?

Бувайда райкоми бюросида биринчи котиб Мақсудали Ҳайдаров ғўзаларга ишлов беришнинг ахволи чатоклигидан куюниб, текширувда ёмон баҳо олган олтита колхознинг раислари-га “хайфсан” эълон кила бошлабди. Машхур раислардан бири Эшон ака пинакка кетган экан, орада кўзини очиб, ёнидагилардан нима гаплар бўлаётганини суриштирибди. Унинг бикинида ўтирган касбдоши Эсон Мадраҳимовнинг шумлиги тутиб: “Райком ҳозиргина олтита колхозга қўшимча ўғит ажратиб берди, колхозингизнинг номи чикмади” дебди. Буни эшитган Эшон ака қўлинни кўтарганича ўрнидан туриб, котибга сўз котибди:

– Бизга-чи бизга, биз курук колаверамизми, Мақсудали Ҳайдарович! – деганда ҳамма бакрайиб колибди.

Ҳашаротхўрлик

Бир замонлар ёзги таътил пайтида Сойибжон Алиев, Махмуджон Ҳошимов, Рашидхон Аҳмедов, Муҳаммаджон Ақбаров, Ҳабибжон Ҳожиматов, Анвар Ашурев, Тўлқин Эргашевлар билан бирга Саричелак оромгоҳида дам олдим. Биринчи кунданок улфатбозлик авжга минди. Улфатбозлика эса нималар бўлмайди дейсиз?

Бир ўтиришда Сойибжоннинг қадаҳига чигиртка тушиб қолди. Шаробни тўкиб юбормокчи бўлганида, улфатлар: “Мўъжизани увол килманг” деб эътиroz билдиришган эди, у: “Агар беш сўмдан берсанглар, бутунича ичворардим”, деди. Ҳазиллашяпти деб ўйлаб, рози бўлган эдик, шаробни чигирткаси билан ютворса бўладими. Айтилган сўз – отилган ўқ, ўша даврда каттагина пул бўлишига қарамай, ноилож беш сўмдан чикариб бердик. Шу баҳона бўлди-ю бошқалар ҳам пулдан гаров ўйнаб, бири чигирткани, бири кўнғизни, бошкаси бўка пашшани ютишга киришди. Олдингидан фарки шуки, бериладиган пулнинг қиймати борган сайин камаяверди. Охирида мебел фабрикаси бошлиги Анваржон бир чигирткани ютмоқчи бўлиб, гаров таклиф килган эди, бўлди энди, бекорчи пул йўқ, деб тескари ўгирилдик. Шунда унинг хўрлиги келиб:

– Жон ошнажонлар, менга колганда пастлик килманлар. Ўтиниб сўрайман, ҳеч бўлмаса, йигирма тийиндан ҳам бермайсанларми, деб пикиллаб юборса бўладими!

Саричелак ҳаётининг иккинчи куни

Саричелак базмининг иккинчи куни ҳам қизғин давом этди. Чигиртка ҳангомасини эслаб, роса кулишдик. Бир оз ўтиргач, Ҳабибжон Ҳожиматов қармок кўтариб, балиқ овлашга кетди. Кўп ўтмай Сойибжон Алиев иккаламиз ундан хабар олгани бордик. Қарасак, бамбуқни ушлаганича кўлга термилиб ўтирибди. “– Ҳа, илинмаяптими?” деб ҳол сўрасак, “Тортмаяпти, нимагадир” дейди. У ёқ-бу ёкка разм солиб қарасак, қармокни отганда учи дарахтга илиниб қолган экан.

Мириқиб ҳордик чиқаргач, нихоят Кўконга йўлга чиқдик. Кимдир машинага чикаётиб, кимнингдир ечиб қўйилган туфлисига қокилиб, “Бу ерда туфлига қанд борми?” деб ташқарига иргитиб юборди. Ундан куч олиб, бошқалар ҳам бир-бирининг туфлисини иргитишга тушди. Ҳуллас, ҳаммамиз оёқ яланг қолдик. Бу ҳам етмагандек, ўзимиз олиб борган қозоннинг куясини бир-биrimизнинг юзимизга суртиш билан машғул бўлибмиз. Ҳаммамиз бир-биrimизга қараб куламиз, ўзимиздан хабаримиз йўқ.

Коронғи тушмасдан Кўконга етиб келдик. Биринчи бўлиб Махмуд Ҳошимовни катта йўл ёқасига, кўчаси муюлишига туширмокчи бўлдик. У: “Эшигим тагига олиб бориб кўясизлар, чойхона олдидан ялангоёқ, бу қаро юз билан қандоқ ўтаман?” – деб ҳархаша килди. Биз кўнмадик. Охири: “Ҳамманга бир жуфтдан туфли олиб бераман”, – деб ваъда бергандан сўнггина кўндинк, зеро, у савдо идораси бошлиғи эди-да. Қолган йўлдошларимизни ҳам шу тариқа туширдик. Менга келганда коронғи тушиб бўлган эди. Қолган йигитлар мени ҳам катта йўлга туширмокчи бўлишди. Мен тортишмай, савдолашмай, ҳеч нарса ваъда килмай, дангал тушиб

кета бошладим. Ўртоклар: “Хой, шу ахволда катта йўлдан юришга уялмайсанми? Бирор кўрса, кимсан фалончи, шу ахволда юрадими, демайдими?” – деб ялинтирмокчи бўлишган эди, “Шу зим-зиё кўчада сен абрахлардан бошка ким ҳам бўлар эди?” – деб уйга қараб йўл олдим. Орқамдан машинани секин-лаб үйгача боришиди.

– Ҳов, мен билан ҳазиллашманглар. Якинда партия мактабини битириб, райкомми, горкомми бўлсам, ҳаммангни муҳокама қилиб, партиядан ўчираман, – деганча уйга кириб кетаётган эдим, яна бўлмади, ўртоқчилик экан, эшик тагида партиядан ўчишга бағишлаб яна икки шиша бўшатилди. Нихоят улар “Сенсан райкомим, хоҳ ўчир, хоҳ ўчирма”, – деб ашулави ванг қўйишганича жўнаб кетишаверди, камина ҳам сўкинганча колавердим.

Аям чақирияпти

Қўқондаги Массив чойхонаси. Вакт оқшомдан ўтиб қолган бўлсада, Ахрор, Адҳам, Дилшод ва бошқалар базми-жамшидни давом эттирмоқдалар. Шу пайт Дилшоджоннинг ўғли келиб: “Дада, аям чақирибдилар” деди. Отаси ҳозирок етиб боришига ваъда бериб, ўғлини чикариб юборди. Сухбат кизигандан-қизиб бораётган эди, орадан ярим соат чамаси ўтиб, Дилшоднинг ўғли яна келиб, аяси чакираётганини айтди. Орадан ўттиз-кирқ дақика ўтганда яна ўғли кириб:

– Дада, тезлик билан уйга бораркансиз. Агар ҳозир бормасангиз, аям ухлаб қолар эканлар, деса бўладими.

Улфатлар бир-бирига сирли, кимдир билинار-билинмас пиқиллаган кулгу билан қараб сузилиб колишиди.

Орадан шунча вакт ўтиб, бу гап кўчага чиккани йўқ, чикмайди ҳам.

Узоқни ўйлаб

Камина, Икромжон ва Собир Тошкентга кетяпмиз. Сирдарёдан берироқдаги Чагалида нон бозори бор, пойтахтга мозорбости қилиб олайлик деб, машинани шу жойда тўхтатишимиш биланок, атрофимизни патир сотувчи киз-жувонлар ўраб олишди. Собир бир жувоннинг ҳамма патирини олиб, савдолашмагани етмагандек, айтганидан ҳам кўпроқ пул берди. Машинага кайтгач, ундан бу хотамтойликнинг сабабини сўрадик. Нима дейди денг:

— Илгари унинг опаси билан учрашиб юрар эдим, буни синглиси биларди. Ҳозир шунака килмаганимда, уйига бориб, “опа, одам қуриб кетгандек, бир вактлар фалончи пасткаш билан учрашиб юрардингиз-а”, деб мени ёмон отлик қилган бўларди: “Ана мулоҳаза-ю, мана мулоҳаза”.

Мутлақо эсимга келмапти

Ўша, якинда “Патир” лақабини олган дўстимиз Собир хотини билан тўйга у-бу харид қилиш учун Кўкон бозорига боришибди. Хотини “кимсан фалончининг хотиниман-ку” деб орка ўриндикка ёнбошлаб олган экан. Иттифоқо йўлда бир жувон кўл кўтарибди. “Кўнгли бўш” Собир тўхтаб, уни ёнидаги ўриндикка ўтказибди. Кўконга боргунча ўтган ширин дамлар хотираларидан сухбатлашибди. Ҳалиги жувон манзилига етиб, тушиб колгач, шу пайтгача дам урмай, писиб ўтирган хотини “Ҳа... дадаси?!“ деб юборган экан, Собир тормозни босганини билади.....

Касалхонага тушибди, деб кўргани бордик. Ранги бир ахволда. Боши бинтланган бўлса-да, лат еган жойлари кўриниб турибди.

- Ҳа, биродар, нима бўлди? Қаеринг оғрияпти?
- Ҳеч нарса бўлгани йўқ. Бир оз чарчабман, дам олгим келди.
- Тўғрисини айтавер, касални яширсанг, истмаси ошкора.

Хуллас, у воқеани айтиб беришга мажбур бўлди ва сўзини шундай якунлади:

- Хотинимнинг машинада эканлиги мутлақо эсимга келмабди.

Родной чўп

Эски замонда мусобакадош республикаларнинг вакиллари бир-бирининг далаларига бориб, ишлар билан танишиб туришарди. Фарғонадан Аҳматулло Рустамов бошлигидаги делегация Қозогистоннинг Жеттисайига боришибди. Бир совхоздаги ғўзаларнинг ҳолатини кўришса, экинни бегона ўтлар босиб ётганмиш. Комиссия аъзоси Ҳамзали Турдиев совхоз директорига караб: “Пахтани манави бегона ўтлардан тозалаш керак”, деса, у пинак бузмасдан эътиroz билдирибди:

- Нега бегона дейсан, булар бирга ўсиб чишишган. Паҳтанинг родной чўплари булар!

Шу кулги баҳона, зиёфат бошланибди.

Мислсиз томоша

Бутун Марказий Осиёда машхур бўлган Юсуфжон қизиқка шогирд тушишни орзу қилган Охунжон уникига келиб, мени шогирдликка олинг, деб йиғлагудек ахволда туриб олибди. Юсуфжон қизик юмшаб, шундай дебди:

- Унда, хозирок дарсни бошлаймиз. Олдин хамма кийимингни еч. Кип-ялангоч бўлганингдан кейин, тўнни кий.

Охунжон айтилган гапларни қилгач, устоз уни

шу аҳволда бозорга бошлаб, ковун сотилаётган жойда тўхтабди. Тўртта ковун олиб, пулинни тўлабди-да, Охунжонга юзланиб: “Энди, тўннинг орка пешини кўтар, манави қовунларни солиб, уйга олиб борамиз”, дебди.

Марғилон Марғилон бўлиб, шу пайтгача бундай зўр томошани кўрмаган экан...

Саҳнага йўл

Охунжоннинг орзуси ушалиб, Юсуфжон қизикка шогирд бўлиб олгач, тўйларда унинг соясида юриб, анча танила бошлабди. Бир куни устози унга: “Бугун сени театрга олиб бораман, спектаклда катнашасан”, деб колибди. Охунжоннинг юраги така-пука бўлиб: “Кўйинг-е, тўйлардаги қизикчиликка зўрга яраб турибман, саҳнада ҳакикий маҳорат керак”, деса, Юсуфжон қизик бепарво сўз котибди:

– Сенга маҳоратнинг кераги йўқ. Саҳнага чиқсанг бас, одамлар туркингни кўрибок, кулишаверади.

Илгари ялаттидингиз?

Данғара тумани халқ суди раиси Муборакхон опа Октепага ипак курти тутиш бўйича вакил этиб юборилди. Умрида курт кўрмаган опани ўша ернинг сардори Очил ака кутиб олиб, уйма-уй олиб юрибди.

Октепа халқи, маълумки, асосан корақалпоклардан бўлиб, тил лаҳжаси бўйича “жўқчилар” гурӯхига кирадилар.

Алкисса, Очил ака уйига ҳолвайтар буюриб кўйган экан, опани таклиф килибди. Ҳовлига кирган заҳоти хотинига: “Хайвонга жой қил!” – деб буюрибди. Уларнинг лаҳжасини яхши билмаган вакил опа бир бўзариб олибди-ю, ичидагисини ташига

чикармабди. Айвонга чикиб ўтиришгач, ҳолвайтар келтирилибди. Очил ака опани ҳолвайтарга таклиф килар экан, “Шаҳарда ўсган бу опа ҳолвайтарни билармикан?” деб ўйлаб, “Муборакхон, илгари ҳам жалаппидингиз?” – деб сўрабди.

(Кичик бир изоҳ: Очил аканинг лаҳжасидаги хайвон – айвон, жалаппидингиз – ялабмидингиз.)

Махтангни жеб қўйибманми?

Давлат Султонов хокимлик пайтида Оқтепага борибди. Колхоз раиси Очил ака билан пахтазорларни айланиб юриб, бир жойга етишибди. Не кўз билан кўрсинларки, катта бир пайкални сув босиб, гўза кўчатлари бутунлай сув остида колиб, кўринмай ётган эмиш. Ҳоким газаб отига миниб, “Ҳей, раис, пахта кани, пахта?” – деб дағдаға қилса, раис тумтайиб, отамерос “жўқчи” шевасида жеркибди:

– Жеб қўйибманми махтангни? Жер сувни тортиб кетса, ўзи лап этиб кўринади. Шунга ҳам бақирасанма!

Соғ бўлинг

Жума номози пайти. Имом хатиб фарз номозини бошлаб, эндинина зам сура қироатига ўтган эдилар, Ҳамидjon Каримов деган дўстимизнинг димоги кичиб, акса уриб юборди. Сафда ёнма-ён турган Шамсиддин беихтиёр “Соғ бўлинг” деса, Ҳамидjon ҳам беихтиёр “Рахмат” деб қўйди.

Жимпер

Миробид билан Тошкентга келиб, талаба болаларимиз ётиб юрган квартирада тўхтадик. Миробид қандайдир бир юмуш билан ташқарига чиқдилар-у уч соат чамаси йўқ бўлиб кетдилар. Келгач, қаерга йўқ бўлиб кетганларини сўрасак, эски кадрдонлардан бири учраб қолганини айтдилар...

Орадан ўн кун ўтиб, яна пойтахтга йўлим тушди. Ўша хужрада тунадим. Бир пайт кўнғироқ жиринглади. Эшикни очсан, бир жувон турибди. “Шерингиз канилар?” – деб сўради у.

– Қанақа шеригим?

– Ўтган сафар бирга келган шерингиз. Менга янги чиқкан жимпер ваъда қилган эдилар, мабодо сиздан бериб юбормадиларми?

Оқ фотиха

Бош бухгалтер Ҳамиджон дўстимиз рўпарадаги кўшнисининг дўхтири ўғлига қизини узатди. Тўй жуда файзли ўтди. Базм ниҳоясига етиб, ота қизига оқ фотиха берадиган вакт бўлди. Таомилга кўра киз отасининг оёкларига тиз чўкиб, йиғлаб хайрлашди ва оқ фотиха сўради. Қариндош-уруглар, якин дўстлар куршовидаги ота фотихага қўл очиб, йиғи аралаш деди:

– Сафаринг бехатар бўлсин!

“Отаюпатар”га келган биз дўстлар бу гапнинг мағзини чаколмай, анқайиб турардик.

Устоз

Адҳамжон Абдуллаев деган ажойиб дўстимиз бўларди, гурунглари файзли эди.

У киши кунлардан бирида Зафар Мирзаевнинг уйида бўлаётган ўтиришга савлат тўкиб кириб келдилар. Хонадон сохибининг ити занжирни узиб юборар даражада сакраб, вовиллай кетди. Мехмонни таъзим билан қарши олаётган Зафаржон итга қараб: “Жим бўл! Танимадингми, бу олий мартабали зот бизга устоз бўладилар-ку!” – деб дўк килди. Адҳамжон ҳуришдан тўхтаган итга энсаси котганича қараб кўйиб, Зафаржонга деди:

– Ўзингни зўрға эпакага келтирганидим. Энди итинг ҳам бормиди?

Мехмоннинг фарёди

Америкадан ташриф буюрган меҳмонни Эркин Воҳидов, Нурали Қобул Дадаҳон Нурий каби ижодкорлар кутиб олиб, республика бўйлаб сайр килдиришиди. Водийга келганларида, табиийки, меҳмондорчиликнинг тагида колдилар. Кунига бешолти марта зиёфат, зиёфат бўлганда ҳам жуда шохона. Шўрлик меҳмон охири “дод” деб юборди, биз Морган, Рокфеллер, Гейтсга ўхшаган миллиардерларимиз билан мақтаниб юрибмиз, ҳақиқий миллиардерлар Фарғона водийсида экан, деди.

Барibir яна устма-уст зиёфат бўлаверди, меҳмон “олинг-олинг”ларга чидамасдан, охири меҳмонхонага бориб ётиб олди. Навбатдаги зиёфатга чиқмагани боис, Нурали Қобулдан унинг насибасини киргизиб юборсак, у овқатларга безиллаб бокиб, шундай дебди:

– Сизларда рўза тутиш одати бор. Тамом, мен ҳам бугундан бошлаб рўза тутдим!

Бир ўрни келганда, бу воқеани шоир Анвар

Обиджонга сўзлаб берган эдим, у киши фаҳрланган қиёфада мутойиба қилди:

— Ўзбекнинг таомлари жуда сехрли-да, каранг, ҳатто америкаликни рўза тутишга ўргатибди. Агар эринмасдан овқатни яна уч-тўрт кун заплаганларингда, бир йўла мусулмонликниям қабул қилган бўлармиди...

Пайпок

Улфатимиз Аҳмаджон Опоч: “Зўр опахоним бор, танишиб олинглар”, деб бизни Кўкондаги бир уйга бошлаб борди. Роса еб-ичдик, биринчи бўлиб мезбон аёлнинг кайфи ошиб колди, Опочнинг бўғзига чанг солиб: “Ўтган сафар ҳам бир гала бўлиб келиб, тўкиган жунпайпоқларимнинг ҳаммасини насяга олиб кеттиларинг. Олдин ўша пулларни тўланглар, меҳмондорчиликни кейин давом эттирасанлар”, дея жанжал қўзғади. Ўтиришимиз таъби хирачилик билан якунланди.

Эртаси куни яқин оғайниларимиздан бири бўлган Баҳодиржон Тўйчибоев билан учрашиб колиб: “Опоч зўр импўртний пайпоклар олиб келган экан, кеча ҳаммамизга таркатди, сизга ҳам теккандир”, дедим. Гапим тугаши биланоқ у: “Вой абллаҳ-ей, бошига иш тушса, биринчи ўринда менга югуради. Энди керак бўлмай қолибмизми”, деб ғижинди-да. Опочдан пайпок ундириб келишни тайинлаб, шофёрини жўнатиб юборди.

Опочнинг аҳволини энди ўзингиз тасаввур қиласкеринг.

Омонатга хиёнат

Машҳур асқиячи Жўрахон Пўлатов кишга ўтин сўраб келиб қолди. Мен унга: “Аввал битта япянгисидан эшитайлик”, дедим.

– Майли, латифа эмас, бўлган бир воқеани айтиб бераман, – деди у. – Аммо, бир шартим бор – буни хеч кимга айтмайсиз!

Мен айтмасликка сўз бердим. Жўрахон aka ҳикоя қилишни бошлади:

– Маҳалламиизда Тўхта мағзава деган одам бор. У пуфакни тутун билан шишириб, Худога хат йўллабди. Наряддан бўшаган учта мелиса йигит бу ғайритабиий пуфакни кўриб, отиб туширишибди. Пуфак ичидаги хатни, очиб карашса, унга: “Э, Худо, мен Тўхтавой деган бандангман. Сал камхарж бўлиб колдим, ноумид килмай, ўн минг сўмгина бериб тургин”, деб ёзилган экан. Хатни ўкиб, раҳми келган мелиса йигитлар чўнтакларидағи бор пулни ўртага ташлашибди, Тўхтавойни уйидан чакириб, шуни ишлатиб туринг, деб ташлаб кетишибди.

Эртаси куни ўша мелиса йигитлар карашса, тепадан яна бир пуфак учиб ўтаётганмиш. Униям отиб тушириб, ичидаги хатни олиб ўқишишса, энди: “Э, Худо, сўраган ўн минг сўмимни келиб-келиб мелисалардан бериб юборасанми, тўрт минг уч юз сўмини уриб колишибди”, деб ёзилганмиш.

Буни хеч кимга айтмасликка сўз берганим рост, лекин ёзмасликка ваъда бермаганман.

Галстукли ҳайдовчи

Ғуломали Назаров Охунбобоев туманида райком бўлиб турганида унинг Курбонали Раҳмонов деган шофёри бўларди. Ғуломали ака ингичка, озғин, одам эди. Ҳайдовчиси эса новча, бакувват, келишган йигит бўлиб, доимо ғоздай гердайиб туар эди.

Улар бир куни Риштонга тўйга боришибди. Мезбон хизматдаги баковулни имлаб, Охунбобоев туманининг раҳбари келганини, ҳурматини жойига кўйиб, алоҳида белгиланган хонага олиб киришни тайинлабди-ю ўзи орқама-орқа келаётган меҳмонларни кутиш билан чалғиб колибди. Баковул шофёрнинг савлатини кўриб, уни алоҳида хонага олиб кирибди, раҳбарни эса ташкаридаги, ёпта ўтириладиган узун столга бошлишибди.

Ичкаридаги казо-казолар майшатни қилиб бўлишгач, дастурхонга фотиҳа тортишибди. Ташкарига чиқишгач, раҳбарлардан бири четроқда тажангланиб турган Ғуломали акани кўриб: “Ие, каерда здингиз, ичкарида кўринмадингиз-ку”, деса, у шундай жавоб қилибди:

– Риштонга бир улуғ одамнинг тўйига борамиз, ок кўйлак, яхши костюм кийиб, мен берган галстукни тақиб олгин – деб шафёrimга тайинлаган, мен ўзим ахмок...

Бандачилик

Баҳодир дўстимиз умумий овкатланиш корхонасининг 5-бўлимида омборчи эди. Нима бўлди-ю уч кун ишга чиқмади. Бўлим бошлиғи Мамажонов биринчи куни эътибор бермади, иккинчи куни ғаши келди, учинчи куни қаттиқ жаҳли чикиб, омборчини ернинг тагидан бўлса ҳам топишни буюрди. Нихоят тўртинчи куни Баҳодир пайдо бўлгач, тушунтириш

хати ёзишни талаб қилиб, бақиришни бошлаган эди, ўртоклари билан Шоҳимардонда улфатчилик қилиб юрганини айтишдан кўрккан Баҳодир: “Нима килай? Хотинимнинг тўлғоги оғир келди, кўзи ёриши қийинлашиб, ахволи ёмонлашиб колди. Тошкентга олиб боришга тўғри келди. Яхши ҳам олиб борганим, хотиним эсон-омон туғиб олди”.

Уни тергаб турган бошлиқнинг феъли ўзгариб, табриклишга тушиб кетди.

Баҳодир серулфат йигит эмасми, фарзанд кўргани ҳакидаги хабар яшин тезлигида тарқалиб, “ювиш” масаласи кун тартибига кўйилди. Баҳодир турли баҳона топиб, бир панд берди, икки панд берди, охири қутулолмаслигини билиб, жума куни ишдан сўнг Сариқўрғондаги чойхонада туғилмаган болага ош қилиб берадиган бўлди.

Жума ҳам келди. Ишдан сўнг улфатлар келишилган жойда тўпланиб, чойхонага боришга шайланышди. Шу маҳал Баҳодир ковоғи уйилган киёфада пайдо бўлиб, мунгли товушда деди:

– Узр айтишга келувдим. Пешанага сиғмаган экан, янги туғилган болам ўлиб қолди...

Улфатлар туғилиши ҳам, ўлими ҳам сирли гўдакка ачинганларича, уй-уйига тарқалишди.

Бало чиқди-ку

Ҳаммамизга маълум, ЎзКп МҚнинг XVI-plenумидан сўнг республикада ишдан олиш, партиядан чикариш, чора кўриш ишлари авж олиб кетди. Ҳар кун, кунора информацион билдиришлар... Ҳамма юрагини ҳовучлаб юрадиган бўлди. Кунлардан бирида Мамажон палов чойхонада улфатлари билан ўтирган эди, радиодан ахборот бериб қолишди, “– Кўшима штатлар президенти Рейген вазифасидан кетди...”

– Каранглар-а, – деди Мамажон ака, бу Сотимхўжаев деганлари жуда бало чиқди-ку-а?

Соқол

Шер деган оғайнимиз бор, тукларига жуда эрк бериб юборган, соқол жонивор кўқракни қоплаб, киндикни кўзлаб қолган. Биродарлар билан маслаҳатлашиб, унинг соқолини бир ёқли килиш чорасини изладик. Нихоят, чойхонада ўтирган пайтида ёнига бориб, атрофга аланглаб, ҳеч ким йўклигига ишонч ҳосил килгандай бўлиб, қулоғига шивирладим:

- Оғайни, овинг юриб қолди.
- Хўш-хўш, қани, гапиринг-чи.
- Сени роса мактаб, реклама қилган эдик, биттаси танишмоқчи бўлди.
- Ким экан у?
- Кўрганда биласан. Бирок, таниширишга сени бу ахволда олиб бориб бўлмайди. Сартарошхонага бир кириб чиқишга тўғри келади.

Шер ўйланиб қолди. Соқолим муҳимроқми ёки мен билан танишмоқчи бўлган ўша “биттаси”ми, дегандай соқолини салмоклаб кўрди. Ўйлаб-ўйлаб, майли, сенларнинг айтганинг бўлсин, деди. Чархин Кўприк гузардаги Муқимжон сартарошхонинг хузурига кириб, арчилган тухумдай сип-силлик бўлиб чиқди.

- Қани, бошланг ўша “биттаси”нинг олдига, – деди.

Уни сартарошхона якинида тўпланиб турган Раҳмонали, Одилжон, Давлаталиларга рўпара килдим, “мана ўша сен билан янам яқиндан танишмоқчи бўлган одам”, деб Раҳмоналини кўрсатдим.

Буни эшитиб, Шер бирданига тумтайди:

- Ие, “биттаси” деганингиз шумиди ҳали? Бу одамнинг канакалигини болалигимдан биламан-ку...
Ха, эсизгина соқолим-а!

Уч йилги омонат

Радиода масъул вазифада ишловчи Бағдод туманилик Олимжоннинг кишлокдоши республикада юқори лавозимга тайинланибди-ю бирдан гўё унинг димоги кўтарилибди. Кунлардан бирида саноат бўлими бошлиғи Музаффар Сайдовнинг хонасига кириб: “Қани бу... Мамасолих?” – деб, кўшни столда ўтирувчи ходимни суриштириб, дағдаға килибди:

- Нимага эшиттиришнинг матнини топширмади?
- Ҳозир келиб қолса айтаман, топширас, дебди коса тагини пайкамаган Музаффар ака.
- Ҳов, менинг кимлигимниям, каерданлигимниям биларсиз-а?
- Билмай ўлибманми, пошшоликдансиз-а, ука.
- Билсангиз, айтиб қўйинг, Мамасолих калондимоғликни йиғишиштирсан. Бунақа олифталарнинг ўзигаям кўйдим, столигаям!

Мамасолих келгач, Музаффар ака унга бўлган гапларни етказган экан, ранги окариб, эшиттириш матнини тайёрлашга киришибди.

Орадан уч йил ўтгач, Олимжонга кишлокдош бўлган арбоб ишдан кетибди. Мамасолих Болтабоев ўша куниёқ Олимжоннинг хонасига телефон килибди. Гўшакни унинг раҳбари Раҳмат Жумаев олиб, Олимжон ташқарига чиқувди, келса нима деб қўяй, деган экан, Болтабоев салмокли товушда тайинлабди:

- Келса, айтиб қўйинг, бундан уч йил олдин стомимга бир нарсасини қўйиб кетганди. Шу омонатини олиб кетсин.

Усталарнинг устаси

Телевизоримиз бузилиб, уста чакирмокчи бўлиб турган эдим, Маҳмуджон Ҳошимов келиб қолди. Воқеадан хабар топгач, уста ўзимиз-да, деб ишга киришиб кетди. Телевизорнинг лакашикилдокларини бир-бир сугуриб, уйнинг ярмига ёйиб ташлади. Барибир уста ҳаки олмайди деб, куюқ овқат тайёрлатдим. Гурунглашиб, овқатландик. Даастурхонга фотиха тортилгач, қарасам, ташқарига чикиб, кетишига чоғланяпти.

– Ҳа, қаёкка? – дедим ҳайрон бўлиб. – Телевизор нима бўлади, телевизор?

Маҳмуджон пинагини бузмасдан жавоб қилди:

– Бу менга ўхшаган катта усталар тушунадиган телевизорлардан эмас экан. Ҳашакирок уста топиб, кўрсатавер.

Савдоғарчиллик

Обком комсомолда ишлаб юрган пайтларим Бағдод тумани милициясининг бошлиғи Фозилжон Москвага бориб келди. Саёҳат таассуротларини сўраган эдим, у: “Уни қўйинг, буни қўйинг, Москвада саримсоқ пул экан. Озроқ олиб борган эдим, килосини уч сўмдан савдолашмай олиб кетишиди”, деб қолди. Менга бунақа нарсаларнинг қизиги йўқ, дедим-у, тезда сафар ҳозирлигини кўрдим, 50 кило саримсоқни 80 тийиндан сотиб олиб, каттакон чемоданга босдим.

Москвага етгач, юкни зўрға судраб юриб, меҳмонхонадан жой топдим, чесмоданни юқори қаватга олиб чиқкунча эна сутим оғзимга келди. Эртаси куни куйиб-пишиб, бир амаллаб бозорга олиб борсам, не кўз билан кўрайки, меникидан яхширок саримсоқларни 40 тийиндан сотиб ўтиришибди.

Нима ҳам қилар эдим, ортиқча юқдан қутулиш учун бир озарбайжон билан савдолашиб-савдолашиб, охири улгуржисига 20 тийинданга ўтказдим.

Москвадан кайтганимдан кейин, Фозилжонку ўчини мендан олди, энди мен захримни кимга тўкаман деб юрганимда. Соҳибжон деган танишим учраб, Москвага кетаётганини айтиб колса бўладими? Унга тезда “саримсоқ савдоси”ни тикишитирдим. Эшитсан, 150 кило саримсоқ олиб, сафарга жўнабди.

Орадан анча ўтиб, Соҳибжонни кўчада учратиб колдим. Дўстона киёфада қўл узатсан, кафтимга бармоқларининг учини теккизиб кўйиб, “сен билан ҳали хисоб-китобим бор”, – дея шошганича ўтиб кетди. Москванинг бозорида ахволи не кечган, ҳозирча буни билганм йўқ. Билсан сизларга, албатта, айтаман.

Маматхонов шуми?

Олтиариқдаги собик колхоз раислардан бўлмиш Абдусаломнинг онаси Отинча ая туманидан бошка жойни кўрмаган, ўта содда эканлар. Отинча ая кўшни кишлоқка тушган кизини кўриб келишга шайланаётганини билиб, Абдусалом, сизни шофёrim машинада ташлаб кўяди, манавинга йўлдан невараларга канд-қурслар олволарсиз, – деб, ўн сўмлик пулни узатиби.

Ҳаётда кўлига пул ушламаган онаизор, – ие, расими ҳам бор экан-ку, пулдаги Лениннинг суратига тикилиб. – Ким бу? – дебди.

Абдусалом: “Юртимизнинг пошшоси шу одам”, деган экан, Отинча ая расмга бошқатдан қарабди-ю хаяжон билан:

– Вой, Маматхонов деганлари шуми? – дермиш.

Маматхонов ўша даврларда Олтиарикрайижро-кўми раиси эди.

Қаттиқ бодом

Ҳайдар ака деган колхоз раиси бўларди, ҳаддан зиёд пишиқ, зикна одам эдилар. Бир куни вилоят раҳбари Шамсиддинов бизни эргаштириб, колхоз далаларини кўздан кечирди. Мен раисни четга тортиб, биз Насвали ака, Равшаной, Қозоквой, Кудрат акаларнинг далаларини айланиб чиқамиз, ўша атрофда тушлик тайёрлатиб кўйинг, дедим. Тайинламасангиз, бу одамдан бир нарса униши кийинлигини яхши биламан-да.

Нихоят тушликка тўхтадик. Дастурхонда мева-чевалар қаторида икки ликобчада бодом ҳам турибди.

– Тиш ўтмайдиган, қанча одамнинг оғзига кириб чиқкан бу тошбодомлар менга таниш, ўтган йили ҳам олдимизга кўйилганиди, – деди Шамсиддинов, ивирсиб турган парткўмга қараб. – Шуларни олиб чиқиб, чақиб келинг.

Парткўм ҳам раисдан колишмас экан, ликобчанинг биттасидаги бодомларни чақиб келди. Бодомни бир зумда еб тугатиб, иккинчи ликобчадагини ҳам чақиб келишни буюрдик.

Ташқарида бодом чақилаётган пайтда Ҳайдар аканинг овози эшилди:

– Ҳа, нимага чакяпсан бу бодомларни?
– Шамсиддинов буюрди. Битта товоқчадагини чақиб кирган эдим, бир зумда тинчтишиб, бунисиниям чақиб кел, дейишди?

Ҳайдар раиснинг гулдироқ товуши яна хона ичкарисига эшилди:

– Ие, “чак” деса, индамай чақаверасанми? Бунақада колхозимиз хонавайрон бўлади-ку, – деганида Абдулпаттоҳ Ҳамролиев, Фахриддин акалар беихтиёр кулиб юбордилар.

Бош уқалами

Икки-уч ҳафтада кечқурунлари бир тўпланиб турдиган даврамиз бор. Таом пишгунга қадар эрмак учун “пирра” ўйнаб ўтирилади. Ким ютқазса, даврагиларнинг бошини уқалаб қўйишга келишиб олиниди. Бу ўтиришга ўзимизнинг депаралик Рафик Курбон, Раҳмон Сафар, Қодирали Раҳмон кабилардан ташқари, Тошкентдан Абдулҳақ, Умрзоклар ҳам келиб туришади.

Ўйин бошланиши билан Назирхўжа деган улфатимизга ҳужум бошланади ва уни колдиришга ҳаракат килинади, зеро, унинг қўли енгил, сид-қидилдан уқалайди, таърифига тил ожиз. Ўзи ҳам машҳур кинначилар авлодидан эканлиги билан мактаниб, “Холбу бувим, Мунисхон холам...” деб етти авлодидан чиккан кинначиларни санашга тушади.

Бир ўтиришда ютказиб, ҳар биримизнинг бошимизни жуда узок уқалади. Мен ҳам узок дуо килдим ва охирида қўшимча килдим:

– Бу дунё бокий эмас, фонийдир. Агар вакти соати етиб, бу инсон дунёдан ўтиб кетса, ўрнини боса оладиган бундай қўли енгил кинначини ҳозирги авлодлари ичida кўрмаяпман.

Буни эшитиб, Назирхўжанинг димоғи кўтарилиди:

– Мени, ўлади, деб қўрқманлар, биродарлар. Киннанинг ҳақини тўлаб турсаларинг, Худо ҳоҳласа, узок яшайман. Улфатлардан Раҳмонжон (лакаби Чит) ва Рустамали ҳожиларни шогирд килиб ўргатиб ҳам қўйганман, – деб ғуурланди.

Сомса

Гап навбати хожи Назирхўжага келганда эълон қилиб қўйди:

– Бир гўшт-ковоқ сомса килдириб келай. Хотиним Одинахон бу масалада устаси фаранг. Фиж-ғиж гўштга бир чимдим пиёз, икки чимдим ошқовок аралаштирилса, шунаканги сомса бўладики!

Белгиланган куни катта иштаҳа билан паккамизга тўпландик. Битта сирли тоғорада сомса келди. Унисини еб кўрдик, бунисини еб кўрдик, бари бир хил, яъни ошқовокка озгина пиёз қўшилибди. Жўралар ғала-ғовур кўтаришган эди, Назирхўжа: “Бир суриштириб кўрай-чи, икки кило гўшт олиб берганидим-а”, деб қўл телефонидан хотинига қўнғирок килди:

– Хотинжон, жўралар сомсадан гўшт тополмай, мени қийнашяпти-ку.

Телефоннинг овози очиб қўйилгани боис, у ёқдан гапираётган хотиннинг товуши эшитилди:

– Айб ўзингизда. Сомсага ошқовок қўш, деб туриб олдингиз, ошқовок гўштни эритиб йўқ килворади, десам, ишонмадингиз. Ана, хотиннинг гапига кирмасангиз, шунаقا бўлади.

Камчилик бўлади-да!

Юнусхожи юртга ош беряпти. Кўконда маҳсус дастурхончилар гурухи борки, хатто водийнинг энг нуфузли маросимларини ҳам ўшалар ўтказиб беришади. Бу тўйда ҳам Бокижон, Зоҳиджон, Рустамхон, Акрамжон каби машхурлар хизматдалар. Биз ҳам Сойибжон, Камолхон, Маратжон, Носиржон, Баходир, Солижон, учта Анваржон, иккита Махмуд, иккита Мухторжондан иборат сара гурух алоҳида хонада ўтирибмиз. Дастурхончилар жуда серманзи-




Ижодий мунозара завқи... Чапдан ўнгга: Адҳам Мир Саид,
Мансурхўжа Хўжаев, Аҳмад Фозил.



Сулола.



Хўқанди латифга меҳмонлар келди..



Япониялик меҳмонлар билан



Табиатнинг құдратини қаранг: бугунги ниҳол – эртага
азим даражат!



Сүз ва соз бирлашганда.



Кўқонча манзират: Емай кўрингчи, ошатамиз!



Кўқонлик машхур кулги усталари давраси.

рат бўлишади, Рустамхон билан Зоҳиджон: “Камчилик йўкми?” – дея хонага галма-гал киравериб жонга тегишди. Сухбат роса қизиб турганда, Рустамхон яна кириб: “Камчилик йўкми?” – деб гапимни бўлган эди, ғашим келиб: “Камчилик бор”, дедим. У, қанака камчилик, деб сўраш ўрнига, “Ҳа, энди тўйчилик, камчилик ҳам бўлади-да”, дея зинғиллаб чиқиб кетворса бўладими?

Тантиликини қаранг

Муродил, Одилжон, Раҳмонжон ҳожи ва Давлаталилар билан Янгийўлдаги сиҳатгоҳда даволанаётган Шерхон ҳожини кўргани борганда ўғли Муродхон бизни меҳмон қилди. Бизни Янгийўлда эканлигимиздан хабар топган дўстим Улуғбек қўнғироқ килиб, қайтишда шаҳарда бир пиёла чойга таклиф қилди ва Янгийўлда бир танти одам бор, деб кўйди. Мен ҳам кимлигини суриштира кетдим. Муродхон ўша тантининг қўлида ўринбосар экан.

Индаллоси, яъни тафсилотими? Дунёда ажойиб, ҳеч қандай андозага тушмайдиган одамлар бўлади. Тошкентнинг Янгийўлидаги ғишт заводига Улуғбек дўсти Ботир билан бориб, директори Ўткиржонга учрашишди.

– Сиз бизни танимайсиз, биз эса сизни яхши танимиз, фазилатларингизни биламиз. Сизда сифатли ғишт бўлиши ҳаммага маълум. Пулимиз тайёр, йигирма минг дона ғишт олмоқчи эдик. Илтимосимиз шуки, тезлаштириб берсангиз.

– Транспорtingиз борми? – деб сўради Ўткиржон.

– Ғишт тайёр бўлса, топармиз.

– Манзилгоҳни айтинглар, – деди Ўткиржон, – эртага туш пайтигача ўн минг кейинги куни колганини оласизлар. Ўн минги биздан совға, қолганига хисоб-китоб қиласизлар, транспорти ҳам биздан...

Бу илтифотдан шошиб, ўзини қўярга жой тополмай колган Улуғбек: – Ўткир ака, шундай қизиқ савол туғиляпти, бу илтифотнинг боиси нима?

– Бир одамнинг ё кўзи ёкади ё сўзи. Билмадим, негадир сизларнинг очик чехраларингиз, самимий гапларинг ёқди – дея сухбатга нукта қўйди. Ўткиржон.

Мол қувии

Рахимжон бир маҳаллар Фаргона вилоятининг Данғара туманидаги Охунбобоев совхозида вакил бўлган. У Бердали ва Мамадалилар билан тўйдан қайтаётиб, пахтазорда юрган сигирни кўриб қолибди-ю машинани тўхтатиб, қувишга тушибди. Ярим соатча уриниб ушлагач, уватдаги тутга олиб келиб боғладби. Сўнг бобиллашни бошлабди:

– Яхшиямки, каттаконлардан бирортаси кўриб колмабди, кўрса, Охунбобоев совхозининг далала-ридаги пахталарни сигирлар пайхон килиб юрибди, деб биттага мингта кўшиб, бошимдан мағзава тўкишарди.

Буни эшитиб, машинада ўтирган шериклари кулиб юборишибди:

– Калланг жойидами ўзи? Ҳозир қаерда турганинг эсингдан чиқдими?

Улар Андижондаги тўйга келишган бўлиб, бу пахтазор ҳам шу вилоят чегараси – Ёзёвон туман худуди экан.

Дуо

Чархин Кўпrik маҳалласида саксон беш ёшларга етган Исак ота деган киши бор, чойхонадаги ошхўрликдан сўнг ёшлар ундан, сизга ўхшаб юрайлик, деб дуо сўрашибди.

– Илоҳи омин, – деб кафтини очибди Исак ота, – менга ўхшаб узок яшаб, бу дунёning гаштини суринглар.

Ҳамма юзига фотиха тортгач, Исак ота: “Лекин, буёгиниям айтиб кўяй, умримда кўп бемаъниликлар килганман, икки кам ўттиз йил турмада ўтириб келганман”, деб кўшимча килса, дуо сўраганларнинг баъзиси корнини чанглаб, ағдарилиб тушибди.

Автомат

Мактабдаги ҳарбий дарсда ишлатиладиган бузук автоматнинг кўндоғи синиб, уни Исак отага тузатишга беришибди. Исак ота тузатиб, мактабга олиб кетаётса, ўчакишгандай, йўлда ГАИ ходими тўсиб, орка ўринидикда ётган “Калашников” русумли автоматни кўриб колибди. Унинг капалаги учиб: “Ие! Бу автомат сизникими?” – деб сўраса:

– Йўғ-е, ука, нималар деябсан, эсинг борми, бу – Калашниковники-ку, – дермиш.

Чўнтакка сизмаса...

Машҳур хофиз Расул кори базмда хизматда бўлишибди. Тақсимот пайтида шерикларининг шумлиги кўзибди, кори барибир кўрмайди, бир боплайлик, деб пул орасига лоторея кўшиб беришибди. Кори ака пулларни пайпаслаб, лотореяларни ажратиб олибди-да, шерикларига кайтариб узатибди.

– Олаверинг, кори, – дебди шерикларидан бири. – Биздаги чўнтакларда бўш жой колмади.

Расул кори ҳам бўш келмабди:

- Олаверсаларинг-чи. Чўнтакларингга сиғмаса, бошка жойларингга тиқарсизлар.

Олув ва бўлув

Шофёrimiz Анварни Карим ГАИ тўсиб, правасини олиб қўймоқчи бўлибди. Роса тортишибди. Охири Анвар шундай йўл топибди:

- Бир топишмоқ айтаман, шуни топсанг, правани оласан.

– Хўш, кани айт-чи.

- Иккени иккига қўшса, тўрт бўлади, кўпайтиrsa ҳам, тўрт бўлади. Хўш, нима учун учни учга қўшса, олти бўлади-ю кўпайтиrsa, тўккиз бўлади?

Карим боши қотганича ўйланиб қолган экан, нарироқда турган бошлиғи яқин келиб, нега гарангсираб турганини сўрабди. Карим унга Анвар қўйган масалани айтса, бошлиғи ҳам пича ўйланибди-да, жумбокни ечолмаслигини пайқаб, ўдағайлабди:

- Сен кўпайтирув билан қўшувни кўятур. Олув билан бўлувни билсанг бўлди-да!

Дадаҳоннинг оши

– Тошкентта борганимда Дадаҳон Нурийга қўнғироқ килдим:

- Мен келдим. Қаердасиз?
- Бўстонлиқда, ёзувчилар уюшмаси дачасидаман. Келаверинг, ош дамляпман.
- Ошни ниманинг шарафига қиляпсиз?
- Марҳумга ис чикаряпмиз.
- Ие, кайси марҳумга?
- Биласиз-ку, компартия яқинда оламдан ўтди.

Газак

Устоз Абдулла Қаҳхор асабийлашиб турган экан, буфетдан юз грамм арок олиб ичибди. Газакка буфетчи гўшт берган экан, адид бу ниманинг гўшти эканлигини сўрабди. Буфетчи ўзбекнинг одатига кўра чўчқанинг номини тилга олмай, “оқ қўйники”, дебди.

– Юр. Дадаҳон, кетдик, – деб муштини ҳидлаганича ташкарига караб одимлабди Абдулла ака, – бунақа газак ароқни ҳаром килади.

Уйланиши тарихи

Абдусамад деган домламиз бор. Армияда рус кизга уйланиб, Кўконга олиб келганлар. Бир куни у кишидан Вера опага қандай уйланганини сўрадик.

– Биз кино залида танишиб колдик, – деб хикоясини бошлади домла. – Танишиб бўлгач, бирбиirimизга узок тикилганимизча, гапиришга сўз топмай турдик. Шунда Вера: “Абдусамадчик, нима ҳақда ўйлаб колдинг”, деб сўради. “Сен нима ҳақда ўйлаётган бўлсанг, мен ҳам шу ҳақда ўйляяпман”, дедим.

У: – “Вой, уятсиз экансан”, – деб шолғомдек кизарганича, юзимга енгил шапатилади. Кейин иноклашиб кетдик, – деганда Раҳмон деган ўртоғим армияга борсам мен ҳам шундок қиласман, дейди.

Ота

Ажойиб инсон, ўзига хос табиат сохиби Неъматжон Шерқўзиевнинг умр йўлдошлари бир маросимга боришга рухсат сўрабдилар. Неъматжон aka кўнмаган бўлсалар ҳам, пайт пойлаб туриб, сеқингина жўнаб колибдилар. Кўнгил ғаш, аччиғлари чиккан Неъматжон aka кўчага ҳам чиккилари кел-

май, ҳовлида у ёқдан-бу ёкка юриб турсалар, ўғли Олимжон кириб келиб: “Аям кўринмайдилар?” – деб сўрабди.

– Билмайман, – дебдилар Неъматжон ака.

Кўп ўтмай, Баҳромжон келиб, у ҳам аясини суриштирибди.

– Бил-май-ман, – дебдилар Неъматжон ака, баттаррок асабийлашиб.

Салдан кейин ҳовлида Хотамжон ўғли ҳам пайдо бўлибди. У теваракка аланглаб: “Аям канилар?” – деган экан, хуноби ошган Неъматжон ака бақириб берибдилар:

– Онангни уйланганимдан бери кўрганим йўқ!

Супурги тузук

Дангаралик Ниғмат ака нафакага чикиб, уйда ўтириб қолибди. Бекорчи одам кимга ёқади? Бир куни хотини Ҳосиятхон ишдан келиб: – Қаранг, ҳаммаёқ ифлос бўлиб ётибди, бекор ўтиргандан кўра, супуриб кўйсангиз бўлмайдими, – деса, Ниғмат аканинг зардаси кайнаб, – Супуриш хотинларнинг иши, – дебди.

– Ундей бўлса, майли юринг, эркакнинг ишини килинг!

Ниғмат ака бирдан хушёр тортиб, хотинига синчковлик билан қарабди-да, атрофга аланглаб:

– Супурги каерда туради ўзи, хотинбой ака? – дермиш.

Ҳадик

Бир ўтиришда Анваржон деган дўстимиз ўзининг партиядан ўчирилиши ҳамда қайта тикланиши тарихидан гап очиб, горком, обком, марказком, партия комиссияларига мурожаат килганлиги, бу ердан

адолат топа олмай, Москвага юргани, Брежнев номига ариза ёзгани, марказком котиби Пономарёв, парткомиссия раиси Пелшелар кабулига киргани, яна канчаси билан тортишиб-суришганилиги хақида хикоя килиб берди. Унинг бу гапларини анграйганича эшишиб ўтирган Сайдмухтор, Анваржон ташкарига чиқиб кетгач, бизга ранги оқарганича боқиб, деди:

– Анваржонларинг ашаддий закончи экан-ку. Унга Тошкентдаги бўш уйимни вактинчага берувдим, бошпанам қулоғини ушлаб кетмасайди – деса бўладими?

Қариндошлари қолсин

Машхур қизиқчи Мухиддин Дарвеш машинасида кетаётуб, йўл четидаги бир эгасиз эшакни уриб юборибди. Ўзбекчилик эмасми, дарҳол тумонот одам тўпланибди. ГАИ ходимлари ҳам ҳозиру но зир бўлишибди. Вакт ўтган сайин томошабинларнинг сони ортиб, гап кўпаяверибди:

“Мухиддин эшакни устида одами билан уриб юборибди.”

“Айтишларича, Мухиддин кизиқнинг ўша кишида илгаритдан касди бор экан. Атайлаб урган.”

“Канака киши? Бу эшакда иккикат аёл ўтирган акан, йикилибок, туғиб кўйибди...”

ГАИ ходимлари одамларни тарқатолмай гаранг. Шунда Мухиддин кизик машинанинг капотига чиқиб бир гапни айтибди-ю оломон тезда тарқалиб кетибди. Ўшанда у шундай деган экан:

– Эшакнинг киёматли дўстлари билан якин қариндошлари колсин, қолганлар кетиши мумкин.

Пешонанг шўр экан

Абдулла Орипов, Жуманиёз Жабборов, Охунжон Ҳаким, Анвар Юнус, Ҳабибуллолар билан Икромжон раҳбарлик қиласиган Абдусамад бўлимида ўтирибмиз. Суҳбат қизиб, гап асноси камина оиласи Мариямхоннинг Қашқадарёдан эканлигини айтиб кўйибман. Яна бир қанча вакт ўтириб, Кўкон томон йўл олдик. Меҳмонлар Фарғонага кетмокчи эди. Кўконга кириб келганимизда кечки соат икки бўлиб колган экан. Абдулла ака: “Сенинг уйингга борамиз” деб колса бўладими. Нима ҳам дер эдим....

Уйга келганимиздан сўнг хотиним дарров чой кўиди. Бир-иккита шиша думалади, меҳмонга тўн ҳам кийдирдик. Ниҳоят, меҳмонларни кузатиб чиқдик.

Э, дарвоке, хотинингни чакир, – деб колди Абдулла ака. Чакириб чиқдим.

– Каердан бўласиз? – деб сўради ундан.
– Шахрисабздан бўламан.
– Бу сўзни эшитибок, Абдулла ака унинг елкасига бошини кўйиб, йиғлаб юборса бўладими?...
– Вой бечора синглим, пешонанг шўр экан. Шу ерларга муносибмидинг? Қанчалар бевафо экан бу дунё? – деб, нола чекиб, тўрт мисра шеър айтиб юборди. Бундан таъсирланган бошка меҳмонлар ҳам хўнграб йиғлашта тушдилар. Хотиним ҳам йиғи очди. Ҳаммамиз лол. Жуманиёз Жабборов:

– Бу тақдир экан, Абдулла ака, нима ҳам килар эдик. Энди кетайлик, вакт алламаҳал бўлди, – деса, Абдулла ака:

– Бу синглимни, болаларини ташлаб кетаманми? – деб яна йиғи бошлади. Хотиним унга жўр бўлди, баайни опера дуэти. Ана томоша-ю мана томоша. Ниҳоят, уларни бир амаллаб кузатиб кўйгач, хотинимга: – Сен нета йиғладинг, ярамас? – десам:

– Ўпкам тўлиб турган экан-да!
– Ҳе ўпкангният, акангният! – деганимча қола-
вердим.

Мушоира

Шоир Турсун Қамбар Кўкон каппон бозори-
дан ул-бул нарса харид қилиб келаётган экан,
рўпарасидан хазилкаш шоир дўсти Аҳмад Фозил
чикиб қолибди. Улар бир-бирларига термилиб, ав-
вал кимдан садо чикар экан, деб туришгач, Аҳмад
Фозилнинг сабри чидамай, сўз отибди:

– Биламан, ҳамиша оғзинг тўла нос.

Турсун Қамбар қараса, Аҳмад Фозилнинг сумка-
сидан бир шиша пиво кўриниб турибди. Оғзидағи
носни туфлаб, дархол мисрага мисрани улаб юбо-
рибди:

– Сен “Барда” ичибсан, пивохўр новвос!

Аҳмад Фозил давом эттирибди:

– Мени кўргандаёқ бермадинг салом,

Пивамга кўз тикма, ошналик тамом.

Турсунбой ўзининг ёши каттарок эканини писан-
да килибди:

– Белингда бўлса ҳам минг доллар пулинг,

Биринчи бўлиб чўз, кексага қўлинг.

Аҳмад Фозил бунга жавоб тополмай, пича
тўлдираб тургач, кўлинни силтаб, нари кета бошлаб-
ди:

– Бошка тузукроқ шоир қуриб кетганмидики, сен
билан мушоира килсам..

Жанг

Танти шоир Турсун Қамбар караса, тўрт ёшга тўлиб тўлмаган ўғилчasi тинмасдан йиғлаяпти. Хотинига дашном бериб: “Болангга қарасанг бўлмайдими?” – деб ўшқирган экан, хотини Ҳуринисо ҳам бўш келмабди:

– Кўрмаябсизми, ҳамир киляпман. Сиз ҳам ота бўлиб, болани овутсангиз нима бўлади?

Турсунбой аччикланиб: “Мендек шоирга ақл ўргатадиган бўлиб қолдингми?” – дея хотинига дағдаға қилганича олдинга юрган экан, оёғи тойиб, сурпага йиқилибди, юз-кўзигача унга беланибди. Бу ҳолдан таъсиrlаниб, эр-хотин қулишга тушибиллар. Қарашса, йиғини тўхтатиб, бола ҳам котиб-котиб кулаётган эмиш.

Турсунбой буни шеърга солиб, “Муштум”га жўнатса, кўп ўтмай босилиб чиқибди. Бу шеър учун 49 сўм 53 тийин гонорар ҳам олибди. Хотинига мактаниб, пулни кўрсатса, Ҳуринисо нима дермиш:

– Дадаси, кичик бир можарога шунча берса, келинг, энди каттарок жангларга кўл урайлик.

Кулай фурсат туғилган экан, ўша шеърдан парча келтириб ўтайлик:

*Кирди эр ҳам ҳужумга,
Хотин бериб қолди чап.
Бир сурна ун гардидан
Оппоқ тўйзон тўрт тараф.
“Атака”га ўтдишлар.
Икки томон қарсиллаб.
Бирдан ҳамирга тойиб.
Эр йиқилди гурсиллаб.
Шу лаҳза шўх кулгидан
Тўхтаб қолди катта “жанг”.
Аёл-голиб, қўл белда.
Пойида эр – ҳоли танг.*

Ўғиқ қотиб кулади,
Ютди, яшасин аям!
Ҳар кун бўлса шу ўйин,
Йигламайман сираям.

Кӯпроқ солинг

Ўзбекистонда хизмат кўрсатган артист Жўрахон қизикнинг отаси Пўлат қизик ўсмирилик чоғида кўчадан келмайдиган одат чикарибди. Бир куни унинг отаси Нормат қизик дайдининг таъзирини бериш учун дарралаб саваламоқчи бўлган экан, зувиллаб кочиб колибди. Кечки овқат пишибди ҳамки, уйга қайтмасмиш.

— Овқатни солавер, — дебди Нормат бобо кампирiga. — Пўлатга қолдириб ўтирма. Бир оч қолсин, кейин уйга вактида келадиган бўлади.

Отамнинг жаҳли босилдими-йўкми деб пана-да турган Пўлатвой бу гапни эшишиб, онаси нима қилишини кузатибди. Кампир товокка овқат сузгач, эридан яшириб, бир кисмини алоҳида косага сола бошлабди. Пўлатвой эса коса томонга бўйланиб, панадан туриб дебди:

— Ая, косадаги овқат кимга бўлсаям, корни тўймайди, тағин пича солинг.

Муҳиддин қизиқнинг маъruzаси

Формацияларни ҳамма ўқиган:
Ибтидоизм,
Кулдоризм,
Феодализм,
Капитализм,
Империализм,
Чириб бораётган империализм,
Социализм,

Ривожланган социализм,

Курилиб-курилмайдиган Коммунизм.

Ривожланган социализм белгилари: мажлисизм, ҳашаризм, насияизм, хушомадгўйизм, коррупизм, икки юзламаизм, кўшибёзилизм, мунофиқизм, мақтанс-мақтанизм...

Минг бора шукурки, Мустақиллик бўлиб, юқоридаги халта хуржунизм, айниқса, мажлисизм ва кўшибёзилизмларнинг ҳаммасига чек кўйилизм бўлдизм.

Чорраҳада қолаверай

Акром ГАИ туш кўрибди. Тушини Юнус Эрмуҳамедовга айтиб берибди, у эса бизга айтиб берди. Тушда воеъ бўлишича, Акром вафот этибди. Фаришталар уни нақ жаннат ва дўзах чорраҳасида сўроқ килиб, дўзахга хукм этишибди. У эътиroz билдирибди:

– Нега энди дўзахга?

– Сен кўп одамларни хафа қилгансан, ёмон йўлларга юргансан, хатто кайнотангнинг ҳам правасини олиб кўйгансан, одамгарчиликни билмайсан.

– Яхши ишлар ҳам қилганман, – деб ўзини оқлашга харакат қилибди у: масжидларни таъмирлашга ёрдам берганман, ҳайит намозларга бориб турардим...

– Фаришталар дафтарларини очиб текширишса, ҳақиқатдан ҳам яхши амаллари ҳам бор экан. Улар хукмни ўзгартиришибди:

– Ҳа, майли, жаннатга киракол.

Яхиси мен чорраҳада қолаверай, менга шу ер тузукроқ. Фаришталар бу гапга ҳайрон бўлиб, эй ношукур банда, деб дўзахга итариб юборишмокчи бўлиб турганларида, Акрам уйғониб кетибди.

– Тушинг ўнгидан келсин, – дебди Эрмуҳамедов Акрам ГАИга караб.

Кал

Дўстимиз Раҳимқулнинг боши сип-сийдам, гаров ўйнаб ҳам бирорта тук тополмайсиз. Гоҳо ўзича мактаниб: “Бу аклли бошим аклсиз тукларни битта кўймай хайдаб солган”, деб кўяди.

Бир куни уни чойхонага олиб кетмокчи бўлиб уйига яқинлашаётсак, хотинини қўчага кувиб чикиб колди. Ҳай-ҳайлаб зўрға тўхтатдик. Хотини ҳовлига кириб кетгач, жанжалнинг боисини суриштиrsак, у тажангланиб деди:

– Ёруғлик ҳалакит қилгани учун, кўрпани кўзимгача тортиб, деразанинг ёнида ухлаб қолибман. Уйғонсам, бошимга адёл ёпилган, нафасим бўғилиб, терга пишиб кетибман. Нимага бошимни ўраб кўйдинг, десам, хотиним: “Деразанинг буёғидан караб, адашибман-да. Келин неварамизни ётқизиб кўйган бўлса, кети очилиб қолибди, деб адёл ёпиб кетаверибман”, деса бўладими!

Таскин

Яна бир дўстимиз Рауфжоннинг бошида ҳар-калай ўн бир дона тук бор. У баъзан чўнтағидан тарок чиқариб, тарашга тушади ва ўзича дўнғиллаб кўяди:

– Ҳа, ғуж-ғужланиб тўзимай ўлинглар-а!

Домланинг айтгани ва қилгани

Институтнинг бир домласи (исм-шарифини айтмай кўяколай) хар бир дарс олдидан студентларга насиҳат килар экан:

– Олдиларингда катта ҳаёт турибди, коқилмай яшашни истасанглар, диёнатли бўлинглар, айниқса, номаҳрам аёлларга кўз олайтиришдан сакланинглар.

Кунлардан бирида талабалардан Ғуломжон, Баҳромжон, Назиржонлар Чорсуда туришса, ўша насиҳатгўй домла отнинг қашқасидай маълум бўлган бир суюкоёқ аёлни машинасида у ёк-бу ёкка олиб ўтиб қолибди. Тасодифан талабалар турган жойга тўхтаб, сув олибди. Буни кўрган талабалар домлага яқин бориб, “бизга қилган насиҳатларингиз каёқда қолди”, деб кесатишса, у пинак бузмай:

– Сизларни одобли килишга уриниб келяпман. Менда ҳамма нарса бор. Диёнат ҳам, иймон ҳам, аммо, жой йўқ. Менинг ўқувчим бўлсаларинг, жой топинглар, дермиш.

Жойнинг номи

Фарғона вилоятида Ёзёвон тумани бор. Қизик, бу ном қандай келиб чиқкан экан? Бу ҳақда Ёзёвонда кўп йиллар раҳбар бўлиб ишлаган Раҳмон Сафаровдан сўрасам, “Ёзи ёмон” деган сўздан келиб чиқканлигини айтди.

Иzlанишларни яна давом эттиридик. Фарғонанинг собик раҳбари Мирзажон Исломов Сафаровнинг изоҳига эътиroz билдириб, деди:

– Фарғона заминида ёзи ёмон худуд йўқ. Бу номнинг тарихи бошқача.

Иван деган маркшейдер-геодезист топширик билан келиб, бу жойдаги ерларнинг тарҳини чизган. Бу ишларда иштирок этган фарғоналик Максим тоға

теодолит деган дурбиндан караб, ўлчовни тўғри оларкан-у, ёзишни билмаганидан, шеригига караб: “Ёз, Иван”, дер экан. Ном шундан келиб чиккан, деганида даврадагилар оғзини очганча қолаверди.

Афсус

Машхур уролог, сексопатолог, фан доктори, профессор Нематжон дўстим Тошкентдаги бир ўтиришда хасрат килиб қолди:

- Аббос, ўртогим бўлсаям, хафаман. Рамз ҳожи деганини менга юборибди. Мен уни операция қилиб, тўрт кунда даволаб, жўнатиб юборибман.
- Яхши хайрли иш бўлибди-ку, нимасига хафа бўласиз?
- Нимага хафа бўласиз эмиш. Рамз ҳожи дегани Кўконнинг ярмини ҳаловтуя килиб юрган пулдор одам экан, Аббос шуни олдиндан билдириб қўйганида, даволашни тўрт ойга чўзардим...

Вагони билан сўра

Холдор Зокиров Олтиарик райкоми саркотиблигидан Фаргона дон маҳсулотлари комбинатига бошлиқ бўлиб ўтибди. Туз ичган жойи эмасми, баъзан йўл-йўлакай Олтиарикка тушиб, эски танишлардан ҳол-аҳвол сўраб тураркан. Олтиарикка бир тушганида, яқинлари ошхўрлик қилиб ўтиришган экан, даврага кўшилгач, одати бўйича сўрабди:

- Биздан нима ёрдам керак?

Ёнида ўтирган киши унинг кулоғига шивирлаб, ўн коп ун сўрабди. Холдор ака бу илтимосни эшитмагандек, сухбат мавзусини бошка томонга бурибди. Навбатдаги қадаҳни кўтараётиб, эсдан чиқарманглар, нима хизмат бўлса, биз тайёрмиз, деган экан, бояги киши яна унинг кулоғига ўн коп ун

ҳакида шивирлабди. Холдор ака бу гал ҳам ҳеч нима демабди. Ўтириш тугаб, машинага чиқаётганида, ўша илтимосчи учинчи марта кулогига пи chirлабди. Шунда Холдор ака уни жеркиб берибди:

– Нуқул ўн қоп, ўн қоп дейсан. Мендан сўрайдиган бўлсанг, обрўйимни пастга урмай, вагони билан сўрагин-да, кизиталок!

Мени тинч қўйинглар

Шоир Максуд Оқжарий билан Турсун Қамбар бир маросимга кетишаётса, йўлда харакат назоратчиси тўхтатибди. Тўхтатгандан кейин, албатта, камчилик топилади-да. Ҳужжатларни олиб, автомашинани йўл четига қўйинг, деганида, Оқжарий: “Хой биродар, машинада довруғи оламга кетган шоир Турсун Қамбар ўтирибди-я”, деб гапни кўпиртирибди.

– Мен Турсун Қамбар дегани эшитмаганман, – дебди назоратчи. – Лекин Қамбар Отани биламан. Бир вақтлар мени “Муштум”га уриб чиккан. Ишдан кетишимга сал колган.

Шунда Турсун Қамбар бирдан гердайибди:

– Биларкансиз-ку, яна билмайман дейсиз-а. Мен ўша Қамбар Отанинг ўғлиман!

Буни эшитиб, назоратчининг ранги оқарибди,

– Отангиздан тортганим етар, энди сиз бормидингиз? Илтимос, ота-бола мени тинч қўйинглар,— деб ҳужжатларни қайтариб берибди.

Қовун

Дангара туманида бунёд этилаётган чўчкачилик комплекси Москва назоратида бўлиб, қурилишнинг боришини мухокама килиш учун Госстрой, вазирликлар вакиллари ва раҳбарлари: Карим Уркинбоев, Назир Ражапов, Пўлатов, Фарғона вилоят ижроқўми раиси Ахматулло Рустамов ва бошқалар Дангарада тўпландилар. Мажлисдан сўнг асосий пурратчи Баходир Отажонов раҳбарларни бир пиёла чойга таклиф килди. Чой асноси Отажонов бир товок ковун олиб кирди. Мехмонларга ковун маъкул келиб, пок-покиза туширишди ва колганини олиб киришни сўрашди. Отажонов товокни қўтариб чикса, ковун йўқ, Музaffer Аббосов ва бошқа хизматдагилар колганини еб қўйишган экан. Ноилож, бошқа ковунни сўйиб, олиб кирди. Бироқ, меҳмонлар буни аввалгисига ўхшатишмай, халиги ковуннинг колганини талаб килишди. Учинчи, тўртинчи ковун ҳам сўйилганича колиб кегди. Отажонов нима килишини билмай, нихоят тарвуз сўйиб келди. Тарвуз ҳам меҳмонларнинг оғзига ёкиб, колганини талаб қилишди. Отажонов чикса-ки, Музaffer Аббосовлар тарвузнинг колганини ҳалқумга уриб бўлишган экан. Бошқа тарвуз йўқ. Ана томоша-ю мана томоша. Кун тартибидаги қурилиш машмашалари бир ёкда колиб, унинг ўрнини ковун-тарвуз машмашаси эгаллабди. Хуллас, меҳмонлар машинага ўтираётиб, Баҳодир Отажоновга ярим ҳазил-ярим чин тарикасида “виговор” зълон килишибди. У ҳам ўз навбатида Музaffer акага ўпкалаб:

— Мана, сизнинг қовунхўрлигинги туфайли “виговор” олдим, ишда ҳам колдиришмаса керак — дебди. Орадан уч ой ўтгач, вилоятда катта мажлис бўлибди. Бунда ҳам олдинги келган раҳбарлар қатнашибди. Раислик қилиб турган облисполком

раиси Ахматулло Рустамов асосий масалалар кўриб бўлингандан сўнг.

– Хўш, кандай муаммолар бор, айтинглар – дебди.

Шунда:

– Менда бир илтимос бор, – деб қўл кўтарибди Музаффар Аббосов.

Облисполком raisи Аббосовни тўхтатиб, залдагиларга, бу ерда жиддий масалалар кетяпти. Бир ойдан кейин Марказком бюросида кўрилиши кутиляпти, мана хозир Аббосов ҳам муаммоларни қўяди, бажариш чораларини кўрасанлар. Марҳамат, деса, Музаффар Аббосов – битта муаммо, илтимосим шуки, – деб гапни давом эттирибди. – Отажоновга уч ой олдин берган ҳайфсанни олиб ташласанглар, бошқа қайтарилмайди деганда, можародан хабари бор мажлис ахли кулиб юборибди.

– Ёз, – дебди Назир Ражапов мажлис котибига, – Аббосовга виговор, лақаби “Қовун”. Садқайи бошлиқ кет, муаммойинг куриб кетсин...

Уч-соат жиддий талатўп билан ўтган мажлис шундай якун топган экан.

Бетингиз чидаса

Карим ГАИ бир машинани тўхтатиб, у ёгини текширибди, бу ёгини текширибди, капотни очиб кўрибди, аптечкасигача титкилабди. Тезликни оширганлик ёки ичганликда айблай деса, далил йўқ. Шофёр довдираб турган назоратчига караб: “Командир, энди кетаверайми?” – деб сўраса, Карим ГАИ ўқрайиб:

– Бетингиз чидаса, кетаверинг, – дермиш.

Танимасни сийламас

Камина бир қанча биродарлар: молия вазирлиги собик дарғаларидан Шермуҳаммад Ўринбоев, кимё соҳасидаги Адҳам Орзиматов, мартабали идора ходими Ўлмас Холматов, журналист Улугбек Раҳимов, хофиз Ўлмас Сайджонов ҳамда укахоним Баҳодир Пирматовни бир пиёла чойга таклиф килдим. Ўтириш ниҳоятда жозибали ўтди.

Табиатан камтар, ажойиб инсон Баҳодир Пирматов бошқалардан бир оз олдин келиб, дастурхон тузашга карашиб юборди Баҳодиржонни камининг ёнида туриб, меҳмонларни кутиб олди, уларни ўтказиб, ўзи пойгакда чой узатиб, мулозамат қилиб турди.

Қиттак-қиттак бўлгандан сўнг Шермуҳаммад ўзини қўйиб юборди, кайнокрок чой олиб келишга буюрадими-ей, дастурхондаги нишхўртларни йиғиб олишни буюрадими-ей, хуллас, уни тинч қўймайди. Баҳодиржон ҳам дарҳол Шермуҳаммаднинг буюрганларини бажаришга киришиб кетади.

Шермуҳаммад, Улугбек, Адҳамжон, Ўлмасжонлар бирин-кетин “камина”ни мактаб, соғлик, омад тилашди.

Ҳар гапдан кейин таникли хофиз Ўлмас Сайджоновнинг хиргойиси ўтиришга файз бериб туарди.

Ўтиришнинг охирги дақиқаларида мен, икки оғиз сўз гапиринг Баҳодиржон, дегандим, у хижолат билан, ака, ўзингиз якунлаб кўяқолинг, деганига қарамай сўз... генерал Баҳодир Пирматовга дейишим ҳамоно Шермуҳаммад ҳайкалдек котиб, хушини йиғди-ю Баҳодиржондан узр сўрашга тушиб кетди:

– Узр, минг карра узр. Мен аҳмок сизга тинимсиз иш буюрибман-а, кечириб қўясизда энди.

Кетма-кет сўраклаётган узрдан колганлар ҳангуманг.

Бир оздан сўнг бир юмуш билан хонадан чиккан эдим, ортимдан Шермуҳаммад эргашиб чикиб:

– Мен сиздан каттиқ хафа бўлдим. Нега у одамнинг кимлигини бизга айтиб кўймадингиз.?!

– Ахир ўзингиз таништиришга ҳам кўймай, кетма-кет иш буориб юбордингиз...

– Эҳ, бизнинг соҳамиз бўйича очилган бир иш ўша кишининг бўлимига тушган экан. Адҳамжоннинг кимё бўйича иши ҳам ўша ерда. Бизлар кабулига ёзилсак, керак бўлса, ўзимиз чақирамиз дейишибди. Ҳе ўтиришга чақириб қовун туширган, ака бўлмай ўл, – деб хуноби ошди.

– Олти ой бўлувди папиросни ташлаганимга, – деб жавон устида турган сигаретани бирин кетин тутатиб турганди мен ҳам: – Ҳа, пешонанга ёзилгани шу эканда, – деб фифонига фифон кўшдим.

Орадан чамаси бир йил ўтганда Шермуҳаммад Мирзажон Исломов билан Ангрендаги бир маросимдан кайтаётиб, йўл-йўлакай каминани кўриб ўтишга жазм этишибди. Бир пиёла чойга таклиф қилдик, фотиҳадан сўнг Шермуҳаммад ўтирганларни таништирсангиз, деб колди. Камина ҳам, бемалол ўтираверинг, орган ходимларидан ҳеч ким йўқ дедим. Айтманг ўша воқеани, бир қуюқ ўтириш мендан, деганча кўзи пирпираб турганди, ҳа, майли айтмаганим бўлсин деб ваъда бердим. Мирзажон ака ҳам бўлган воқеани эшитгиси келди-ю айтмадим. Сабаби, Шермуҳаммадни хижолат қилмадим.

Мана шу пайтгача ҳеч кимга бу сирларни айтганим йўқ...

Пашшадори

Айни пишикчилик мавсумида ёзувчи Дадаҳон Нурий ҳонадонимизга кириб келди. Ҳурсанд бўлиб кутиб олдик. Ётар маҳали ҳозир сунбула кириб, чивинлар кутурган пайт эканлигини эслатиб, пашшахонада ётишга таклиф қилдим.

– Пашшахона тутиб овора бўлманглар, – деб гердайди Дадаҳон, – ғамини еб олганман. Яқинда Америкада яшайдиган қизим ҳашаротларга қарши бир восита юборган эди. Ичига дорисини солиб, электрга сукиб кўйилса, бир километр радиусдаги чивин тугул микроб ҳам катта холасини кўради.

Менинг ҳайратим ошиб, нархи канча бўлишидан қатъий назар, бизгаям шундан топинг, ҳозирча ишлатганингиздан колганини ташлаб кетарсиз, деб астойдил илтимос қилдим. Дадаҳон: “Америкадаги қизимга кўнғирок қилдим, яна ўттиз-киркласини юборади, буни битта сизмас, Озод Шарафиддинов, Эркин Воҳидов, Аҳмаджон Мелибоев, Ўткир Ҳошимов сингари канча-канча зотлар илтимос килишган”, деб кўйди-ю чивинкирар ускунанинг келиб чиқиши, дунё бўйлаб тез тарқалаётгани, унинг кашфиётчилари катта миллиардер бўлиб кетишгани тўғрисида сўзлашга тушди. Бир соатча чидадим, карасам, мактовлар тонггача чўзиладиган, уйқум келаётганини айтиб, узр сўрадим.

Бомдоддан бирор соат олдин хотиним мени уйғотди:

- Вой дадаси, туринг!
- Нима гап?
- Дарвозахонадаги сўрида катта ок нарса турибди.

Деразадан қараб, ок булаттга ўхшаган нарсани кўриб, бир чўчиб тушдим. Ёлғиз чиқишига юрагим бетламай, хотинни ёнимга олганимча дарвозахона

тарафга борсам, сўрининг устида пашшахона пайдо бўлиб қолибди. Бир боғичи шотига, бир боғичи дадам экиб кетган нокнинг чивигига, бир боғичи автомобиль антенасига, яна бир боғичи девордаги михга боғланган. Ичидা Дадаҳон Нурий дўмпайиб ётибди. Индамай ичкарига кириб кетдик. Нонуштага чакиргани чиқсан, пашшахона йўк. Дадаҳон, ҳеч нарса бўлмагандек, сўрида бир нарсаларни ёзиб ўтирибди.

- Яхши ётиб турдингзми? – дея кўнгил сўрадим.
- Яхши, раҳмат, ўзингиз-чи?
- Э, мен яхши ухлай олмадим, бемаъни тушкўриб, босинқираб чиқдим. Тушимда денг, мана шу сиз ётган сўрининг устида катта оқ ажина хилпиллаб-хилпиллаб турганмиш. Тўртта кулоғи бор эмиш.
- Вой ака-ей, – дея тиззасига уриб, котиб-котиб кула бошлади Дадаҳон, – сиздан ҳеч нарсани яшириб бўлмайди ўзи. Кечаси чивинкирар ускунга курғурни ишлатиб кўйиб, бемалол тарвайиб ётсан, чивинлар аввалига Американинг қирувчи аппарати олдида ғужғон ўйнашди, кейин бирортаси ҳам ўлмай, ёппасига менинг устимга ташланишди. Яхшиямки, машинамда пашшахона бор эди...

Табиб

Акрам асқиячи табиблик ҳам килиб туради. Жўраҳон ака, Неъматжон, Одилжон Пичок, Мухаммаджон Қасидачи Чорсу қабристони олдидан ўтиб кетаётисса, Акрамжон қабристон томонга қарамай, бошини тескари буриб олибди. Жўраҳон ака: “Ҳа, Акрамжон, фотиха килиш ўрнига, юзингизни нега ўгириб олдингиз?” – деб сўраса, Акрамжон:

- Ҳамма гапингиз тўғри, ака. Аммо, тўғрисини

айтсам, шу ерда ётганларнинг кўпи менда даволанган, шунга юзим шувут, дермиш.

Дуомии-а

Кунлардан бирида қаторлашиб қолган наҳорги ошларга шоир Комил Жўрани ҳам олиб бордим. Фуркат, Бешарик туманларидағи ходимларимнинг тўйларида менга қўшиб, Комил Жўрага ҳам тўн кийдиришди, кўлларимизга тугунлар тутказишиди. Нихоят, уни уйига – Кичик Ганжиравонга қайтариб келдим. У болаларини чақириб, тугунларини киргизиб юборди-да, ишхонасига – Данғара ҳокимииятига ташлаб ўтишимни сўради.

– Ҳой, оғайни, – дедим, – шундоккина темир йўл кўпригидан ўтилса, Данғара-ку, менинг ишхонам бошқа томонда бўлса.

– Келинг энди, ташлаб кўяверинг, хозир ўзи кечга қолдим, ҳоким қовоғини солмасин, – деб қўярда-кўймади.

Хуллас, йўлим чўзилса ҳам, уни Данғара ҳокимиияти биноси олдига олиб бориб қўйдим. Машинадан тушди. Ҳурмати учун мен ҳам тушдим. Шоир хайрлашиш олдидан мендан дуо талаб килувди, чақчайиб, тиззам билан кетига бир нуқилаб қўйдим. У ҳайрон бўлиб: “Бу нимаси энди?” – деб тумтайган эди, мен зардамни тўкиб дедим:

– Сени тўйларга олиб бориб, ош едирдим, тўнлар кийдинг, зиёфатли тугунлар билан қайтдинг, мана, ишхонангача келтириб қўйдим. Сендан дуо эшитиш ўрнига, сени дуо ҳам қилайми энди? Э, ўша сени!..

Неъмат қизиқнинг эҳсони

Кариялар уйи учун эҳсон йиғаётган хайрия гурухи аъзолари Неъмат қизиқнинг уйига келиб, кариялар уйи учун бирор нарса эҳсон қилишини сўрашибди. Неъмат қизик: “Бир зумгина кутиб туринглар”, деб уйига кириб кетибди-да, сал ўтмай, меҳмонга келган саксон ёшли қайнонасини етаклаб чикиб, дебди:

– Мана, шуни олиб кетаверинглар.

Тошкентдаги меҳмондорчилик

Қўконлик таникли инсонлардан бири Ҳамидхон Қодиров билан Тошкентга бордик. У бизни кўярда-кўймай якин қариндошларидан бириникига олиб борди. Қариндошлари аэропортнинг шундоккина бикинида, самолёт ердан кўтарилиш олдидан катта тезлик оладиган жойда экан. Мезбонлар бизни жуда чиройли кутиб олишди. Дастурхон шоҳона. Қани энди у ҳовлида яйраб ўтиришнинг иложи бўлса. Самолётлар ўкирганча, бири учиб, бири кўниб турибди. Жонивор тезлик олиш олдидан шунақангичучли шовкин кўтарар эдики, таърифига тил ожиз.

Биз мезбондан рухсат беришларини сўрасак, “Меҳмон Аллоҳдан, жавоб мезбондан” деб холижонимизга кўйишмади. Меҳмондорчилик авжида-ю ҳар самолёт учганда юракларимиз “шув” этиб кетади. Ҳамидхонни тутиб, туришимизга фотиха олиб беришни сўраганимиз сари, янги-янги таомлар келиб турибди.

Хуллас, кечкурун қайтиб келиш ваъдаси билан зўрға жавоб олдик. Энди бирорта меҳмонхонага бориб, ором олайлик, десак Ҳамидхон яна бошка бир жойга олиб кетди.

Бошида эътибор бермаган эканмиз, билсак, биз

тушган ҳовли билан темир йўлни бир девор ажратиб турар экан. Паравозу тепловозлар бирам вишиллайди: “Вата киш, вата киш”. Бирданига чинкириб гудок беришини мен айтмай, сиз эшитманг: хар гудок берганда юракни чанглалаймиз.

Хуллас, ўша куни мезбонлар ва Ҳамидинг илтижоларига қарамай, меҳмонхонада тунадик. Эртаси Ҳамид яна таклиф қилди: – Яна бир қариндошим келганимизни эшитиб, меҳмонга айтди. Кирмасак бўлмайди.

Бу сафар кўп қаватли уйлардан бирига олиб борди. Не кўз билан кўрайлики, бу уй энг серкатнов, трамвай излари кесишган, шовкин сурон 24 соат тинмайдиган йўлнинг шундоккина ёқасида экан. Биринчи таом тановул килингандан сўнг шу ерда тунашга олиб қолмасин, деб жавоб сўрадик.

– Шошилманглар-да, – деди Ҳамид, яна бир жойга оборишим керак.

– Пешонамизда яна нима ёзуғимиз бор, – дея нола қилдик, – хойнаҳой, энди темирчиларнинг маҳалласига олиб борсанг керак?

– Йўқ, жуда унчалик эмас, – дея таскин берди Ҳамид Кодиров, – анча тинч жой, Камаз машиналарга ёқилғи куядиган шахобча ёнида.

Нима килсак экан-а, борсакмикан, бормасакмикан?

Мен билан юрсанг...

Бу сафарги таътилда ҳамма ҳаётий ташвишларни бир четга суриб кўйиб, дам олишга қарор қилдим. Ессентукидаги “Қозогистон” санаториясига кетадиган бўлдим.

Окибагли биродарларим: Махмуд Ҳошим, Мухтор, Баҳодир, Сойибжон, Марат, Солижон Охун, Саттор Халил, Ҳаким aka Мусобеков, Эркин aka

Махмудовлар кузатгани чиқиши. (оламдан ўтганларини Аллоҳ раҳмат қилсин).

Хуллас, хайр-маъзур куюқ бўлди. Мухтор жомадонимни кўтаришиб чиқди. Купе ойнасидан бош чикариб, дўстларимга миннатдорчилик билдириб, яна бир бор хайрлашдим ва Мухторга қараб, афсус оҳангига айтдим:

– Сенинг ашуаларингният бир ой эшиитмас эканманда.

– Нима килай, сен билан кетворайми?

– Ҳа, юравер, – дедим унинг гапини ҳазил фаҳмлаб.

Сўнгра у ҳам ойнадан бош чикариб, кузатувчи биродарларимизга зълон қилди:

– Ўртоклар, мен Мансур билан Ессентукига кетяпман, Обидахонга айтиб қўйинглар.

Шу захотиёқ поезд чинкириб гудок бердида, “вата киш, вата киш” деб юриб кетди. Ҳамма ҳайрон. Мен эса, йўл-йўлакай Бешарикда тушиб колар, десам, тушмади, Конибодомда тушиб колар десам, тушмади. Ҳа, Ховосда бирор иши бўлса керак, деб ўйласам, у ерда ҳам, ҳатто Тошкентда ҳам тушмади. Шундан сўнг билсан, бу кетиш ҳазил эмас чин экан. Таксиримнинг эгнида финка кўйлак, оёғида хонаки шиппак, чўнтағида 1961 йил курси билан 11 сўмгина пули бор экан.

Москвада икки кун тўхтадик. Ўша ерлик Александр деган дўстим пойтахтни роса томоша қилдириб, Минвода поездига ўтказиб юборди.

Поезднинг поезддан фарки бўлар экан. Москвагача мазза килдик – тўрт беш хил таомлар, ҳар хил ичимликлар. Пойтахтда ҳам майшат зўр бўлди. Аммо, Минвода поездидаги йўловчилар купени ҳам, СВ маҳсус вагонни ҳам тан олмас экан. Бизнинг тўрт одамга мўлжалланган купемизга ўн икки киши жойлашиб олса бўладими? Чой, овқат деганларини

факат тушингизда кўрасиз. Амал-такал килиб, Ес-сентукига етиб келдик. Мен санаторияга жойлаш-дим, Мухторни кунига саккиз сўмдан квартирага жойлаштиридик. Ана машмаша-ю мана машмаша... Кундузлари сайр-томуша, кечкурунлари ресто-ран базм. Уч тўрт кундан сўнг хисоб-китоб килиб кўрсам, бу кетишида Ессентукида мардикорчилик килмасак, қайтиб кетолмайдиганга ўхшаймиз.

Аллоҳдан бўлдими, Целеноградлик бир Абас де-ган қозок “билиярд ўйнасинғми?” деб колди. “Ҳа, майли” деб ўйнадик. Бир оздан сўнг ақчага ўйнадик. Уч тўрт партияни ютказиб, бор пулимдан айрилдим. Аммо, разм солсам, у ҳам ўйинга жуда уста эмас экан. Эртаси куни яна, ўйнаймиз, деб туриб олди. Қайтишга совға саломга ажратиб кўйган пулим, Мухторнинг ўн бир сўмини таваккал килиб тикдим.

– Мана шу пулим колди, нима бўлса бўлар, ютсанг-ютиб олақол, – дедим.

Омадим келиб, биринчи ўйинда 8–3 хисобида ютиб олдим.

Яна ўйнадик, ютиб олдим. Ҳуллас, қозок Абас-нинг уч юз эллик сўм пулинни ютдим. Ҳурсанд бўлиб, Мухторга “энди ашулангни ванг кўй” де-дим. “Ўртар” дан олган эди, атрофимизни тумонат одам ўраб олди. Бир кун олдин тушкунликка тушиб, “энди нима қиласиз Мансур?” деб юрган Мухтор-нинг кайфи чоғ. Ўзи ҳам менинг пулимга ишониб, Боймет деган бир совхоз директори билан шахмат ўйнаб, бир сиким пул билан хонамга кирнб, нима дейди денг: “Мана шунаقا дўстим, мен билан юрсанг, кам бўлмайсан, пулинг кўпаяверади, биз ҳам тўралардан бўламиз...”

Эзинг

Ҳабибжон Ҳожиматов, Рашиджон Аҳмедов, Махмуд Ҳошимов, Сойиб Алиев, Мухаммаджон Ақбаров сингари қадрдонлар тўпланишиб, кулупнай сайли баҳонасида қўлларида ошнинг харажати билан бизнинг боғимизга келишди. Коронғи тушиб қолган, чирок ёкиб, кулупнай кидиришди.

Катта бир заводнинг раҳбари бўлган Муҳаммаджон лавозимиға яраша оқ кўйлак, галстукда. У бир ховуч кулупнай териб, қаерга кўйишни билмай, оқ кўйлагининг кўкрак чўнтағига авайлаб солди. Буни сезган Сойибжон орқадан келиб ўша чўнтақ аралаш кучди ва қаттиқ кисишига тушди. Дўст деган ҳазилни кўтаради-да, Мухаммаджон пинак бузмасдан кулимсираб, тагдор сўз котди:

– Янаям каттикрок эзинг, суви энди киндикка келди. Шу бўлди-ю Мухаммаджон “эзинг” деган лакаб орттириди.

Балиқчилар анжуманида

Муҳтор Мирзажоновни туманга янги техникалар ва пахта териш машиналари бўйича бош мухандис вазифасига ишга олдик. Айни пахта терими кизиган пайтда райком секретари Абдуфаттоҳ aka Ҳамролиев менга кўнгирок килиб: “Бу ёқда шунча иш туриб, Муҳторингиз Тошкентда нима килиб юрибди?” – деб қолди. Буни қаердан эшитганини сўрасам, телевизорни кўйиб кўринг, деди.

Шоша-пиша телевизорни кўйдим. Қарасам, балиқчилик хўжаликлари фаолларининг республика анжумани бўляпти, Муҳтор биринчи каторда карсак чалиб ўтирибди.

Тошкентдан кайтганидан сўнг уни чакиртириб: “Сени техникалар бўйича масъул ишга кўйган

бўлсаг-у нега ўзингча балиқчилик соҳасига ўтиб олдинг, жипирик”, деб бўралашга тушдим. Шунда Мухтор безрайиб туриб деди:

– Эсингиздами, бир оғиз “юр” деганингизда, сиз билан бирга Ессентукига шиппакда борган эдим. Балиқчиларнинг раҳбари Орифхон ака ҳам “юр, Тошкентда ўйнатиб келаман”, деган эди, кетавердим. Баттар бўлсин, телевизорда у колиб, нукул мени кўрсатишди.

Энангнинг даҳанига ўхшагани

Май ойлари эди, кабинетда ишлаб ўтирсам, бозоркўм Мухторжон ака телефон килиб қолди. Гўшакни кўтарсам, кулги овозлари келади-ю маънили гап йўқ.

– Нима бўлди ўзи, Мухторжон ака, тушунтириб айтсангиз-чи.

– Хи-хи-хи, анави Мақсадали ака бор-ку, Оқжарлик... хи-хи-хи... йўқ, кулги бостириб келяпти, айтолмайман, хи-хи-хи...

Мухторжон акадан тайинли гап ололмагач, бошка хангоматалаб танишлардан суриштириб, воқеанинг тагига етдим.

Оқжарда Мақсадали ака деган бир бободеҳкон бор. Ёшлигида зўр чавандоз бўлган. Ўзи барваста одам. Нос чекканда кафтини тўлдириб отади. Шу киши хандалагини элдан ўн-ўн икки кун олдин етиштириб, бир копини Кўкон бозорига олиб келибди. Растага териши биланок, атрофдагиларнинг кўзи қуйибди:

- Ие, ҳандалак чиқибди-ку!
 - Отасига раҳмат-ей, йўлинни топиб, эрта пиширибди.
 - Юракдан чикариб, ҳафсала килган-да.
- Шу пайт уч-тўртта олибсотар йигит келиб, хан-

далакнинг нархини ерга уриш учун олифта гап қилишибди:

– Отахон, тулкининг моягидек келадиган бу ҳандалаклар қанчадан бўлди?

Максудали аканинг ҳазилакам жаҳли чиқмабди. Тўғри-да, ҳандалакларни минг азоб билан парвариш қилса, машинадан машинага кўтариб юриб, олиб келса-ю чойнакдай келадиган нарсани булар алланима балоларга тенглаштириб турса. Ҳартугул, жаҳлини бир амаллаб босибди, кафтини тўлдириб носни отиб:

– Ана шу айтқанинг беш юз сўм, анави энангни даханига ўхшаб етилиб-ёрилғанлари – минг сўмдан, – деганида, харидорларнинг орасида турган хотин-халажлар тум-тарақай бўлиб кетишибди.

Ўзгарувчан дунё

Галдаги янги йилни дўстимиз Абдумалик Фиёсовнинг тўйидаги базмда кутиб олдик (у вактларда тўй базмлари саҳаргача чўзиларди). Даврада бу тўйга кечикиб етиб келган Баҳромжон Эргашев ҳам бор, энг тўридаги маҳсус жиҳозланган жойга мажбуран ўтқазиб кўйилган. Ҳамма амалдорлар унинг атрофида гирдикапалак. Масъул кимсалардан айримлари Баҳромжонга сўз беринг, деб кистовга олишса ҳам, колхоз раисига гапиришни ким қўйибди, деб пайсалга солавердим. Орада Баҳромжонга кўз кисаман, у кулиб қўяди. Охирида тўйнинг эгаси аралашиб, Баҳромжонга сўз беришинга тўғри келди:

– Сўз навбати Энгелс колхози раиси Баҳромжонга!

Шундай дейишимни биламан, Адҳамжон, Ҳамиджон, Ёрқинжон кабилар устимга ёпирилиб келиб: “Хой, галварс, нима иш қип қўйдинг, обком

секретарини колхоз раиси деб юбординг-ку, узр сўра”, адашибман дегин, – дея менга дашном беришди. Мен гапларини рад килдим:

- Мен кечирим сўрайдиган иш қилганим йўк.
- Ҳе, кайфингдан ўргилдик. Сендан нима кетяпти, айтганимизни килиб, узр сўраб кўяверсанг-чи.
- Хоҳламайман. Керак бўлса, мана микрофон, ўтиришни ўзларинг бошқараверинглар. Ҳе, ўша раисни обком секретари дейдиганлардан ўргилдим!

Менга гапларини ўтказа олмагач, Баҳромжоннинг олдига бориб, ўзлари узр сўрашга тушиб, гинахохликка тушиб кетишиди:

– Узр, узр, бу Мансур кўп ичиб юборибди, кечириб қўясиз-да, Баҳромжон. Ўзингиз яхши биласизку, ўзи беғубор йигит. Ҳар замонда бир шунака сандироклаб кўяди-да.

– Ўзларинг сандирокляпсизлар, – деб жилмайди Баҳромжон соатига кўз ташлаётиб. – Мана, соат бир бўляпти. Мен ўтган йилги обком котибиман.

Дунёнинг ишлари ғалати-да. Кундузги мажлисдан салгина кейинрок Баҳромжон амалидан бўшатилгани, обкомнинг биринчи котиби Ғулом Фозилов кечки пайт Энгелс колхозида фаоллар йиғилишини ўtkазиб, Баҳромжонни шу хўжалик раслигига сайлаб кетганини булар ҳали билмасди.

Олтирик сим

Олтириклик машҳур кизиқчи Абдуллажон Тошкентга борибди. Қишлоқдоши Улуғбек Раҳимов билан сұхбатлашиб ўтириб, гап асноси, ўзини “7x7” газетасига таклиф этишганини айтибди.

Баҳор ресторанининг ёнида – дея тушунтира бошлабди Улуғбек, – зинапоядан ўнгга юрасиз, сиз айтаётган киз коридорнинг охиридаги хонада ўтиради.

- Кўриниши канака?
 - Қандай тушунтирсам экан, комати каламдан йўгон, ручкадан ингичка...
 - Тушунтириброк айтсангиз-чи.
 - Аникроғи, ўзимизнинг олтилик симдек.
- Бу гапни Абдулла қизик пайровга тортиби:
- Ие, унакада бодрингбоп эканда...

Ўзим бақа

Чомочлик шоир Миробидни Фарғонага олиб боришга ваъда берган эдим. Ваъдалашган пайтда велосипедда ўрмон хўжалиги идорасига етиб келди. Бироқ, бир дакика кейин нима бўлиши факат яратганга аён, деганларидек, Миробид келгунча Тошкентдан телефон бўлиб, Аъзам Тўрахоновнинг оиласи вафот этгани хақида хабар келиб колди. Бандалик карзини узмасак бўлмайди, фотихага борадиган бўлдим. Миробидга узримни айтиб, кузатиб кўйдим. Кузатиб кўйдим-у пастда бўлган ҳангомани кейин эшитдим:

Миробид тушиб кетаётганда идора ходими Бахтиёржонга дуч келди.

– Келинг, Миробид ака, қандай шамоллар учирди?

- Фарғонага кетябмиз.
- Хўжайн биланми?
- Хўжайнин бақа, – деб кўли билан шимол, яъни Тошкент томонни кўрсатиби: – мен эса Фарғонага
- Ие, Миробид ака, – дея пўписа қилибди Бахтиёржон, – бизнинг хўжайнин сизга бақа бўлиб колдими?! Ҳали шошмай туринг...
- Кечиринг, Бахтиёржон, – дебди ёлвориб Миробид, билмай оғзимдан чикиб кетиби. Мен ўзим бақа, мен ўзим бақа!

Аслзода қиз

Мактабни битиргач, синфдошим Раҳмон Ҳайдар билан Тошкентга жўнадик. Омадимиз келиб, у транспорт, мен молия иктиносид институтига кириб олдик. Бу хурсандчилик шарафига ота-онам ҳар иккимизга хитойи ипак матосидан кител-шым тикидириб берди, унинг онаси эса биттадан пуфайка (кишда кийиладиган костюмсизон пахтали кийим) совга қилди.

Кеч куз пайти бўлишига қарамай, Раҳмон каминани паркка бошлади: “Бир ўрис қиз билан танишдим, ҳозир келса кўрасан, ана ҳуси, ана фигура! Бунакасини Ўзбекистон тугул, Россиянинг ўзиданам тополмайсан. У ёғини суриштирсанг, аслзодаларнинг аслзодаси экан, Николай пошшонинг авлодиданман, деди”, деб гапиришга тушди. Қиз келди, анча келишгангина экан. Уларга ҳалакит бергим келмай, кинога кириб кетдим.

Кинодан чиқсан, паркнинг дарвозаси ёнида Раҳмон юлка кўйлакда дилдираб турибди. Бориб, ахвол суриштирдим. Қиз совқотиб колмасин деб пуфайкасини елкасига ёпиб кўйган экан. Бир оз сайл қилишгач, бутерброд олиш учун кафега кириб, кайтиб чикса, “аслзода” қиз ҳам йўқ, пуфайка ҳам эмиш.

Уч тийин ҳангомаси

Талаба ўртоқларимиздан бир гурӯҳи янги йилни Себзордаги биз яшаб турган ижаҳаҳонада кутиб оладиган бўлишди. Мехмонлар келгунча харажат қилиб келиш учун Ҳамиджон билан Раҳмонни етаклаб, бозорга жўнадим. Зарур масалликларни ҳарид қилиб, яна трамвайга чиқдик. Ҳар биримизнинг кўлимизда иккитадан тўрхалта бўлгани учунми,

ким трамвай кира тўласа, фалон бўлсин, деб Раҳмон Ҳайдар айнитиб юборди. Кондуктор тиқилинч килаверди, биз уч тийинлик йўлкирага пастлик қилиб туравердик, анча жанжал бўлди.

Бекатимизга етганимизда, кондуктор биздан олдинрок тушиб, нарирокда турган мелисаларни чакирди, йўл ҳақини тўлашмагани етмагандек, аёллигимният хурмат қилмай, ёмон сўзлар билан сўкишди, деб арз килди.

Мелисалар қўлимиздаги ашқал-дашқаллар билан таянч пунктига олиб кириб кетишиди. Тергашди, туртқилашди, роса таъзиришимизни ёдик. Энг ёмони, қўйиб юбормай, олиб ўтиришаверди. Тунги ўн иккига занг урилганда улар стаканларга ул-бул куйиб, мушакбозликни кўргани ташқарига чиқиб кетишиди. Пайтдан фойдаланиб, халта-хулталаримизни кўтарганча, ура кочдик.

Келсак, квартирадаги шеригимиз ҳам, меҳмонлар ҳам бирининг оёғига бири бош қўйиб, ухлаб ётишибди. Биз ҳам можаролардан каттиқ чарчаган эканмиз, уйкуга кетдик.

Эртаси эрталабданок турли-туман таомлар тайёрлаб, ўтиб кетган янги йилни яйраб “кутдик”. Раҳмон Ҳайдар кадаҳ сўзида нима дейди денг:

– Агар кеча трамвайга пул тўлаганимизда, уйга вақтида келиб, мана бу ноз-неъматларни кечаси еб битирган бўлардик. Мана, хозир bemalol мазза қилиб еб-ичяпмиз. Яхшиям, мелисанинг кўлига тушганимиз!

Ҳаммаси ўзимизники

Тошкентга, Ҳалим Шарипович деган акахонимизнинг ўғил уйлаш тўйига бордик. Бизни маҳсус ажратилган залга олиб киришди. У ерда нуфузли одамлар: вазирлар, банк бошқарувчилари, ҳокимлар ва бошқа казо-казолар салобат билан ўтиришар эди. “Ассалому алайкум”, деб кириб бордик. Факат Шермуҳаммад ва яна бир икки киши бизни таниб, мулозамат қилиб, ўрниларидан қимиirlаб қўйишиди. Орадан беш дақика ўтиб сексаптолог-уролог, профессор Неъмат ўртогимиз викор билан кириб келди. У зал эшигига пайдо бўлиши билан ҳамма бамисоли синфхонада ўқитувчини кутиб олган мактаб болаларидек ўрнидан туриб, “келинг дўхтир, қадамларига ҳасанот” деб мулозаматни жойига қўйиб, ўз ёнларига таклиф қилишиди. Аммо у бизнинг ёнимизга келиб ўтирди.

Камина, секингина, обрўйинг зўр-ку, биродар, койилман, десам бир қимиirlаб баланд овозда: “Буларнинг бариси простата деган балои азимга дучор бўлган мижозларим” деди беписанд оҳангда.

Гердайиб, бир-бирига гап бермай ўтирган казо-казолар бу “танишириш”дан мунғайиб, кўзларини ерга қадаб, сувга тушган мушукдай ҳолатга тушдилар.

Билмаган киши бўлиб, “Бу қандай касаллик?” деб сўрасам, ёнимиздаги столга нигохини қадаб, сен буни Шермуҳаммад Ўринбоевдан сўра, хар ҳафтада уч марта шимини тушираман, тўғрими деса бўладими?

Шермуҳаммад бир энтикиб, “Ошга келмай ўлай” дегандай кип-кизариб, гина килди: “Ҳеч кимга айтмайман девдингиз-ку, дўхтир”.

– Бу ерда бегона одам йўқ, – деб изоҳ берди дўхтир. – ҳаммаси сизга ўхшаган, так что, хижолат бўлманг.

Буни эшитиб, бир зал одам бирданига хиринглашиб, бизнинг юзимизга қарай олмай хайр-маъзурни насия килиб, ўринларидан туриб кетаётсалар, дўхтири Немат нима дейди денг:

– Овора бўлиб келиб юрманглар, беш кун бўлмайман, командировкага кетяпман!

Патефон

Мулкобод совхози омборчиси, “палов” лақабли Мамажон ака Кримдаги “Ўзбекистон” санаториясига йўлланма олибди. Дастёрлик қилиб юрар, деб бўғолтири Абдуманнониям олиб кетибди.

Келганларига бир хафта бўлмаёқ, бир хил хаётдан зериккан Мамажон палов: “Абдуманнон, аёллар иштирокида бир зиёфат уюштиранг-чи”, деган экан, русчада: “Я гўст, солнничний Ўзбекистан”, дейишдан бошкани билмайдиган бўғолтири чучмолланиб юриб, охири ишни уddaлабди. Аёллар уларни бир уйга бошлаб борипибди. Улар патефонда мусика кўйиб, бир қултум ичишармиш, танцага тортишармиш, бир қултум ичишармиш, танцага тортишармиш. Мамажон палов пишиллаганича ўйин тушаётиб: “Хе, патийпонингга ўт тушсин”, деб ўзбекчалаб кўярмиш. Охири бутунлай ҳолдан тоийиб, Абдуманнонга бакирибди:

– Хов! Мени майшатга бошлаб келдингми, танса тушишни ўргатадиган тўгаракками дермиш.

Сабр берсин

Фарғона вилояти “Адолат йўли” газетасига укахонимиз Холикназар бош мухаррир. Унга муовинликка катта бир идоранинг тавсияси билан иқтидорли ёзувчи, катор-катор асарлар муалифи Ҳусан Каримов тайинланибди. Улар газетанинг Қўқон депараси бўйича мудирлиги ҳамда маҳсус мухбирликка шижоатли, истеъододли, тажрибали одам топиб беришни сўраб, каминанинг ҳузурига татриф буюришди.

Бир пиёла чой асноси Ҳусан Каримов шундай деди: – Биз бош мухаррир Холикназар билан келишиб олдик. У тажрибали журналист, шу туфайли газетани тайёрлаш, чиқариш, журналистика билан боғлиқ ишлар унинг зиммасида. Молия, обуна, кадр танлаш, қўйиш, ишдан олиш каби масалаларни мен зиммамга оладиган бўлдим, деганда бир оғиз ҳам гап қўшолмай калласини лиқиллатиб, гапларини тасдиклаб хомуш ўтирган Холикназарга қараб:

– Пешонангда шу Ҳусан Каримов билан ишлаш, ҳамхона бўлиш битилган бўлса, биз бандай ожизлар нима ҳам қила олардик – деб камина дуога қўл очган замон устоз Миробид, Аъзам Назирий, Ноҳсир Зоҳид, Яхёнлар бир овоздан, охири баҳайр бўлишига ҳам яна бир дуо қилинг ака деб колишли:

– Ҳа, окибати баҳайр бўлсин, Холикназар, Аллоҳ сенга сабр-каноат берсин, бу тақдир ука пешонанг шўр бўлмаса, Ҳусан билан ишлаш насиб қиласмиди. Биз бандалар нима ҳам қила олардик, деб дуо қилганим захоти, юраги тўлиб турган эканими, Холикназар пўкиллаб, йиғлаб юборса бўладими.

Унвон

Эркин Воҳидов, Ўткир Ҳошимов, Анвар Обиджон, Иқбол Мирзо, Аҳмаджон Мелибоев, Дадаҳон Нурий, Азим Суюн ва бошқа бир канча ижодкорлар Қўонга Фурқат таваллудининг 150 йиллигини нишонлаш учун келдилар. Қўоннинг шеърият ахли билан қадрдон, улар билан кўп мулоқотда бўлган, ҳар бир шоирнинг ўзи, оила аъзоларини кўяверасиз, хатто итининг лақабигача биладиган шоир, ҳажвиёт калонларидан Анвар Обиджон ҳамроҳларига Аъзам Назирийни таништириб:

- Эркин ака, бу кишини биласиз-а? – деди.
- Таништирансангиз, билаверамиз, кўринишларидан учаргина савдогарга ўхшайдилар, – деди Эркин ака.
- Учарликка учар-у яшин тезлигида шеър ёзишда унга тенглашадиган етти иклимда бўлмаса керагов, тасаввур килинг, бир монтёр симёғочга чикиб, электр симини тузатаётганда ток уриб, симёғочдан ерга қулади, то унинг жони чикиб улгургунича Аъзам Назирий бу монтёрнинг симёғочга чикканлиги, ток ургани, йикилгани, жон талvasаси, ўлгани хақида “Ток урди” сарлавҳаси остида юз мисралик шеър ёзиб улгуради.

Эркин ака ва унинг ҳамроҳлари, “Ё пирай, мабодо унинг ота-онаси бошқа планетадан эмасми?” деб ёка ушлаб колдилар.

Таништиришни Анвар Юнусов давом эттириди:

- Тахаллуслари “Довулий” эди, якинда Мансурхўжа унга “Аъзам Файз” деган тахаллус берди.
- Унвонлари ҳам бордир? – дея сўради меҳмонлардан бири.
- Унвонми? – деди Анвар Юнус, – унвони “Қўкон ҳалқ шоири”, – деганларида қажқаха оламни тутди.

Азадаги қизиқчилик

Довруғли артист, ўзбек лапарчилигининг пири хисобланган Раҳима опа Мазохидова бир воеани кула-кула айтиб берганди:

– Жўрахоннинг қариндоши бўлмиш Қори почча вафот этдилар. Таъзияга бордик. Жўрахон ҳам тўн кийиб, бел боғлаб турибди. Одат бўйича тобутни ўртага кўйишди. Қариндошлар йиги беришди, орада: “Бешигингиз куллуг бўлсин, дадажон” дейишган эди, тобутнинг олдида тиз чўкиб турган Жўрахон асқиячи; “Ана, Қори дадам “куллуг, куллуг” леб жавоб берябдилар”, деганда, йиғлаб турган эркагу аёл кулгиларини қандай яширишни билмай, кўлларида чит рўмолларини юзларига босдилар.

Кутуриши

Истеъоддли бастакор, “Фарғона тонг отгунча”га куй басталаган устоз Мухторжон aka Муртазоев қариган маҳалларида тез-тез “зарур жой”га югурадиган касалликка чалиндилар.

Кунлардан бирида Илҳомжон Ҳамидовнинг уйига меҳмонга боргандилирида, икки-уч марта ҳалиги жойга чикиб келибдилар. Ҳалиги жойнинг ёнида итнинг уйчаси бор экан, Мухторжон аканинг ҳадеб ўтаверганига ғаши келибми, янги туғилган кучукларини кизғанибми, ит у кишининг болдиридан тишлаб олибди. Додлашни эшишибоқ, ҳамма ташқарига отилиб чикса, устоз уларга караб бақирибди:

– Менга яқинлашманглар, баданим қизияпти, кутурганга ўхшайман. Вов-вов-вов! Вов-вов-вов!

Ебсан

Кўқонлик Носиржон нефт базанинг тўй маросимидағи зиёфатда қатор савдо дўконларининг директори, ичганда тентак, ичмагандага олийжаноб Абдушукур шу зиёфатда хозир бўлган халк артисти Раҳима опа Мазоҳидовага коняқ узатди. Опа ичмасликларини айтиб, узр сўрасаларда, дам “ўзининг” шеърларини, дам Умар Ҳайёмнинг машхур рубоийларини айтиб, кистайверди. Опа хижолат бўлиб;

– Мен бунака нарсаларни ичмаганман, ичмайман ҳам, узр, деганлари сари кистаб:

– Менинг заррача ҳурматим бўлса ичасиз, деб елимлик қиласаверди. Опа яна узр сўрадилар, ёшлирини пеш килдилар, бўлмади.

– Ёшингиз ўтган бўлса ҳам, кўнглингиз ёш, кани олинг, деганда тўлиб турган опа портлаб кетиб:

– Фалонимни ебсан – дегани ҳамоно Абдушукур бир-иккита ўзига ўхшаган улфати билан эшикдан кочиб чикиб кетаётса, опа уларнинг орқасидан: “Аюв, аюв” деб қарсак чалиб юборибдилар.

Чаласи бор

Машхур хоғиз Мулла Тўйчининг ўғли Абулкосим бир ўтиришда хоғизи замон Расулкорига кадаҳ узатиб, “ичинг, кетар” деб зўрлайверибди. Охири корининг аччиклари чикиб, ўзларининг янгиқўрғонча талаффузларида “Хўп майли, Абулкосим, бу винами-окми” деганди, Абулкосим зингиллаганча кочиб чикаётиб, эшик тагида тургандарга: “Бай-бай, бирор эшиитмасин-а, ҳазил” деб турганда орқадан Расулкори айтармиш: “Қани у, чакиринглар, хали чаласи бор”.

Тунги тарсаки

Раҳмон Ҳайдар Себзордаги ижарада турган жойимизга келди. Чойлашдик, алламахалгача гаплашиб ўтиридан. Ниҳоят, кеч бўлғанлиги, эрталаб ўқишдан кечга колмаслик учун кетиши кераклигини айтди. Узрини қабул қилиб турган эдик, бирданига фикри ўзгарди:

- Роса ўтирибмизда, охирги трамвайдан ҳам кеч колдим, – деб биз билан қоладиган бўлди.
- Начора, яхши бўларди, – деб қўя колдим.

Биз ҳамхоналар: камина, Абдуллажон, Ҳамидхонлар ярим кечаси тарсаки товушидан уйғониб кетдик. Маълум бўлдики, Раҳмон Ҳайдар биз пинакка кетганда хонамиз рўбарўсида турадиган ўрис хотиннинг ёнига кирибди. У дод солганда секингина биз ётган хонага қайтиб чикиб, жойига ётиб олибди. У аёл хонамизга кирибди. Кўрсаки, ҳаммамиз ширин уйқуда, биргина Раҳмон инжайиб ётган эмиш. Тарсаки Раҳмон Ҳайдарнинг қулоқ аралаш юзидан келаётганлиги сабаб, биз чўчиб уйғондик.

Яқинда учрашиб қолдик, ҳамма бўлган воқеаларни китоб килмоқчиман, сен билан жуда кўп саргузаштлар бўлган, десам, ҳаммасини ёз-у аммо тунги шапалокни ёзма, деб ялиниб қолди.

Ёзаймикан-ёзмаймикан, бошим котиб қолди.

Энди тешворадиган бўлади

Таникли ёзувчи Йўлдош Сулаймон бир гурух шоир ва ёзувчилар – Дадаҳон Нурий, Сайдали Одилов, Анвар Юнус, Адҳам Мирсаидлар билан Оқжар депарасидаги 11-ўрта мактабга учрашувга келишибди. Мактаб директори, шоир Турсунбой Қамбаров учрашув охирида Йўлдош акага сўзни берди. Йўлдош Сулаймон ўзининг асарлари асно-

сида тайёрланган адабий-музиқавий тадбирлардан бехад таъсирланиб, темир туткичдаги микрофонни кўлига олиб, мактаб ўқитувчи ва ўқувчилариға миннатдорчилик изхор эта бошлади. Шунда бирдан микрофон сими узилиб кетибди. Қарангки, микрофоннинг ўзигина ёзувчи қўлида колибди. Йўлдош ака бундан бехабар микрофонни иккала қўли билан маҳкам ушлаганча сўзида давом этаверибди.

Пастдаги аёллар эшийтмай, “каттирок-каттирок”, деб жовур-жувур килгандагина монтёр симни улабди. Шунда Йўлдош Сулаймон айтармиш: – Ўзимам билувдим-а, биринчи қатордаги аёллар, каттирок-каттирок деганди, ана энди, тешворадиган киласман!

Эшак минган Назиржон

Ёзниг иссиқ кунларида Кўрик қишлоқилик Назиржон сой бўйлаб кетаётса, Олтикуш қишлоғининг болалари эшак миниб юришган экан. Ёшлиги кўзиб, у ҳам эшак миниб, у ёқдан-бу ёкка бориб келибди. Эшак тулаган экан, шимига жунлари ёпишиб колибди. Уйга келиб, хотинига рўбарў келибди.

– Вой ўлай, бу нимаси, – дебди хотини, – ҳаммаёғингиз жун-ку? Назиржон эшак минганини яшириш учун баҳона тўқибди:

– Келаётсан, кўшни кигиз коқаётган экан, мен ҳам ёрдам килиб, коқишиб юбордим.

– Шимни ечиб қоксангиз бўлмасмиди? дермиш хотини.

Чапақай

Моҳир асқиячи Неъматжон дўстимни табриклаб қўйдим:

- Эшитишимча, хўжайнинг Тўлқинжоннинг ўнг кўли бўлиб қолибсан.
- Нотўғри эшитибсан, хўжайн чапақай.

Ичайликми

Дўстим Маҳмуд Ҳошимов, кел, синглинг шовла киляпти деб қолди. Мен ичайликми? – деб сўрасам.

- Олдин овкат пишсин, – дейди. (Ичак қўшилган шовла маъносида)

Қамаӣверасанми

Олтиарик раисполкомнинг раиси Аҳмаджон Маматхонов 1983 йили кеч кузида пахта пунктида йиғилиш ўтказди. Сўз бошлашдан олдин залга кўз югуртириб чиқди. Чакиртирилганларнинг барчаси бору фактат Жонибек бўлими мудири Мирзаабдулла қўринмайди.

Маматхонов: – Қани, бу Жонибекнинг мудири?

Милиция бошлиғи: – Ўзингизнинг буйруғингиз бўйича пахтани сувга бостиргани учун эрталабок камаб қўйган эдим.

– Қанақасан! – дея бакирди Маматхонов, – қама, деса, камаб қўяверадими? Олиб кел уни, бугун пахтани кам топширганига жавоб берсин!

Қора холига...

Фофуржон Хонкелдиев Данғара туманига милиция бошлиғи лавозимиға ишга келди. Албатта, уйжой масаласи ҳал бўлишини икки-уч ой кутишга тўғри келар эди. Хонкелдиев исполком раиси сифатида каминага уй-жой масаласи ҳал бўлганини маълум қилиб, Кўконга тушиб келишини айтди.

– Ростданми? – дея ишонкирамай сўрасам, – ха, оиламни ҳам кўчириб келмокчиман. Сиз ўзимизда қурилаётган “дом”ни икки ойда битади, деганингиз учун бу масалани кечаги бир маросимда Кўкон ИИБ бошлиғи Мадиёровга айтган эдим. У масалани койилмақом қилиб ҳал килди.

Орадан тўрт кун утди.

Хонкелдиевни учратиб: – Табриклайман, оилангизни ҳам кўчириб олиб келдингизми? Квартиранинг унча-мунча камчилиги ва ремонтига ПМК-47 – ёрдам беради – деганим борми, ҳасратидан чанг чикиб кетди:

– Э хўжайн, сиз сўраманг, мен айтмай. Вилоятда милиция куни нишонланган эди. Йиғилишдан сўнг бошкарма ичидаги ошхонага таклиф этишиди. Кўкон милицияси бошлиғи Неъматжон Мадиёров билан ёнма-ён ўтирдик. Ҳалиги, очигини айтсам, бир-икки пиёла бўлувди. Уй-жойдан гап чикиб кетди. Мен бу масалада бир оз кийналганимни, бир-икки ойсиз уй ололмаслигимни айтувдим, Мадиёров: “Эртага кел, сен хоҳлаган мавзедан икки ёки уч хонали уй олиб бераман, оилангни ҳам олиб келавер” деди. Бу хурсандчиликка яна бир-икки пиёла олдик. Кўпчилик мени табриклишди. Менга сўз беришганда кадаҳ сўзини Неъматжонга бағишилаб, “Отам қилмаган ишни килдингиз, бир умр эсимдан чиқармайман, сиздек мард инсоннинг хизматингизда бўламан, сиз учун иккиланмасдан жонимни ҳам

беришга тайёрман” деб кўзимдан ёш ҳам чиқиб кетди.

Қайтаётиб Бағдодда тўхтадим. Оиламга: “Эртага Кўконга кўчамиз, сенлар ҳам қийналиб кетдиларинг” деб тасалли ҳам бериб қўйдим. Эрталаб сиздан жавоб олиб, Кўкон ички ишлар бўлимига кириб, Мадиёров билан қўришгандан кейин, яна миннатдорчилик билдириб: “Уйни ким кўрсатади?” деб сўрасам: “Қанақа уй? Тентакмисан? Кайфда ваъда бергандирман. Ўзим беш ойдан бери кабинетда ётиб юрган бўлсам, сенга уй каёқда? Хе, сени началник килиб кўйганлардан ўргилдим” деб, унинг кетидан Шералиними, Шерзодними шеърини ўкиди. Эсимда колгани шу бўлдики, кимдир Самарқанд билан Бухорони бир қора холга бериб юборибди.

Камина кулиб: – “Агар кўнглимни шод этса, ўшал Шерозлик жонона, каро холига бахш этгум, Самарқанду Бухорони” деган шеърни ўкидими? – деб сўрасам, – Ие, сиз ҳам биласизми бу шеърни? – деди мунғайиб шўрлик Ғофуржон.

Мен ўзим аҳмок

Танти, мард Ҳалим Шарипович Махмудов деган акахонимиз бор. Кисловодск сиҳатгоҳида бирга оиласиб хордик чикарганмиз. Сиҳатгоҳга борган кунимиз кечкурун кинотеатрга тушдик. Икки ўринга тўртта чипта сотилган экан. Ўша иккита ўрин мажаросида танишиб қолдик. Ҳар иккимиз жойларга оиласаримизни ўтказиб, ўзимиз тикка турганча кино кўрдик. Қарангки, нонушта столимиз ҳам битта экан. Бу холат бизни янада яқинлаштириди. Белгиланган муолажаларни олиб бўлиб, тушликдан сўнг уч-тўрт партия пирра ҳам ўйнадик. Омадим келибми, ютиб қўйибман. Ҳалим аканинг бир оз асабийлашганларини юзларидан сездим. Кечки овқатдан

сўнг яна ўйнадик. Бу сафар ҳам бир оз устунлик билан омадим чопди. Ҳазил-хузул билан хайрлашиб, хона-хоналаримизга кириб кетдик. Не ҳолки, алла махалда хотиним эшикни кимдир чертаётганлигини айтиб қолди. Эшикни очсан, Ҳалим Шарипович.

– Ҳа, тинчликми ака?

– Уйкум келмаябди, мени картада бирор киши ютмаган эди, келинг, яна бир ўйнайлик.

– Соат неча?

– Ҳали вактли.

Секин соатга карасам, нақ тунги бир ярим. “Эртага давом эттирайлик, десам, бирорта лўлига ўқитган карта билан мени ютиб олябсиз, юрагим сезиб турибди, дедилар.

– Ҳа, майли, – дедим бир оз юмшаб, – факат шарти бор.

– Қанақа шарт?

– Ютқазган киши бир парча қоғозга “Карта-да ютқаздим. Ютганинг барча топширикларини сўзсиз бажараман” деб ёзиш шарти билан ўйнайман.

Рози бўлдилар. Ҳулоса – икки соатлик ўйин кизғин ўтиб, каминанинг фойдасига ҳал бўлди. Қоғозга шартлар ёзилиб, имзолар қўйилди, бўлган гап шу.

“Кейин нима бўлди?” дейсизми? Ҳа, шу бўйи йигирма тўрт кун сихатгоҳда бўлиб, уй-уйимизга таркалдик.

Нима кўп? Илтимос кўп. Камина ишлаган туманда 150 минг ахоли, колаверса, Қўкондай шахри азимда қанчадан-канча ошна оғайнилар. Бир парча қоғоз: “Ҳалим Шарипович, Болтабоевни фалон касалхонага ётқизишга ёрдам беринг”, “Намозбойнинг ўғли Шухратбекни касалхонага ишга жойлаштиришга ёрдам берворинг” ва ҳоказо ва ҳоказо...

Кунлар ўтиб, Ҳалим Шарипович Республика курортлар бошкармасига бошлиқ бўлдилар. Камина га

яна иш кўпайди: фалончини у сиҳатгоҳга жойланг, пукунчини бу сиҳатгоҳга...

Кунларнинг бирида бир тракторчини “Октош санаториясиға жойланг” деб бир парча қоғоз ёзиб юбордим. Санаторияда жой йўқ экан. Бош врачга катъий топширик берибдилар:

– Жойланг! Хонангизга бўлса ҳам жойланг. Ҳамма топширикларни бажараман, деб бир парча қоғозга тилхат ёзиб, карта ўйнаган мен ахмок, жойланг! – дебдилар. Тракторчи Октошдан қайтиб келиб, менга бўлган воқеаларни айтиб берганда:

Яна икки кишини Октошга юборяпман, – деб Ҳалим акага кўнғирок килиб кўйдим.

Академигингиз курсин

Кунлардан бирида туман прокурори Раҳима опа Хўжаеванинг уйига борсам, дастурхонлар тузалган. Ноз-неъматлар қатори бир ликобда писта, бир лиқобда бодом қўйилган экан. Камина бир пиёла чой асноси шу ликобларга “хужум” килибман. Опа бир-икки томоқларини кириб қўйдилар, аммо камина тушунибми, тушунмайми, чакаверибман.

Опа яна бир “ихи” деб олгач: – Москвадаги профессор дўхтири Михайлов айтдики, киши кунига ўн бир дона писта, ўн бир дона бодом еса, организма фойда, ортиқчаси зиён, – деган. Бу ҳакда “Здоровье” журналида маколаси ҳам чиқкан”, – деган эди, камина ҳам бўш келмай: – Менинг Ленинградда академик Соколов деган дўхтири бор. У киши бир ўтиришда 60 дона бодом, 60 дона писта есанг, организминг учун фойда бўлади, тез-тез еб тур деган. Шунда Раҳима опа:

– Бир соатдан кейин облпрокурор Каримбердиев оиласи билан келяптилар. Шу дастурхондагидан бошқа писта-бодомим йўқ. Ҳе ўша академигингиз курсин. Олтмиш дона эмиш-а, – дедилар.

Камина ҳам бўш келмай:

– Ҳе ўша, ўн бир донадан ошиқ әмагин, деган профессорингиз балога йўликсин, деганим ҳамоно, иккимиз ҳам ўзимизни тўхтатолмай қулиб юбордик.

Дараҳтдаги мушук

Одилжон деган улфатимиз Тўхтасин билан гузардаги чойхонада кеч бўлибди ҳам, турмасмишлар. Тўхтасин: – Вакт ярим кеча бўлди, турайлик энди, – деса, Одилжон: – Келинг, яна бир оз ўтирайлик, – дер эмиш. Нихоят кечки 11 бўлганда таркалибдилар.

Ярим соатлардан кейин Одилжон... у ёги факат ўзларига маълум, Тўхтасинларнинг ёнидаги ҳовлига сакраш учун дараҳтга чикибди.

Дараҳт шитирлашидан уйғониб кетган Тўхтасиннинг отаси Назиржон бува: – Кимdir дараҳтда юрибди, – дея бонг урибди. Тўхтасин: – Дада, сиз ётаверинг, мен ўзим чиқаман, – деб милтигини олиб чиқиб, дараҳтга караса, одам шарпаси кўринибди.

– Кимсан? Ҳозир отиб ташлайман, – деб пўписа килибди.

– Мен Одилжонман, Тўхтасинжон, отманг.

– Одилжонман? Ҳозиргина чойхонада чой ичдик-ку.

– Ҳа, ўша Одилжонман.

– Дараҳтда нима киляпсиз?

– Кейин айтаман, жон Тўхтасинжон, отманг.

– Йўқ, Одилжон ҳозиргина уйига кириб кетди, ёлғон гапирма, барибир отаман!

– Қайтиб чиқувдим-да, жон Тўхтасинжон, ишонинг, бу менман.

Бу машмаша устига Тўхтасиннинг отаси: – Тинчликми? – деб чиқиб келди.

– Тинчлик дада, тинчлик, иккита мушук кувла-

шиб дараҳт устига чиқиб кетган экан, биттаси анови ховлига сакради, сиз хотиржам ётаверинг.

...Шу-шу Одилжон Тўхтасинга: – Сиздан қарзман, ўртоқ бирорвга айтиб юрманг, – деб ялинибди.

Бу сир-синоатдан хабар топган улфатлар Тўхтасинни гиж-гижлаб: – Ўшанда, отаман, деганингизда нима деб ялинган эди? – деб сўрашларини кўймайдилар. Тўхтасин ҳам: – Айтмайман, бу сир, – дейишдан тўхтамайди.

Космос

Ургут туманига раҳбарлик қилган Ўлмас Махматмуродовни танимаган раҳбар бўлмаса керак. Бу тумандаги ибратли ишлар туфайли республика дарражасидаги кўплаб кўргазмали тадбирлар, семинар-анжуманлар шу ерда ўtkазилган.

Маълумингизким, райкомнинг асосий куроли бюро эди. Бюрова масалалар кўрилар, улардан бири партия аъзолигига қабул қилиш эди. Навбатдаги бюро йиғилишида ГАИ бошлиғи Маматқул Мирзаевни партияга қабул қилиш масаласи кўриб чикилди. Бирин-кетин турли саволлар берилди.

Бюро аъзоси Содиқжон шундай савол берди:

– Космос, унинг ўзлаштирилиши ҳақида тасаввурингиз?

– Кеча космосга борган эдим, тинчлик экан. Райкомимиз Ўлмас aka икки трактор, бир булдозер юборган эканлар, ишлаб турибди. Мен ҳам у ерда пост ташкил этиб, бир ГАИ ходимини қўйиб келдим.

Соғувчилардан бюрога сайланиб колган Сарвинисо хайрон бўлди: – Космосга ракета учганини эшитганман. Партияга минг раҳмат, у ерга энди трактор ва булдозерларни ҳам юборибди. Бу ишга жиддий ёндашган ўртоқ Маматқул Мирзаевни партияга қабул қилишни таклиф киласман.

Райкомнинг биринчи котиби Маҳматмуродов Сарвинисога бир ўқрайиб олди-да:

– Хой, ўртотк Мирзаев, гап районимиздаги “Космос” пионер лагери устида эмас, космос, яъни коинот ҳакида кетяпти....

– Агар сиз, ўзлаштири, десангиз, – дебди қўлини кўксига қўйиб Маматқул Мирзаев, ўша ерни ҳам ўзлаштирамиз, пост ҳам қўямиз.

Бюро мажлисида ўтирган милиция бошлиғи ўз кадрини қўллаб-куватлаб:

– Ҳа, ишониш керак, бу қилади, бунинг қўлидан келади, деганда ҳамма нима дейишини билмай, гаранг бўлиб қолибди.

Икромхўжанинг РАФи

Каминанинг Икромхўжа деган қўшнисида 1967 йилда ишлаб чиқарилган РАФ автомашинаси бор эди. Илик-иссик кунлари бир амаллаб юргизади, куздан то баҳоргача уни бир-икки соат итармагунча юрмайди. Ҳар куни Икромхўжа кўчада одам пойлайди. Кўни-қўшничилик, одамнинг юзи иссик, ҳамма шу автомашинани юргизиш учун овора. Ахвол шу даражага бориб етдики, маҳалладошлар Икромхўжа уйи олдидан ўтмаслик учун, айланиш бўлса ҳам, бошка кўчалардан уриб кета бошладилар. Мухсин деган қўшним ҳафталаб Икромхўжанинг РАФи туфайли уйига келмай, ўғлиницида тунайди. Назирхўжа кум маҳалладан айланиб, гузарга келадиган бўлди. Наврўз ўғлимиз бу кўчадан ўтмаганига анча бўлди. Ахрор ўғлим то машина бир ёғли бўлмагунча эшигини қулфлаб ўтиради. Содик қўшни ўн километрни айланиб, катта йўлга чикиб кетади.

Мўмин деган моторолчи Икромхўжанинг РАФини итаравериб, бел оғриғи бўлиб колди. Қай бирини

айтай? Файзиллахўжа амакимиз оёғи тойилиб, мана бир ойки уйидан чиқмай, кўргани кирган Абдулатиф, Норкўзи, Рафикжон ва имомимиз Шерзоджонга, Икромхўжа РАФни йўқотсин, олганига сотиб юборсин, Аҳмад билан Аваз ўғлим эрталаб совуқда машинасини итаравериб, шамоллаб, укол олиб ётибди, ўзим ҳам оёқдан лат едим. Мана, куни кечаги воеа, давом эттириди амаки, Попдан 5 киши ақиқа тўйига келиб, Икромхўжаникида тўхташди. Эрталаб машинани роса итаришди, юргизолмай “Ақиқа” тугаганда боришибди, опалари роса тузлабди, почча аччик килиб, улар билан сўрашмай, кўчага равона бўлибди. Икромхўжага инсоф бериб, РАФини сотиб юборишига бир дуо килинглар, дермиш.

Имомнинг дуоси ҳам ўтавермабдими, маҳалладошлар каминага, сиз ҳам дуо қилинг, Икромхўжага инсоф берсин деб сўрашуви, мен ҳам дуо килиб, маҳалладошларингни-ку ишдан чиқардинг, ўғилларинг Азизхон, Акрамхон, Усмонхонларга ҳам раҳминг келсин, хотининг Махсумахонни ранги бир ахвол, кеча хотинимга йиғлаб, хўжайнингизга айтинг, Икромхўжалари ё мени десин ё РАФни дебди.

Куни кеча эшитсан, нихоят, машинани Жиззахга сотибди. Ишдан борсам, маҳаллада байрам, ҳамма машина қайтиб келмаслиги учун кўлларини очиб турганларида мен ҳам, аввалию охиргиси бўлсин, бундай автомашиналар Икромхўжага бошқа насиб этмасин, машинани сотганинг учун бир зиёфат берасан десам, зиёфатни маҳалладошлар килиб берсин мана, итаришдан кутулишди, деса бўладими?!

Ҳамма ҳангуд манг бўлганча қолаверди.

Соли Эрматга кун боқди

Туморлик Солижон Эрмат деган милиция ходими Кўкон шахар ички ишлар бўлимида ўттиз йил фақат навбатчиликда турганини кўпчилик эслайди. Тумор кишлогидан Кўконгача 30 километр бор. У хар навбат куни мотоциклда ашула айтиб, хизматта келади, кетишда хам шундай.

Кунлардан бирида вилоят ички ишлар Бошкармаси бошлиғи Ориф Ҳакимов Эрматовнинг навбатчилик пайтида кўнғироқ қиласди. Эрматов телефонни олиб: “Ўттиз йилдан бери ўттиз километрга қатнаб, дежурликда туриб, елкаси юлдуз кўрмаган ефрейтор Солижон Эрматов эшитади” деб жавоб берибди.

Эртаси Кўкон шахар ички ишлар бўлими бошлиғи Бойтемировга кўнғироқ бўлиб, навбатчиликда турадиган Эрматовни олиб, зудлик билан бошкармага келиш тайнинланди. Бойтемиров ранги окариб, кечкурунги навбатчиликда қандай ходиса юз берганлигини сўраганда, “шундай-шундай” деб кечаги бўлган гапни Солижон айтибди. У Эрматовни койиб, “Энди нима бўлади? Навбатчи Эрматов эшитади” деб кўя колсангиз, ўлиб колармидингиз? Ана энди кўрасиз. Сизнинг дастингиздан мен хам чора оладиган бўлдим” дея то Фарғонагача хуноби ошиб, ғазабланиб борибди.

Боришилари биланоқ, Ориф Ҳакимов: – Кечаги дежур Эрматов сизми? – деб сўрабди. Таасдик жавобини олгач, “Кечаги рапортингизни кайтаринг” – деб талаб килибди.

– Ўрток бошқарма бошлиғи, кечаги маҳмадоналигим учун кечирасиз – деб узр сўраса хам бошлиқ кечаги рапортни сўрабди. Ниҳоят, Эрматов кайтаришга мажбур бўлибди. Шунда бошлиқ ўрнидан туриб: – Бугундан бошлаб старшинасиз – дея, кўл соатини ечиб, кучоқ очиб табриклабди.

Буни кўрган бечора Бойтемировнинг рангига кизил югуриб: “Ўрток бошлиқ, юлдузи йўкни юлдузга якинлаштириб кўйдингиз, унинг бошлигини хам қурук кўйманг” деганда: “Бор барака, полковник бўла колинг” – деб лутф килган экан.

Кетга тепади-ку

Алишер-Нодирахонларнинг хонадонларига Андижондан Мунисхон ая, Тўхтасин ака, Тошкентдан Алишер, Дилбархон ўғиллари билан меҳмон бўлиб келишди. Дилкаш сұхбат асноси биринчи – иккинчи таомлар тортилди. Нихоят, меҳмонлар кетишга рухсат сўрашди. Мезбонлар палов тайёр бўлаётганини айтиб, яна бир оз ўтиришларини сўрадилар. Меҳмонлар тарааддувланиб туришган эди, Азизхон дўхтири мезбонларга ёрдамга келди:

– Ўзларингиз яхши биласизлар, ўзбекнинг маросимида “кетга тепар” деган ибора бор. Ош тановул килинмагунча, рухсат берилмайди. Ош ейилгач “кетга тепар” таомили бўйича кетишга рухсат бўлади. Бу таомилни Фаридахон ва камина ҳам тасдикладик. Шу тариқа лутф билан ош тортилди. Ҳамма ошга қўл узатди. Бирок, Тўхтасин аканинг ўғиллари Нодирбек ош ейишдан бош тортиди.

– Нега ош емаябсан? деб сўрашса, “Ош егандан кейин кетга тепилар экан-ку, емайман!” – деб, хўнграб юборса бўладими?

Тўхтасин ака мен ҳам емайман, Қўконликларнинг одати шунака бўладиган бўлса, мен ҳам емайман, кетамиз, деб туриб олди.

Ана ҳангомаю мана ҳангома!

Битта ўзинг келгин

Биродаримиз Анваржон Абдувалиев асли Бешариклик бўлиб, Тошкентда ишлайди. Радиодан унинг ўзига хос талаффузли, жарангдор, ширали овозини эшитиб, тасанно ўқимаган киши кам бўлса керак.

Хизмат юзасидан Тошкентга борганимизда, идорасига бир пиёла чойга таклиф килди. Чой асносида стол устидаги таклифномаларга кўзим тушиб колди.

Якинроқда турган бир таклифнома кўзимга ғалати кўринди. Унда 5 май, нахорги ошга таклиф этилиб, таклифнома юкорисига фломастернинг куюқ кизил сиёҳида “Илтимос, битта ўзинг келгин, ука!” деб ёзилган экан.

Ажабланганимдан икки қошим бир-бирига туташиб кетди. Хонага Улуғбек Раҳимов кириб колди. Салом алиқдан сўнг: – Ҳа ака, тинчликми, кошингиз чимирилиб кетибди? – деб сўради.

Жавоб ўрнига таклифномани узатдим. У тиззасига уриб, котиб-котиб кулди...

Алкисса: Улуғбек ва Анваржонларга Барно деган кадрдан опалари “Интерконтентал” деган тўйхонада ўғил уйлайдиган бўлибди. Ҳар бир тўймаросимга 3–4 кишини етаклаб юрадиган Анваржонга ҳалиги тарзда таклифнома ёзиб, Барнохон Анваржонни огохлантираётган экан.

Кўникиб кетасиз

Иши юришмай юрган укамиз Эшмат фолчининг олдига борибди.

– Кейинги пайтларда ҳеч ишим юришмайди. Бир фол очиб қўйсангиз, – дебди.

– Бозор иктисади, бу ёғи ўн беш минг сўм бўлади, бўтам.

– Укамиз айтилган суммани қўш қўллаб узатибди.

– Ёшинг неччида? – сўрабди фолчи.

– Йигирма иккода.

– Хм! – дея фолчи бир пас хаёлга чўмибди. Сўнг кироат билан сўз қотибди: – Йигирма беш ёшгача ишингиз юришмай, ночор ахволди бўласиз, бўтам.

– Ундан кейин-чи? – ҳовликиб сўрабди Эшмат.

– Унга алоҳида ҳак тўлайсиз, бўтам. Йигирма беш ёшдан кейингиси, йигирма беш минг сўм бўлади! – дебди фолчи.

Ҳаяжонланиб колган Эшмат йигирма беш минг сўм карзга пул топиб келиб, узатибди. Фолчи пулларни кўрпача остига яшириб, устига ўрнашиб ўтириб олгач, узок ўйга чўмибди.

– Кейинчи, кейин? – Эшмат бетокатланиб сўрабди.

– Йигирма бешдан кейин, – фолчи бир ютиниб олиб, давом этибди, – шу ахволингизга кўникиб кетар экансиз дермиш.

Банкротча

Лукмонжон деган оғайнимиз, ишлари оркага кетиб, банкротга учраб колди. Шу бало казолардан эсон-омон қутулайин, Оллохнинг ўзи йўл берсин, деб худойи қилди. Ошна-оғайнилар билан кириб бордик. Бир пайт юкорида ўтирган имом мендан сўраб колди:

- Бу хайр-эҳсоннинг боиси нима?
 - Оғайнимиз кичкинагина банкротча бўлиб колибди, – деб жавоб қилдим оҳиста.
 - Тушунарли, тушунарли, – деб қўйди имом.
- Ош ейилгач, имомимиз дуога тушиб кетдилар:
- Илойим, Лукмонжон укамиз банкротча бўлибдилар, бундан кейин ҳам катта-катта банкротларни Оллоҳ насиб килсан! Ана шундай катта-катта банкрот бўлганларида ҳам хонадонларининг тўрида ўтириш ҳаммамизга насиб этсин... Банкротликдан бошлари чикмасин...

Бўлмади. Имомнинг қўлидан шартта ушлаб, дусини тўхтатдим. Имом хайрон бўлиб колди. “Банкрот” сўзининг маъносини тушунтирган бўлдим. Имом менга караб илжайиб:

- Узр, таксир. Энди менинг дуоим банкрот бўлдими? – деса бўладими.

Tўрт ёшлик “ота қадрдон”

Хўжалик ишлари бошқарувчisi Раҳмонжон Сафаровнинг ғалати одати бор: ким билан гаплашмасин, “ота қадрдон”га айланиб қолаверади.

Хўжаликни тафтиш килиш учун Мақсуджон Холматов деган йигит келиб колди. Раҳмонжон Сафаров “Э, келсинлар, келсинлар!” – деб йигитни кучогига олди. Каердан, отаси ким эканлигини суриштиришга киришди. Йигит отасининг номини айтгач, жўшиб кетди:

– Э, биз сиз билан ота қадрдон эканмиз-ку! Отангиз билан биз вилоятга боргандা, тез-тез учрашиб турдим. У кишининг йўли биз томонга тушса, албатта, мени йўклайди. Аскияниям котиради-да! Йигитнинг зўри, ўтиришнинг гули отангиз!

Йигит бир қалкиб тушди-да, мунгли овозда:

- Амаки, отам тўрт ёшлигимда ўтиб кетишган, ўзим ҳам аранг эслайман...

Раҳмонжон бир сесканди-ю, ўзини йўқотмай:

– Тўрт ёшлигингида ҳам отангиз билан ошино здик. Тўрт ёшли ота кадрдоним экансиз! – деди.

Ўзингиз ҳам ҳаракат қилинг-да, бўтам

Раҳмонжон анча пайт фарзанд кўрмай юрди. Бормаган дўхтирлари, кўринмаган табиблари колмади.

– Тўхтасин ҳожига ҳам учраб кўринг, дами ўткір – деб маслаҳат бердик.

Раҳмонжон ҳожиникига қатнашни бошлади. Биринки ой катнагандан кейин, яна бизга ҳасрат қилиб колди:

– Тўртта хўроз, битта кўчкор кулоғини ушлаб кетди... натижа ноль!

Икковлашиб Тўхтасин ҳожиникига йўл олдик.
Раҳмонжон дардини достон қилиб бўлгач:

– Ҳожи ака, икки ой катнадим, натижа бўлмаяпти-ю! – деди минғирлаб.

– Икки ой катнаган бўлсангиз, ноилож, мен кўлимдан келган ҳамма ишни килдим. Энди, ўзингиз ҳам ҳаракат қилингда, бўтам...

Қарсак

Хўканди латифни Амир Умархон давридан бери “шоирлар шаҳри” деб эъзозлашади. У хозир ҳам шоирлар шаҳридир. Тўртта Кўконлик бир жойга тўпланиб колса, асқия мушоирага уланиб кетади. Кунлардан бирида Комил Жўра, Анвар Юнус, Адҳам Мирсаид, Назиржон Назаров, Аҳмад Фозил, Қулмуҳаммад, Турсун Қамбар, Анвар Дадабоев. Аъзам Назирий, камина ва бошка аҳбоблар тўпланиб колдик. Севимли шоирамиз Зулфия айтганидек: “Мушоира этади давом...”. Катта шоиримиз Комил Жўра илхом отига миниб, шеърият майдо-

нида жавлон ура кетди. Қани уни тўхтатиб бўлса. Бошқаларга гап бермай, шеър устига шеър айтиб турганди, карсак устига карсак бўлиб кетди. “Малик уш-шуаро” карсаклардан талтайиб кетиб, баҳмал болишни бикинига тортиб, астойдил ёнбошлаб олди. Камина уни шон-шуҳрат осмонидан самимият заминига тушириш учун:

*Сиз ишонманг, бу қарсакларга,
Бу қўллар қарсилаб толмайди.
Талтайтириб отар осмонга,
Ва ҳеч ким, ҳеч қачон илиб олмайди.*

Камина бу тўртликни айтиб бўлгач, шоири замон Комил Жўра “безобразие” деганича ўрнидан туриб кетди.

Мева пишиги

Аллома Фофур Гуломнинг уйи биз ўқиб юрган халқ хўжалиги институтига девор кўшни эди. Кунларнинг бирида Фофур aka институтнинг катта домлалари: доцент ва профессорлардан Зайниддинов, Отамирзаев, Талъат Саъдуллаев, Акрамовларни уйига таклиф қилибди. Уйга олиб кириб, гуллар-у ховлисига экилган дараҳтларни кўрсатиб, мактаниб кетибди:

- Мана бу нокни Грузиядан олиб келганман;
- мана бу ўрикни Афғондан олдириб келганман;
- мана бу шафтоли Озарбайжондан келтирилган;
- мана бу олмани эронликлар олиб келишди;
- мана бу гилосни Латвия ва хокозо деб нақд уч соат ховлида олиб юрибдилар. Домлаларнинг энсаси котиб, “бизни қайси хонага олиб кириб тушлик берар экан” деб у ёкка – бу ёкка карашар эди.

– Худо хоҳласа, саратондан эсон-омон ўтиб олиб, уч тўрт йил ичида мевага кириб қолса, ўшандада

яна бир тўпланиб гаплашамиз – деб сўзини якунлаган экан Фофур Гулом.

Бечора домлалар ханг-манг бўлғанларича, бир-бирларига караб, чиқиб кетаверган эканлар.

Орадан бир йил ўтгач, Фофур aka яна уларни хонадонига таклиф килганда, улар: – Уч-тўрт йилдан сўнг дараҳтларингиз мевага кирганда гаплашамиз деб кутулишиби.

Китоб ёзгани

Садоқатда ҳам, одамийликда ҳам ибрат олса арзидиган дўстим Анваржон Дадабоев ҳар ойда бир неча марта шаҳар телестудиялари орқали чиқишлилар килиб, ҳозирги сиёсий жараёнлар, дунё янгиликлари хақида қизиқарли кўрсатувлар бериб борар, бу кўрсатувни барча иштиёқ билан кўрарди. Ундан ташкари, Кўкондаги катта-кичик ташкилотлар (харбий кисм, ички ишлар идораси, солиқ инспекцияси ва бошқалар) Анваржонни маъруза ўкиб, сухбат қилиб беришга таклиф қилиб турар эдилар. Биз дўстлар ҳам: камина, Анвар Юнус, Ёркин, Раҳмон Сафаров, Ҳамид Кодирий, Ҳамидулло Абдуллаев, Гуломжон, Адҳам Мирсаид, Азимжон Азимов, Назиржон Назаров, Аъзам Назирий ва бошка ёронлар тўпланишиб, унинг кизикарли сухбатидан баҳраманд бўлар эдик.

Кунлардан бирида ўтиришимизга яна ўша сиёсий шархловчимизни таклиф этдим. Албатта, у бор жойда сухбат дунё воеаларидан бўлади. Чой асноси биринчи таом тортилгунча Анваржондан сухбат қилиб беришни сўрадик. У роса икки соат мобайнида бир култум сув ичмасдан, биз билан бутун дунёни айланиб чиқди. Ўтирганлар ҳайратда, дастурхончимиз таом тортиш-тортмасликни билмай доғда. Анваржон мағрибдан бошлаб, сўзини машриқ би-

лан тугаттач, Азимжон Азимов луқма ташлади: – Шунча нарса биласиз, Анвар ака, сизга ўхшаган шархловчи йўқ. Нега шу билғанларингизни китоб килиб ёзмайсиз?

Анваржон эса изоҳ бериш йўқ, узр сўраш йўқ, шарт ўрнидан турди-да: – Мен кетдим! – деб чиқиб кета бошлади.

– Каерга Анвар? Қайт, – десам.

– Китобни ёзгани, ижодимга, халқимга! – деганича бадар кетди.

Кейин билсак, Анваржон яна бир жойда учрашуви бор бўлиб, қандай баҳона қилишни билмай, шу йўл билан кетганига койил колавердик.

Доля (улуш)

Кўкат бозори ёнида ўрмон хўжалигининг дўкони бўлиб, бир куни камина идора ходимлари билан дўконга кириб, таъмиrlаш масалаларини мухокама қилиб турган эдик, дўкон оркасидан ғовур-ғувур овозлар келиб колди. Сухбатимизни тўхтатиб, секин туйнук тагига бориб қулок тутсам, чўнтаккесарларнинг Қодир деган бошлиғи бешолтитасини тўплаб олиб, дакки беряпти:

– Яхши ишламаяпсанлар. Агар яна шунака ишласаларинг, ўрниларингга бошкасини кўяман.

Чўнтаккесарлар ҳам ўзларини оқлашга харакат қилишяпти:

– Хўжайин, бу сафар бир кошик қонимиздан кечинг. Бизга ҳам осон тутманг, айникса, мана бу куриб кетгур пластик карта чиққанидан кейин ишимиз орқага кетгани-кетган.

Дўкондан охиста чикиб, орқага ўтдим. Осмондан тушгандек Қодирнинг олдида пайдо бўлиб, кўлимни узатиб: “Кани, чўзиб кўйчи” деганим захоти, у беихтиёр кўлидаги бир сиқим пулни менга узатди. Мен

пулни олиб, бир сўз айтмай шериклар билан жўнаб қолдим. Ўн қадамча юрган эдик, Кодир бақира бошлади:

– Ана кўрдингларми? “Ҳаммасини Қодир сайди” – деб ўйлайсанларда. Мендан оладиганлар ҳам бор. Мана кўрдиларинг...

Ҳайратдан оғизлари очилиб қолган Вали, Ҳамиджон ва Аъзамжонлар эътироф килишди:

– Хўжайн, бунақасини кўрмаган эдик. Кулишиб, идорага қайтдик ва халиги пулни фаррошларимиз ва коровулларимизга бўлишиб бердик.

Орадан бир хафта ўтгач, ички ишлар бўлим бошлиғи Абдумутал нуфузли орган ходимлар даврасида каминага гап қилди:

– Бу акани мактайверасизлар, билмайсизларки, чўнтаккесарлардан ҳам “доля” оладиган бўлиб қолганлар.

Камина ҳам бўш келмай:

– Ҳа, бир маротаба шундай иш булувди, ўша куни билмасдан бу кишига тегадиган доляни олиб қўйибман, дедим. Қалай?

Нася

Қўқондаги Кўкат бозори қаршисида ёзлик ошхона ва унинг ёнида кўчма кассобхона ҳам бор. Ҳар хафта, гоҳида хафтасига ошпаз алмашаверади. Сабаби нима экан, десангиз, хўрандаларнинг кариб ҳаммаси маҳалланинг ишламайдиган бекорчилари. Улар овкатни еб олиб, “Ёзиб қўйинг, кўкини майдалаб бераман, эртага овқатланганда қўшиб олаверасиз” деб хакини нася килишади. Сомса ёпилса, “Қани, бир тузини кўриб қўяйлик” деб бир тандир сомсани гум килишади. Кошки улар тўрт-бештагина бўлса... Ҳуллас, бир хафтага етар-етмас ошпаз “банкрот”.

Қассоблар масаласида ҳам шу ахвол. Насяга гүшт олишади. Дафтарга ёздириб ҳам қўйишади. Кўз-кўзга тушганда “бермайман, демаяпман, бераман, ойлик чикса ёки пенсияни олганда” деб кутулмокчи бўлишади. Ҳеч каерда ишламайди-ю “ойлик чиксин” деганига ўлайми? Қассоблар дафтар кўтариб уйма-уй юришади, барибир, ундириша олмайди. Кейинги олти ой ичида, саккизта қассоб, ўн тўртта ошпаз алмашди. Кўпчилиги қон босими ошиб, дўхтирма-дўхтир юришибди. Якин йигирма кун қассоблар ҳам, ошпазлар ҳам бу ерга якин йўламай қўйишди. Насяга ўрганиб қолган хўрандаю мижозлар хафа. Камина ҳам тинч турмай, битта ошпаз топиб келдим. Ҳамма хурсанд бўлди. Бирок бу хурсандчилик узокка чўзилмади. Ошпаз уч оғайнини спортчиларни ишга жалб қилди. Улар “жиддий” йигитлар экан, тишларининг оқини ҳам кўрсатишмайди. Нася сўраганларга қўлини ўрисча мушт қилади.

Олдинига ошпаз олиб келганимдан хурсанд бўлган маҳалла “хўрранда”лари энди мени кўрганда, пичир-пичир қилишади. Билмадим, нималар дейишяпти экан.

Энангнинг ҳақи

Расул кори деган машхур ҳофизни танимаган одам бўлмаса керак, соз чалиб, ашула айтганда, дарахтда қўнган қушлар ҳам хонишдан тўхтайди, йиғлаётган бола йиғламай қолган. Кори аскияда ҳам тенгсиз бўлганлар (Оллоҳ раҳматига олгани чин бўлсин).

Кунлардан бирида, катта бир сайдада танбурини чертиб, ашула айтаётганда, кистир-қистир қизиб кетиб, чаккасига пул сиғмай қолибди. Шунда таникли кизиқчи Абдулкосим ака корининг чаккасидаги

пулларни олиб, ўзининг чўнтағига солибди. Расул кори:

– Ҳа... – деса:

– Сен дадамнинг ашуласини айтдинг, бу пуллар у кишининг ҳакки, – дебди Абдулқосим ака пинагини бузмай. Расул кори ўтирган кўрпачанинг катидан беш олти минг сўм пулни олиб, узатиб:

– Олиб кўй, буниси энангнинг ҳакки, – дермиш.

Асқия қилмай мен ўлай

Жўрахон қизик Ўзбекистонда хизмат қўрсатган артист унвонига сазовор бўлгач, унинг яқин дўсти, пайровдоши Неъматжон асқиячи унга мулозамат қилиб: – Унвонлар муборак бўлсин, бу юксак мукофотни ўзим ювиб бераман. Узумзор чойхонадаги такияга боринг, гўзапоя ўтинига кабоб пишириб турман, бир бошдан учини артиб еяверасиз, деса, Жўрахон ака ҳозиржавоблик билан: – Ток ўтинга кимагунингча емайман, – деб жавоб кайтарганда, Неъматжон: – Сизга асқия қилмай мен ўлай, – деб секин жилворибди.

Адашилган тўй

Бешариқка, туман соғлиқни саклаш бўлими бошлиғи Пайғамовнига тўйга бордик. Ўзбекчилик деғанларидек, тўёнаға битта гилам олдик. Тўйхонага етиб боргач, кўча эшик ёнида қўл ковуштириб турганлардан бир иккита ёшроклари югуриб келиб, қўлимиздаги гиламни олиб, ичкарига киргизиб юбориши. Қўл ковуштирганларга разм солиб, Раҳмон Сафаровга, тўйнинг эгаси кўринмайдими? десам, у: – Ана, қайноғасининг Нексияси турибди-ку, – деб, бизни ишонтирди.

Базми жамшид бошланди. Дарҳакиқат, Раҳмон

Сафаров эслатган кайноға – Мухаммаджон ҳам бизнинг ёнимизга қўшилди. У бизга караб, бу ерда экансизларда, бизнинг тўйхонада сизларни роса кутишди, ҳатто сизларга тайёрланган жойга бошка одамни ўтказмай, саклаб туришди. Тўйнинг қизғи ўтгач, бу ўртоғимизнинг ҳам бир кўнглини олай деб бирров келган жойим, – деганда оғзимдаги ноним тушиб кета ёзди. Ҳаммаси маълум.

– Энди нима қиласиз? – десам, Раҳмон Сафаров:

– Ана, каранг, кийикларга майдо-чуйда тугишяпти, иккаламизга бўлса керак, назаримда тўн ҳам кийдиради, келинг, шу ерда ўтираверайлик, Мухаммаджон шу ерда-ку, айтиб кўяр, деганида хаммамиз Раҳмон Сафарга тикилиб, анқайиб колдик.

Мехмондорчилик

Ўрмоннинг гашти бўлакча, бунда одамларнинг ўз саргузашти ҳайвону хашаротларнинг ўз саргузашти бор. Табиат қўйнида яйраб, юрагидаги ғашликларни тўкиб, бир йиллик чарчоғидан фориг бўлишга келган шоху гадо ўрмонда бир хил хузур топади, бир хил дам олади, чивинига ҳам бир хилда таланади. Бу жойларда юриб, талай ҳангомалар кўрганмиз, улардан кўпини бировга айтмасликка сўз бериб, тўқайдаги гап тўқайда колади, деганмиз. Шунга қарамай, гап дарров таркалади.

Кўқонликлар, айникса, қўкон ўрмончилари азалдан сермехмон халқ. Бу тўқайда кимлар меҳмон бўлмаган дейсиз? Рўйхатининг ўзи том-том китоб бўлади. Яширишнинг хожати йўқ, мартабали меҳмон келадиган бўлса, ўзидан олдин хабари етиб келади. Ўрмонда эса шунга яраша ҳозирлик кўрилади.

Алқисса, кунлардан бирида Абдулла Орипов,

Жуманиёз Жабборов, Охунжон Ҳакимовлардан иборат машхур шоирлар ташриф буюрмоқчилар, деган хабар келиб қолди. Меҳмон отангдек улуғ деганидек, тайёргарлик кўрилди. Аммо ўша куни Абдулла ака каминага қўнғирок килиб: “Бир оз дарё соҳилида ўтирамиз. Балиқ топилиб колар”, деб кесатиб ҳам кўйди. Бўлим бошлиғи Икромjon балиқнинг ҳаракатига тушди. Аксига олиб, ўша кунлари шамол туриб, баликлар ин-инига уриб кетган экан, бозордан тиригини топиб келди.

Меҳмонлар келишди. Абдулла акага кирғокқа боғлаб қўйилган катта балиқни кўрсатсак, у чилвирни ечди-ю: “Суз, жонивор, менинг давримда сузиб юравер”, деб балиқни қўйиб юборди. Биз ичдан зил кетдик, албатта. Жаҳл устида “э-э” деб меҳмонни туртиб ҳам юборибман. Ишонганимиз шу балиқ эди, бу соҳилда яна нима овкат тайёрлаш мумкин? Меҳмонлар бир айланиб келгунларича, яна балиқ топиб келиб, ковурдик.

Абдулла ака дастурхонга балиқ қўйилганини кўриб, пича тикилиб турди-да, менга караб деди:

– Бояги қўйворган балиғим айтганимни килибди-я.

– Нимани айтувдингиз?

– Сен билмайсан-да. Уни қўйиб юбораётиб, отонандан тортиб катта энангача бу ёкка бошлаб кел, деб қулоғига пичирлаб қўйган эдим.

Бир яйраб кулдиг-у қўнглимдаги ҳалиги гинахонлик ҳавога учди-кетди.

Кариллик гашти

Узок йиллар Республика микёсида соғликин саклаш тизимида раҳбарлик лавозимларида хизмат килиб келган дўстим, танти, мард инсон Ҳолик Шараповичнинг нафақага чиқканлигини эшилдим. Тошкентга борганимда кўнгироқлашдик. Чамаси қирқ дақиқадан сўнг келишилган жойда учрашдик. Афтлари тундрок, кайфиятлари ҳам олдингиларга нисбатан мундайроқ.

– Ҳа ака, тинчликми? Соғлиғингиз яхшими? Рангингиз менга бир оз ёқинкирамай турибди. Ҳа, дарвоке, нафақага ҳам чиқибсиз, куллуг бўлсин деганим ҳамоно Ҳолик ака бирданига портлаб кетдилар:

– Ҳа, баъзи бир биродарлар ва ҳамкаслар, “Халқ учун, Ватан учун роса хизмат қилдингиз. Энди кариллик гаштини ҳам суринг” дея ҳол-жонимга қўймадилар. Ўша куни тантанали маросимдан сўнг тўғри уйга келдим. Эртаси куни, одатдаги-дек, вактли туриб кийиниб, галстуғимни такдим. Қани энди машина келса. Бирор соат кутганимдан сўнггина нафақага чиқканлигим эсимга тушди. Яна ечиндим, телевизор қўрдим, китоб ўқидим, ухладим, уйғондим, яна ухладим, бир бало қилиб кунни ўтказиш керак-ку ахир. Кўчага ҳам чиқиб келдим. Қундузи уйқуга тўйганим учун кечаси ухлай олмадим. Эртаси куни ҳамма ишга, ўқишига кетди. Уйда ўзим колдим. Зерикиб, ўртоқларимга телефон қилдим. Улар, хозир мажлис ўтказаяпмиз, селектордамиз, кейинрок телефонлашамиз, дейишиди.

Чойхонага чиқдим, бир чеккага ўтириб, чой чакирдим. Нариги сўрида махалладош таниш-билишлар ўтиришган экан. Улар ҳам хурсанд: “Яхши бўлибди, сафимизга кўшилдингиз... Соат ўн бирда Эгамбердиникида худойи, пешиндан кейин, Абдукаримникида ақика, асрдан кейин Аҳмаджоннинг...

хуллас тўртга-бешта маросим. Биттасига аранг чидадим. Эртасига юрг ошига таклиф килишди, кейин яна маросим, яна худойи... Билсам, чойхонадаги танишлар худойихўрлар экан. Тўғри, маросимларда бир-икки ўртоқлар билан учрашиб, хангомалашдик ҳам. Хуллас, бир хафта зўрға чидадим. Сиз кўнғироқ қилган пайтиңгизда менга қарилик гаштими суришни маслаҳат берган жупрукларни ёқасидан оламан деб, кидириб юрувдим. Ўзимда ҳам айб бор, “нафақага чикмай туриңг, зерикиб қоласиз”, деб огоҳлантиришганди, “қарилик гаштими ҳам суриб кўрайлик”, дебман. Тўхтанг-чи, бирор чакирялти:

– Ҳов, ким у? Нима? Абдулазизнига худойига? Қайси Абдулазиз? Об-бо, мана шу аҳвол...

Жой тайёрлаб қўйган эмишлар

Кўқоннинг тўйлари ва маъракалари тартибли, пухта ва ихчамлиги билан ажralиб туради. Бу борада дастурхончиларнинг хизмати бекиёс. Кўнгилли меҳмоннавозлик уларнинг тадбиркорлиги, хушмуомалиигига боғлиқ. Баъзан дастурхончининг хаёли фаромуш бўлиб, маъракани чалкаштириб юборса борми, кўринг томошани!

Хуллас, гап бундай. Кўқоннинг таникли кишиларидан Эркин Эргашев вафот этди (Аллоҳ раҳмат килсин). Жаноза ўқилгандан сўнг, кабристонга етиб бордик. Уч-тўрт киши кабристон дарвозаси олдидла шерикларимизни кутиб турган эдик. Кўкон дастурхончиларининг пешвоси Бокижон ҳожи худди тўйхона эшиги олдида тургандек, мулозамат қилиб колди:

– Қани, келаверинглар, жойларингиз тайёр, сизларга тўридан алоҳида жой қилдириб қўйганман...

Бу гапга ҳангу манг, нима дейишга ҳайрон бўлиб турган эдик, ичимииздан Баҳодир Отажонов ўзимиз

эшитадиган товушда: “Тайёрлаб қўйган жойинг бошингдан колсин”, қабристондасан, гаранг. Биз бу ёкларга шошилаётганимиз йўк:

Бир гурӯҳ кишилар пиқиллаб кулишга тушди, бошқалар Боқижон ҳожига хўмрайишиб, каллаларини чайқай бошлишди.

ТҮҚАЙ ҲАНГОМАЛАРИ:

Қўйнинг баҳоси

Ўрмон хўжалиги чорвадори Мамадисок қўйларидан бирини Кўкон мол бозорига олиб келибди. Кўп ўтмасдан харидор ҳам чика қолибди.

– Кўчкор неча пул бўлди? – сўрабди харидор.
– Ўзим буни минг сўмга олган эдим, – дебди Мамадисок. – Яхши биласиз, ҳозирги вактда молкўй бокиш кийин бўпкетди, ўзимга ҳам уч-тўрт танга колмаса бўлармиди? Уйдан ўн иккитага (бир минг икки юз демоқчи) сотишни мўлжаллаб олиб чикаётиб, мард харидор учраса, камида ўн уттага олар деб ўйладим. Келсам, харидорлар ўн тўрттага сўради, бермадим. Майли, сиз ўн бешта бериб, олиб кетаверинг дермиш.

Машҳур ўрмончи

Ўрмончилик ўкув юртида “Ўрмончилик тарихи” дарси. Профессор талабаларига савол бермоқда:

– Қани, ким айтади, ўрмончилик соҳасида машҳур шахслардан кимларни биласиз?

Бир талаба ховлиқиб қўл кўтарди:

– Мен айттай, домла.

– Айт.

– Абдулла Тўқай.

Хон ва жувозкази

Кўкон ҳукмдори Норбўтабий тўқай сайрини хуш кўрар эдилар. Кунларнинг бирида сайр килиб юриб, тўқай четидаги бир қишлоққа бориб қолдилар. Жувозхона ёнида ўтаётганларида, унинг ичидан кўнғирок овози келаётганини эши-

тиб, ҳайрон бўлдиларда, отдан тушиб, ичкарига кирдилар. Кўрдиларки, жувозкаш хона тўридаги тўшакда ёнбошлаб ётибди. Ўртада эса бўйнига кўнғирок боғланган эшак жувозни айлантирмоқда. Жувозкашнинг кўзи хонга тушгач, югуриб келиб, таъзим қилди. Салом алиқдан сўнг хон ҳазратлари сўрадилар:

– Эшак бўйнидаги кўнғирокнинг боиси нима?

Жувозкаш: “Эшакнинг тизгинидан етаклаб, у билан бирга айланавериш жонимга теккач, ўзи айланниб юришига ўргатдим. Ўзим эса дам олиб ётаман ёки бошқа иш билан машғул бўламан. Кўнғирок эшитилмай колса, эшакнинг тўхтагани тезда билинади”, – дея изоҳ берди.

– Дуруст ўйланган, – деди хон. – Хўш, агар эшак бир жойда турган ҳолда бўйнини силкитиб, кўнғирокни чалаверса-чи?

Унга жавобан жувозкаш: “Эй Олампаноҳ, эшакнинг акли қачон хоннинг ақлига тенг келибдики, сиз айтгандек қилса?” – деган эди, хон қула-кула, ҳозиржавоблигига яраша жувозкашни мукофотлаб, ўз йўлида давом этибди.

Динозавр тухуми

Ёзувчи Дадаҳон Нурий илҳом олиш мақсадида Сариқамиш кўлига келди. Кўлбон Иномжон биринки кун уни балиқ билан бокди. Учинчи куни Бешариқдан бозор килиб келиб, паловхонтўра дамлади. Шунда ҳам меҳмон кетиш масаласида чурк этиб оғиз очмади. Иномжон кўнгил сўраган бўлди:

– Мехмон, зерикиб колмадингизми? Чивин ҳам роса безор қилгандир?

– Зерикиш қаёқда дейсиз? Бу ерлар жаннатнинг филиали экан-ку. Чивин ҳакида ғам еманг, чет элнинг чивинга қарши суртма дорисидан олиб келгандман, ёз ўтгунча етади.

Иномжон ортиқча бир нарса демади. Факат кечки тамаддига кўнгли қандай овқат тилаётганини сўради.

— Ўзингизни кўп уринтирунганг, — деди Дадаҳон. — Унча-мунча одам емаган, кўрмаган, эшишмаган, Тошкентга бориб мактанса арзидиган бирор нарса киласиз... Бу масалада сизларга ўргатиб бўларканми?

Хамма бешарикликларга ўхшаб, Иномжон ҳам ичидан пишганлардан, меҳмон кўл сайрига чиқиб кетганда, якинда сўйдирган букасининг пуфагини тузликдан олиб, ювиб-тозалаб, пуфлаб шишириди. Сўнг товукларнинг курк бўлишига йигиб юрган тухумларидан ўттизтасини олиб чиқди-да, пулакнинг ичига кўйди, козонда қайнаб турган сувга бир пишиб, кейин совук сувга солди. Тухумнинг сариклари ўртага йифилиб, пулак тухум шаклига кирди. Иномжон тухумни пишириб, пулакни арчиб ташлади, икки кило гуручли ош сифадиган товокка солиб, дастурхонга кўйди. Кўп ўтмай бир кучок юлғун гулинини кўтарган Дадаҳон кириб келди-да, дастурхонга кўзи тушиб, оғзи очилиб қолди.

— Э-хе... қойил-е! Ниманинг тухуми бу?

— Динозаврники, — деди Иномжон. — Сирдарёдан кирғоққа чиқиб тухумлаган экан, шуни опкелиб, пишириб кўяколдим.

— Қанақа динозавр?

— Биз уни динозавр дердик. Дарёда чўмилаётганлардан икки-учтасини чала-ярим еб кўйгач, олимлар келиб, роса текширишди, танадаги тишларининг ўрнига караганда, бу динозавр эмас, “плеziозавр” деб айтишди. Кейинги пайтда чўмилаётиб, бедарак йўқолган одамларният шу маҳлукдан гумонсирашяпти. Бизга катта ташвиш бўлди-да, прокуратура, милиция бизни сўрок қиласериб, хикилдокка келтиришди... Қани, сиз тухумдан кесиб еб туринг, мен чой дамлаб келай.

Ёзувчининг ранги кув ўчди, илгариги хушчакчак кайфиятидан асар ҳам қолмади. Тухумни кўнгли тортиб-тортмай, сал чўкилаган бўлди, сўнг бошқа нарсалардан тамадди қилди. Бир оз ўзига келгач: “Бугун неchanчи число? “Хотинимнинг туғилган кунига етиб бормасам бўлмайди”, деб шошилганча нарсаларини йиғиштира бошлади.

Ўрмончилар эртаги

Хўжалик раҳбарлари устидан юмалоқ хат тушибдими, бошқа сабабданми, ҳар ҳолда ўрмонни текширгани марказдан тафтишчилар келишибди. Улар Тўқайкишлок кўчалари бўйлаб келаётганда, бу ерларнинг “козир”лари бўлмиш Лайботир ва Олапарнинг уларга кўзлари тушиб колибди.

Лайботир: “Хей, Ола, узок вактлардан бери бегоналарни учратмаган эдик. Кел, сен бир ёндан, мен бир ёндан борайлиг-у шуларни копиб бир хумордан чиқайлик”, дебди. Шунда Олапар: “Ўйлаб гапир, Лай, кўлтиғидаги попкага қараганда, хўжайнинларга ўхшаяпти. Таласак, энамизни Учқўрғондан кўрсатиб кўйишмасин”, деган экан, Лайботир бирдан хушёр тортибди:

– Шундоқми? Оқибатини ўйламабман. Кел, ҳеч бўлмаса, итлик шаънимизни сақлаш учун бир мартадан вовиллаб қўйайлик...

Кўса Мўса

Маллабек ўрмончи кўнгир сарик соқолини силаб туриб, кўса Мўса ўрмончининг қитик патига тегмоқчи бўлибди:

- Ҳой, Мўса, сен нега кўса?
- Пешонамга ёзилгани шу экан-да, – дебди кўса Мўса. – Янги туғилганимда ўғил болалар бу

ёкка юринглар, фаришталар сизларга сокол тар-
катади, деб қолишиди. Кечрок колиб борган экан-
ман, қарасам, кора соқоллар тугаб кетибди. Сарик
соколда юргандан ўлганим яхши, деб олмай кета-
вергандим ўшанда.

Mия

Яҳёхон Сарикамиш кўлига илмий сафарга келиб
колди. Қайтишида кўл мутасаддиларидан бўлган
Собир унинг сафар тўрвасига тўрт-бешта балиқ со-
либ берди.

Яҳёхон уйига қайтгач, тўрвани хотинига тут-
казиб дебди:

– Мана, аяси, Собир дўстим ўз қўли билан овла-
ган баликларни яхшилаб ковуринг, болалар бир маз-
за қилсин... Айтгандай, буларни боши ҳам қўшиб
ковриладими?

– Албатта, дадаси. Бўлмаса, баракаси колар-
миди?

Яҳёхон бу гапни эшитиб: “Ундоқ бўлса, лоакал
миясини олиб ташлаш керак”, деса, хотини мийи-
гиди қулиб, кочирим қилибди:

– Вой дадаси-ей, балиқда мия нима қилсин, мия-
си бўлганда, Собир дўстингизнинг қармоғига ту-
шармиди?

Ҳакка ва Лайлак

Ўтган асрнинг етмишинчи йиллари экан, Лайлакнинг бир оёқда турганини кўрган Ҳакка дебди:

– Ҳой Лайлактўра, ҳануз бир оёқда турибсан-
ми? Ўтган асрда “нега бир оёқда турибсан”, деб
сўраганимда, “иккинчи оёғимни ҳам кўтарсам йи-
килиб тушмайманми”, деган эдинг. Ҳўш, энди кан-
дай баҳона топиб қўйдинг?

Шунда Лайлак дебди:

– Кўрик ва бўз ерларни ўзлаштириш шу даражада жадаллашиб кетдики, тўқайда иккинчи оёғимни кўйишга жой қолмади.

Зиндан

Манбаларнинг хабар беришича, Амир Умархон ўз салтанатидаги зинданлардан бирини тўқай ичидаги Ермасжид қароргоҳи яқинига курган экан. Хон ҳазратлари Муборак Рамазон кунларидан бирида бандилар холидан хабар олмок истагида мазкур зинданга борибди. Зинданга кириб, маҳбусларга ифторлик таркатибдилар-да, уларнинг арзини тинглай бошлабдилар. Маҳбусларнинг барчаси ўзининг бегуноҳ эканлигини исботлашга тушибди, фактат бир киши хақиқаттан ҳам айб иш қилганига икрор бўлиб тураверибди. Шунда хон зинданчига караб дебди:

– Манави гуноҳкорни зиндандан чикариб юборинг, бу ердаги бошқа гуноҳсиз фаришталарни йўлдан урмасин.

Қилмишига яраша

Тўқайқишлоқда бир ўрмончи яшаган экан. Бир куни қўшнисининг ити унга ташланса, қўлидаги болта билан бошини чопиб қўйибди. Итнинг эгаси чикиб: “Қанака одамсиз, итни қўрқитиш учун болтанинг сопи билан урсангиз ҳам бўларди-ку”, деса, у нима дермиш:

– Иting оғзи билан тишлади, болтада чопдим. Агар менга думи билан ташланганида, мен ҳам болтанинг сопида урган бўлардим.

Ҳасса

Ўрмон хўжалигида узоқ йиллар ҳалол меҳнат килган кекса ўрмончи Султонкабир ака катта танана билан пенсияга узатилди. Ана зиёфату ана совғалар. Совғалар орасида шамшоддан килинган, нақш ўйилган, бандига кумуш безак ўрнатилган гўзал бир ҳасса ҳам бор эди. Султонкабир ака ҳамманинг кўзини куйдириб, ҳассани бир неча кун тутиб юрдилар.

Лекин, ҳасса узунлик килиб, ўйлаб-ўйлаб, охири чорасини топибдилар-у, ҳассанинг юқори қисмидаги бир қарич безакдор қисмини кесиб ташлабди. Яқин дўсти Мамадали ака ҳассанинг аҳволини кўриб: “Нима килиб кўйдинг, тентак, пастидан кессанг ўлармидинг”, деса, Султонкабир ака: “Тепаси баландлик қилганидан кейин, тепасидан кесаманда”, дер эмиш.

Саранжомли хотин

Ўрмон хўжалигининг Абдусамад бўлимида бир эр-хотин ишлар эдилар. Эри вафот этгач, раҳбарият унинг хотинига Курбон хайити арафаси бир кўй бердириб юборди. Икки-уч кун ўтказиб, бўлим бошлиғи Икромжон иккита халтақоғозни тўлдириб, хабар олгани кирибди, ҳол-аҳвол суриштирибди:

– Ҳа опа, ўтирибсизми? Курбонлик кўйни саранжомлаб олдингизми?

– Икромжон ука, – деб гап бошлабди хотин. – Бир тул хотин бўлсам, кўйни исроф қилармидим? Кўйнинг ҳар бир аъзоси ўз ўрнида иш беради, дунёнинг “кўп”и “оз”дан йигилади. Масалан, шохини деворга козик килиб, сичкон ейиши мумкин бўлган нарсаларни унга илиб кўяман. Курагининг сўнгакларидан юнгтарок ясайман. Жунини йигирсам, кичкиналаримга пайпок чиқади. Суякларни шўрва килиб ичаман, ғажилганларни йигиб, козонда роса кайнатаман, чиқкан ёғини сузиб олиб, шам

куяман. Ёғдан асар ҳам қолмаган сүякларни ўтин киламан. Терисидан меш тикиб, сув сақлайман. Корнидаги ахлати куритилса, яхшигина тутантирик бўлади. Ичак-чавоги, ўпка-юраги тузлаб қуритилса, киш бўйи шавлага солинаверади. Қонини котириб, идишга солиб қўяман, янги козон олсам, уни кайнатиб, ёғлашда аскатади...

Икромжон буларни анграйганича тинглаб бўлиб, аёлнинг тежамкорлигига қойил колганча дебди:

– Опа, бизнига бориб, уйдагиларга ҳеч бўлмаса, сүякни тозарок ғажишни ўргатиб келинг.

Ҳуқми

Жўра ўрмончи билан Тўра ўрмончи ўз худудларини назорат килиб юрган эдилар, иттифоқо тўқайга адашиб кириб ҳар икки худуд чегарасида ўтлаб юрган қўйни қўриб қолдилар. Қўйнинг эгаси топилмагач, ўрмончилар талашиб қолдилар. Охири ҳар иккиси қўйнинг икки қулоғидан ушлаб, бўлим идораси томон юрдилар. Шу куни ўрмон хўжалиги конуншуноси Азамжон Ҳайитов идора иши билан бўлимга келган эди. Қўй талашганлар уни қўриб колиб: “Э, Азамжон бормисиз? Сиз хукук маҳкамаларида ишлаган тажрибали хукуқшуносиз, бизнинг жанжалимизни эшлитиб, хукм чиқариб берсангиз” деб, воеани баён килдилар. Азамжон ўйлаб туриб: “Майли, қўй можаросини ҳал этаман. Бироқ, қандай ҳукм чиқарсам, рози бўлиш ҳакида сўз берасизлар”, деб таъкидлабди. Ҳалигилар бунга рози бўлиб, сўз берибдилар. Шундан сўнг Азамжон “Қўйнинг кулокларини қўйиб юборинглар” дебди. Улар қўйнинг кулокларини қўйиб юборишган эди, Азамжон бўйинбогини қўйнинг бўйнига солдида, етаклаб кетаверди. Ҳалигилар оғзиларини очганича колавердилар.

Кейин суриштиришса, қўй Азамжонга тегишли экан.

БАГРИКЕНГЛИК ЁКИ МАНСУРХЎЖА ҲАҚИДА

Мансурхўжа Кўконда доврукли одам – каттадан-кичик, ҳамма уни жуда яхши танийди. Ўрта бўй, истараси иссик бу одамнинг чехрасидан табассум ари-майди. Дўстликнинг қадрига етади, якин одамлари-га жону жаҳонини бағишлишга тайёр. Мансурхўжа хаётнинг аччик-чучугини кўрган, такдир замзама-ларидан кўп кимматли хulosалар чиқариб олган. У дунё кезган, ҳаж зиёратига бориб келган. Фар-зандлар кўрган, якин одамларидан айрилиқ изти-робларини ҳам бошидан кечирган. Шоиртабиат. Факат кўчма маънода эмас. Бир нечта шеърий ки-тоблар чикарган. Эсселар ҳам ёзиб туради. Тарихий тадқиқотларга ҳам майли бор. Якинда “Ер ости сирлари” деган бир тадқиқотини эълон қилди. Унда Кўкондаги баъзи қабристонларда мангу маскан топ-ган бир қанча улуғ алломалар ва зоти мубораклар-нинг хотирасини тиклашга уринган. Унинг бунақа савоб ишлари кўп. Ўзи жуда серзавқ одам. Завқи кўзиб кетганда, ҳаяжондан энтикиб кетади, гапи оғзига сиғмай колади. Бу одам шеър ёзгани билан касби шоирлик эмас, шунчаки кўнгил иши. Унинг бошка асосий касби бор.

У – ўрмончи, Кўкон ўрмон хўжалигининг бошлиғи. Ўз ишини жуда яхши билади, яхши биладиган эмас, жон-дилидан яхши ҳам кўради. Ишнинг кўзини билади. Шунинг учун жуда оғир иқтисодий кийинчиликлар даврида ҳам унинг хўжалиги муттасил даромад олиб келмоқда. Шунинг учун бу соҳанинг мутасаддилари бошка ўрмон хўжаликларида ҳам Мансурхўжа тажрибаларини кенг ёйиш устида бош котиришади, у ерда турли се-минарлар ўтказишади. Шу тарзда у неча йиллардан бери табиат неъматларини асраш ва кўпайтириш соҳасида самара билан меҳнат қилиб келмоқда.

Шу фазилатлари етмагандай, Оллоҳ унга яна бир сифат ато қилган – у жуда очиқ кўнгил, саҳоватпеша, меҳмондўст одам. Кўқонга келган ошна-оғайниларига бир пиёла чой қуйиб бермаса кўнгли жойига тушмайди. Таникли адаб Дадаҳон Нурий “Олтин девор тиркишидан” деган китобининг кўпгина саҳифаларини Мансурхўжага бағишилаган. Унинг ёзишича, Кўқонга келган бирор кадрдон унинг олдига бормай кетса, Мансурхўжа унинг кетидан ҳатто Довонгача кувиб бориб, орқасига кайтариб олиб кетиб, меҳмон қилиб, кейин жўнатар экан. Мен бу гапни ёзувчиларга хос бўлган одатдаги бир муболага деб ўйлаган эдим, лекин Мансурхўжанинг меҳмондўстлигини ўз кўзим билан кўргандан кейин бунинг чинлигига амин бўлдим. Ўшанда биз Ўткир Ҳошимов билан Бешарикда дам олаётган эдик. Бир куни Кўқонга тушдик, у ердаги танишларимиздан бирининг хузурида Мансурхўжа билан танишдик. У бизни кўярда-кўймай, ўз салтната ниға олиб кетди.

Кўқоннинг шундоқкина бикинидаги Найманча деган жойдан дарё томон кетдик. Бир-икки кишлоқдан ўтдик, кейин ҳақиқий ажойиботлар бошлианди. Биз ҳақиқий Саҳроий қабирга кириб қолдик. Йўлнинг икки томони кўз илғамас даражада кум. Баъзан улар текис ёйилиб ётади, баъзан эса кум барханлари тоғдай қад кўтарган. Мен ҳатто уларни кўрганда устимизга ёпирилиб қолмаса гўргайди деб ваҳимага тушдим. Буни қарангки, ўзим Кўқонлик бўлиб, шунча йилдан бери Марказий Фарғонада бепоён қумлоклар борлигини билатуриб, ўнлаб марта Кўқонга келиб-кетиб юриб, унинг ёнгинасида шунака жойлар борлигини билмаган эканман. Қумлоклардан ўтиб, дарё бўйига бордик, унинг кирғоғида ўтириб роса меҳмон бўлдик. Қайтища эса яна бир мўъжизага рўпара келдик. Йўлнинг бир

жойида бир эшак арава кўндаланг туриб қолган, ўтиб кетишнинг иложи бўлмади. Араванинг эгаси – кексайиброк колган, аммо ҳаракатлари бардам ва тетик бир киши отимизни айтиб, эски қадрдонлардек кўришди.

– Мен бу ерларда ковун экаман. Сизларнинг келганларингизни эшлишиб, аравада қовун олиб келдим. Шуни олиб кетмасанглар, каттиқ хафа бўламан.

Биз кўнмадик – қовун кўп эди, – уни машинализнинг юкхонасига сиғдиришнинг иложи йўқ эди. “Майли, биттасини сўйинг, шуни, ўзи етади” дедик. Шу ерда, кўчанинг қок ўртасида туриб, машинанинг юкхонаси устида битта қовунни пақкос туширдик. Қовун жуда ширин эди. Лекин бу билан иш битмади – деҳқон бобо “қовунни бошқа олмаймиз”, деганимиздан астойдил хафа бўлди. Чор-ночор ўнтача қовунни машина юкхонасига ортишга мажбур бўлдик. Кейин билсак, бу мўъжиза Мансурхўжанинг иштирокисиз бўлмаган экан.

**Озод Шарофиддинов,
Ўзбекистон Қаҳрамони,
2003 йил**

МУНДАРИЖА

Кулги соғинчи (<i>A.Обиджон</i>)	4
Кўнглимдагини бир тўқдим-да	5
Тўқай ҳангомалари	133
Бағрикенглик ёки Мансурхўжа ҳакида (<i>O.Шарофиоддинов</i>)	141

Мансурхўжа Ҳўжаев

АЙТМАЙ ДЕЙМАН-У... БЎЛГАН ВОҚЕАЛАР-ДА

Ҳаёттый ҳангомалар

“Sharq” нашриёт-матбаа
акциядорлик компанияси
Бош таҳририяти
Тошкент – 2013

Мухаррир Улугбек Раҳимов
Бадиий мухаррир Талиб Қаноатов
Техник мухаррир Раъно Бобохонова
Сахифаловчи Мастура Атҳамова
Мусаҳҳих Фарзона Ҳайдарзода

Нашр лицензияси AI № 201, 28.08.2011 йил.

Теришга берилди 05.12.2012. Босишга руҳсат этилди
06.05.2013. Бичими 84x108^{1/32}. Офсет босма. Шартли босма
табоги 7,56. Нашиёт-хисоб табоги 6,01. Адади 1000 нусха.
Буюртма № 2982. Бахоси келишилган нархда.

**“Sharq” нашриёт-матбаа
акциядорлик компанияси босмахонаси,
100000, Тошкент шаҳри, Буюк Турон кўчаси, 41.**